

KOPI MO FAASAOSAOGA TALAFEAGAI A SUI USUFONO

ASO LUA, 20 OKETOPA 2015

Na tauaofia le Fono Aoao Faitulafono i le itula e 9:00 i le taeao e tusa ai ma le Polokalame o Fonotaga a le Palemene 2014/2015.

Tatalo.

ISI FAASILASILAGA A LE FOFOGA FETALAI

FOFOGA FETALAI: Ia ou te talitonu e le o se mea ese le mea nei. O lo o tatou aifilofilo i le Agaga Paia o le Atua pei ona tatou tapa ai tuliaitata i le tatou tatalo e afio mai Lona Mana Lilo e vaisausauina le paia ma le mamalu o le tatou Palemene. E talitonu sa tatou vaoeseese i nai masina ua tuanai atu, ae i ai le agaga maualuga e le faaitiitia le agaga faafetai i le Atua, o lenei ua tatou aofaga potopoto i Lepea nei ma Vaitagutu. O maota o le tatou Malo sa fausia ma le faamoemoe, aua le faaauau i luma o galuega faataatitia a le Malo e faapena foi le tatou Palemene.

O le talafaasolopito a le tatou Palemene o le uluai taimi muamua lenei ua tatou tuua ai le Malae Fono i Tiafau, ona o fuafuaga o polokalame faataatitia aua le toe fausiaina o le tatou Palemene mai futia ua sola ma aso ua alu, o mea e fia faaleleia ua mafua ai ona tuuina mai le tatou Maota Fono mai le Maota Fono lenei, o se tasi o Maota Fono a lo tatou Malo sa fuafuaina i Fonotaga Faava o Malo pei ona maea nei, ia o lea ua tatou agai mai ai e faatino le tatou Fonotaga.

E talitonu foi o le a le vavaea le falaooto i Lepea ma Vaitagutu o Malaefono aua le paia i le Tama a le Fale ia Faumuina ma Mataia, susu o Seiuli ma Alo o Malietoa, afio mai Tapaau o Faleata, maliu mai foi Aliimatutua, maliu mai le Pulelua ma le Faiga, faapea le Nofo a Pule ma le Tauaitu ma le Saofaiga Atua, ma upu ia te oe Faleata.

O lea ua maota tauave le Malae Fono i Tiafau, i Lepea ma Vaitagutu. Ou te manatu o le Maota o Tupu, e le tau faailoina, o le Maota ua uma ona faataatitia, o fea lava e agi i ai aga o fuafuaga a le Malo ma le Palemene, e i ai le manatu o le a le poia Faleolo.

O lenei taeao ou te faafeiloai atu i tulaga aloaia i le alafai mai i faguga lelei le paia o le tatou Palemene i ona tulaga faalupe, i lau Afioga i le Taitai o le Malo, le mamalu i Minisita o le Kapeneta, aemaise foi o le Afioga i le Taitai o le Itu Agai ma sui usufono mamalu uma o le Palemene o Samoa. Malo le folau, malo le onosai, malo le galulue, malo le tauatai ma le faapalepale. Sa tatou vaoeseese ona o le tele ma le anoanoai o feau ma tiute ma galuega sa outou feagai ai i lena masina ua tuanai atu, ae faafetai i le Atua i Lona alofa ma Lona agalelei, ua tatou toe aofaga potopoto i lenei taeao. E faafetai ai i le Atua i Lana tapenaga mo tatou, ua maua ai se nofoaga lelei faapenei ua Ia

foaiina mai e faaauau ai le tatou Fonotaga mo le faaauauina o lenei tausaga, aemaise o lenei Paeaiga.

Ou te faapoi foi vagana i le tapuaiga a Samoa i ona tulaga faalupe i le paia o Aiga ma a latou Tama, o Tama ma o latou Aiga, le Usoga a Tumua ma Pule, Aiga i le Tai ma le Vaa o Fonoti, faafetai Samoa tatalo. E manatu le lagona e oo mai pea le faamafanafanaga o la outou tapuaiga a o alofaiva lou Palemene, i le tagata ma lana aua le valaauina.

Ia alo maia, tui mai pea le mulipapaga feula mai le mulila, a o alofaiva lou Palemene aua le Fonotaga i lenei aso.

Ou te manatu o lea ua taatia i paga le tatou galuega sa tatou feagai ai i le tatou aso fono mulimuli. Ae tatou te le i taumavae, ona i ai lea o le talitonuga o lo o ua malamalama lelei le paia ma le mamalu o le tatou Maota Fono i galuega sa faatuina aloaia ai le tatou Lafo, ina ia oo atu i le tatou Fonotaga lenei ma le Fonotaga ia Novema, ua tatau ona maea galuega tuua a lo tatou Palemene. Ae faamalo atu i Taitaifono ma sui usufono mamalu uma, o lo o maitauina pea, aua o lea ua o i tatou potu fono o Komiti, ia o lo o faapena ona tapena le tatou aufaigaluega, aua le faamaeaina o galuega pei ona faatonuina e le Maota Fono.

E i ai le faamoemoe e le umi le tatou Fono lenei, ona o lo o i ai nisi o tuatuaanoa ma tuatuaiga a le Malo, ae fua lava le tatou galuega i la outou tali mai. O lea ou te tatalo atu ai ma le agaga faaaloalo i le paia ma le mamalu o le tatou Palemene, ia lava mai le onosai i lenei aso. O lea ua tatou i ai i le vaivaa o le luluti o le tai, ia e manaomia lo tatou galulue faatasi aua le faamaeaina o Tulafono Tau Faaofi taua e iva, e iva Tulafono Tau Faaofi taua ua i luma Maota, o le a faaalua i ai ma tatala le auafa i lenei aso ma le tofa saili o lo outou paia ma lo outou mamalu i sui usufono. O le talitonuga a le Fofoga Fetalai e leai se mea e faigata pe a tatou galulue faatasi. Ia iu lenei aso ma lenei vaiaso po o a foi taualumaga o Fonotaga i lenei vaiaso, ou te manatu, ia e lelei ona tatou tiga puupuu, ia ona alo ai lea o le tagata ia i ana fuafuaga ma ana galuega faatino, aemaise foi galuega mo le faatinoga o galuega a le Malo, ae ua avanoa ai foi sui usufono mo polokalame a le tagata lava ia.

Ou te manatu ua tauaoina e sui usufono uma o le Palemene ma Faauluuluga o Matagaluega ma sui o Matagaluega ma Faalapotopotoga uma a le Malo, faapea foi le Au Faasalalau ma malo asiasi mai le ata o lenei Maota ma tulaga o auaunaga, e faapea foi faitotoa ma nofoaga e agai mai ai i totonu le paia ma le mamalu o le tatou Maota. Ae mo le silafia, o lo o faaauau pea le malosiaga o le Pule Faatonu a le Fofoga Fetalai o le Maota ma le nofoaga o le Palemene pei sa tatou i ai i Tiafau ma le elele ma le nofoaga lenei. O lea pule, e le tau faailoa atu, ua uma ona faatatauina na toina mai e le Palemene e fai ai le faaiuga talafeagai mo le malupuipua o Maota ma nofoaga o le Palemene, faapei o le lelei o faagasologa o galuega a le Fono Aoa ma i lea taimi i lea taimi ma le sauniga o Komiti Faapalemene, e toe faamanatu atu ai tulaga nei.

Muamua, mo le Au Faasalalau, e tatau ona tapa muamua se faatagana a le Fofoga Fetalai, e le gata i lea o le puega o ata o Tualumaga o Fonotaga Faapalemene, ae faapea foi le ulufale mai i le Maota lenei i so o se taimi, a o faagasolo Fonotaga a le Palemene e faapea foi i tulaga o Fonotaga a Komiti. Ua ou faatonuina foi le Satini o le Maota ma le aufaigaluega o le Ofisa o le Fono, ina ia mataituina ia nei faatonuga.

Lua, ua faatulaga faleie e tali ai taumafagati a sui usufono i fafo atu o lenei Maota, ua i ai foi tulaga ua saunia pei o tulaga masani i Faauluuluga o Matagaluega, aemaise o le paia ma le mamalu o tatou malo mai fafo o lo o tatou faatasi. E tatou te o lava i tulaga masani, afai e i ai se Faauluuluga o se Matagaluega e fia saunoa i se Minisita, logo le Satini o le Maota, ona faapena lea ona faatulaga tulaga masani pei ona tatou i ai.

Ou te faamalulu atu foi i le paia o sui usufono ona ua le gafataulimaina e le Maota nisi o ofisa taitoatasi o a outou Afioga, ia ae lava mai le onosai, o lenei lava e tau faatulaga tulaga masani, ina ia mafai ai ona tatou ofi faatasi i lenei Maota e faasolosolo ai ma faafaigofie la tatou galuega.

SAUNOAGA O MALIU

*Na faasilasila e le Fofoga Fetalai le tuumalo o le **Afioga AEAU TAULUPOO**, o Le sa avea ma sui usufono o le Palemene i tausaga ua mavae.*

*O le **Afioga AEAU TAULUPOO** na uluai filifilia mai o Ia i le Palemene e fai ma sui usufono o le Itumalo Faaalaalafaga o Falealupo i le Paeaiga o le 1970 i le 1972. Na toe filifilia mai o Ia i le Paeaiga o le 1973-1976, ma le Paeaiga o le 1979-1981.*

Sa avea lana Afioga ma Sui Fofoga Fetalai i le Paeaiga o le 1979-1981. Sa avea foi ma sui usufono o le Komiti o Tulafono Tau Faaofi i le Paeaiga o le 1970-1973. Sa avea ma Sui Taitaifono o le Komiti o Tupe a le Malo i le 1979-1981.

O Ia o se tasi o Sui o le Fono Faavae a Samoa i le 1960.

Ia avea ia o Au e fai ma sui o lenei Palemene e molimoli atu ai faamafanafanaga ma faamaisega i le itumalo pele, le faletua ma le nofo a alo aemaise le aiga alii ona o le toesea ai o le Tama pele.

Na tutulai filemu le Maota mo le minute e tasi e faailoa ai lo latou faaaloalo i le sui usufono ua tuumalo.

TUUNA ATU O PEPA

Na tolaulauina e le Failautusi Pepa ua tuuina atu e tusa ai ma le T.T.48.

1. P.P. 2015/2016 Nu. 61, Lipoti Faaletausaga a le Komisi o Galuega a le Malo mo le Tausaga 2013-2014.

TUUNA ATU O LIPOTI A KOMITI FILIFILIA

Na tolaulauina e le Failautusi Lipoti a Komiti Filifilia nei ua faataatia i luga o le Laulau a Fono e tusa ai ma T.T.51(5).

1. P.P. 2015/2016 Nu. 51, Lipoti a le Komiti o Mataupu tau Faamasinoga, Leoleo & Falepuipui i le Tulafono Tau Faaofi o le Faauigaina o Tulafono 2015.

2. P.P. 2015/2016 Nu. 52, Lipoti a le Komiti o Mataupu tau Faamasinoga, Leoleo & Falepuipui i le Tulafono Tau Faaofi o Tulaga o Tagatanuu i le Teufaafaigaluegaina o Tupe mai Fafu 2014.
3. P.P. 2015/2016 Nu. 53, Lipoti a le Komiti o Mataupu tau le Va i Fafu, Fefaatauaiga ma Tupe Maua i le Tulafono Tau Faaofi o Lafoga o Oloa ma Galuega Faatino i Luga o Aofaiga o Tau 2015.
4. P.P. 2015/2016 Nu. 55, Lipoti a le Komiti o Oloa Gaosia Tulaga Muamua i le Tulafono Tau Faaofi o Teuteuga o le Faavae 2015.
5. P.P. 2015/2016 Nu. 56, Lipoti a le Komiti o Galuega, Felauaiga ma le Siosiomaga i le Tulafono Tau Faaofi o Teuteuga o le Tulafono o Eleele, Fuagafanua ma le Siosiomaga 2015.
6. P.P. 2015/2016 Nu. 57, Lipoti a le Komiti o Galuega, Felauaiga ma Siosiomaga i le Tulafono Tau Faaofi o Teuteuga o le Tulafono o le Faamauiina o Pule o Fanua 2015.
7. P.P. 2015/2016 Nu. 58, Lipoti a le Komiti o Tupe Maua ma Tupe Totogi i le Tulafono Tau Faaofi o Faamatalaga Molimau i le Faamasinoga 2015.
8. P.P. 2015/2016 Nu. 59, Lipoti a le Komiti o Tupe Maua ma Tupe Totogi i le P.P. 2015/2016 Nu. 21, Lipoti Faaletausaga a le Faalapotopotoga o Inisiua tau Soifua a Samoa mo le tausaga 2014.
9. P.P. 2015/2016 Nu. 60, Lipoti a le Komiti o Galuega, Felauaiga ma Siosiomaga i le P.P. 2015/2016 Nu. 33, Lipoti Faaletausaga a le Matagaluega o Galuega, Felauaiga ma Atinae Eseeese mo le Tausaga Faaletupe 2013/2014.

LAFO MO LE FAATAATIAESE O TULAFONO TUMAU

FOFOGA FETALAI: Tulai mai lau Afioga i le Palemia.

Susuga Hon TUILAEP A FATIALOFA AUELUA LUPESOLIAI NEIOTI AIONO SAILELE MALIELEGAOI (Palemia): Lau Afioga i le Fofoga Fetalai ae le i faatuina le lafo, o lea ua uma ona e tatatuliaitata, o le faafetai i le Atua ona o le faamoemoe ua taunuu o le laau o le soifua lea, ua tatou feiloai ai i le tatou Fonotaga i lenei foi Maota fou. Ua uma foi ona e faamaafi i le tapuaiga a Lana Afioga Mamalu, O le Ao o le Malo faapea foi le tapuaiga a Samoa i ona tulaga faalupe. Ua e faapa'i foi i le mamalu o le Maota nei i le alafai mai ma maleifua mai i le soifua lelei i lenei taeao fou i lo tatou alofaiva i le tatou Fonotaga aua mataupu tuua e tataua ona liliu ai le tofa ma le faautaga o'o. Ua tilotilo atu foi i le Maota nei ua le uma le fia fonu i le vaai atu i le fā'alo, pei lava o lea tatou te pupula atu i lugā i le lagi i le lanu o le fā'alo i le manaia o le lanumoana o ao. O se tulaga matautia lea ou te tilotilo atu ai i le Maota nei, aemaise o lea sa fitaituga i le tau mafaufau i ata o le tatou Maota fou o faagasolo nei i Tiafau. O lea ou te vaai atu e ese le manaia o lenei lava fausaga, e leitioa foi e le uma le talanoa o le lalolagi aua o i sa usu ai le Fonu i le tausaga talu ai i le manaia o lenei Maota ua tatou fonu ai. Ua ou vaai atu foi i le tulai mai o le Itu Agai i laei matagofie sasama mumu ulaula, ua ese lenei taeao i le sagisagi fiafia o le Maota ua le uma ai le fia lauga, e leitioa foi toetiiti alu le taeao o e lauga mai ia matou i upu faalaeiau, e pei o le agaga fiafia lea ua tupu a'e i le lotu.

E faatalofa foi i le oo mai o Faauluuluga o Matagaluega. O le tausaga e 1984 na faataoto mai ai faiga faavae nei aua o lima taumatau ia o le Maota, o le Maota nei ma le Malo o tupu ma e'e o le atunuu ua tuuina atu i ai e le Atua ia le tomai ma le agavaa latou te fautuaina ai le Malo ina ia fau ai Fonotaga a le Palemene. E aumai le latou tuualalo i Minisita e talifuaitau atu ai i mataupu e laga mai e a outou Afioga o le Maota, aemaise lava le Itu Agai, aua e le o i ai se atoa ia i matou nei. Ae o latou ia o auauna a lo tatou Malo o Faauluuluga o Matagaluega o latou ia o lo o nafa ma le faatinoga o galuega. O le Malo ia i Afioga i Minisita ia ma au nei, ia pei na ona taoto o faiga faavae e limataitaiina ai le faatinoga o galuega, ae o le mamafa o galuega o latou ia. O le ala lea e taua ai tele le auai mai ma le taumafai mai i lenei taeao, a o a ni mea e moomia e Minisita nei ona tapatapa lea i le latou tuualalo ina ia anoa le tali atu, aua ne i faitauina le faautaga ma le tofa foi i le Kapeneta o lea e taliāina lo outou finagalo i taimi uma e lagalaga mai ai mataupu i totonu o le Maota. O le ala lena e le uma ai le agaga fiafia i lenei taeao e toe faaopopo atu ai i lau faalaeiau i lau Afioga i le Fofoga Fetalai i le Maota nei aemaise o le faafogafoga mai a lo tatou atunuu.

O le lafo ua valaauina ai au lau Afioga i le Fofoga Fetalai ou te tulai atu e faatu le lafo, *Ina ia faataatiaese Tulafono Tumau 106 ma le 107(4), ina ia avanoa ai le aso fonole nei le Iloiloga Auiliili ma le Faitauga Faatolu o Tulafono Tau Faaofi tutu'a e 8 ia ua lipotia mai e Komiti o le Palemene i le aso.* O le lafo lena lau Afioga.

Faaluaina e le Sui Palemia, Minisita mo Pisinisi, Alamanuia ma Leipa, ma le Minisita mo Galuega tau Alamanuia ma Atinae a le Malo.

Na faamaonia le lafo ma tulai ai Tulafono Tumau 106 ma le 107(4) ua faataatiaese.

TULAFONO TAU FAAOFI O LE FAAUGAINA O TULAFONO 2015 – iloiloga auiliili

FOFOGA FETALAI: E tusa ai ma le Tulafono Tumau 106, e tatau ona faamaonia muamua e le Fono Aoa le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono Tau Faaofi.

Tulai mai lau Afioga i le Tiataifono o le Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa.

Tofa TUISA TASI PATEA (Taitaifono Komiti o Mataupu tau Faamasinoga, Leoleo & Falepuipui ma Faamasinoga o Fanua ma Suafa): I le ava ma le faaaloalo lau Afioga i le Fofoga Fetalai, ou te faatu le lafo, *Ina ia faamaonia e le Fono Aoa le Lipoti a le Komiti o lo o fautuaina ai, Ina ia faagasolo le Tulafono Tau Faaofi o le Faauigaina o Tulafono 2015 faatasi ma Teuteuga.*

Faaluaina e le sui usufono mo Palauli, le sui usufono mo Falelatai & Samatau, le sui usufono mo Gagaifomauga Nu. 2, le sui usufono mo Alataua Sisifo, ma le sui usufono Gagaifomauga Nu. 1.

Na faamaonia le lafo.

FOFOGA FETALAI: E faasilasila atu ua faamaonia nei e le Fono Aoa le Lipoti a le Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa i le Tulafono Tau Faaofi o le Faaugaina o Tulafono 2015.

O le a sagai atu loa le Fono Aoa i le Iloiloga Auiliili o le Tulafono Tau Faaofi o le Faaugaina o Tulafono 2015.

E tusa ai ma le Tulafono Tumau 102, e amata le Iloiloga Auiliili o le Tulafono Tau Faaofi i le Fuaiupu 2.

FUAIUPU 2: Faaaogāina.

Faamaonia.

FUAIUPU 3: Faamatalaga.

FOFOGA FETALAI: O lo o i ai le Teuteuga a le Komiti i le Fuaiupu 3 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Tofa TUISA TASI PATEA: Lau Afioga i le Fofoga Fetalai ou te faatu le Teuteuga i le Fuaiupu 3 e faapea:

“TEUTEUGA:

i) Fuaiupu 3

Ina ia suia le upu “o” i le upu “po o” ina ia faitauina ai le fuaiupu 3 e faapea:

“soligatulafono” o lona uiga o se gaoioiga po o se mea ua lē faia lea e ono mafai ona faasalaina ai se tagata i lalo o se Tulafono po o se tulafono.”

FOFOGA FETALAI: Ia se i tulai mai le sui usufono mamalu mo Faleata Sisifo.

Tofa LEALAILEPULE RIMONI AIAFI (Faleata Sisifo): Faafetai i lau Afioga mo le avanoa, faatalofa atu foi i le Fonousu a Samoa lea ua aofaga potopoto nei i Faleata. E leai se mea e toe popole ai, o le itumalo e pupula pei o le la, pei ona saunoa le Afioga i le Palemia, e faapea le pupula o Faleata, pupula o le la i le ao ma matagofie mea uma. Ia ou te fia fesili i le vaega lea o le Tulafono Tau Faaofi i le faauigaina o le upu lea tagata matua, lea e faapea mai, o se tagata ua 21 tausaga le matua pe sili atu.

O lau fesili i lau Afioga i le Taitaifono ma le Komiti, ona o lea ou te fiu e tau vaai se faauigaina o se upu i tausaga foi ia o tamaiti, ona e tele le feeseesea’i i le tele o Tulafono. Po o lona uiga la i le faauigaina lea ua aumai

nei o tamaiti amata mai i le 21 i lalo ifo o tausaga aua o lea ua tagata matua i luga atu o le 21.

FOFOGA FETALAI: O lea ua maua le finagalo o le sui usufono, tulai mai lau Afioga i le Taitaifono.

Tofa TUISA TASI PATEA: Ia o le faamalamalamaga lena o lo o i ai i totonu o le Tulafono 21 tausaga agai i lalo, ia o le faaliliuina foi lena. Ou te masalo a e faitau i le faa-Peretania o lena lava e manino o le infant e 21 tausaga agai i lalo, e le o afaina ai se Tulafono o lo o i ai isi pei ona e taua. Ae o le agaga lena o le Tulafono, e 21 tausaga agai i lalo, o le faamaninoina lena.

FOFOGA FETALAI: Se i tulai mai le Afioga i le Palemia.

Susuga Hon TUILAEPA FATIALOFA AUELUA LUPESOLIAI NEIOTI SAILELE MALIELEGAOI: Lau Afioga i le Fofoga Fetalai, o le taua ia o le faauigaina lea o le tagata matua i le agai atu i tamaiti i lalo ifo o le 21, e ogatasi ai tatou ma le tele o Malo i fafo. O le taua o le tulaga lea, afai e te fai toalua i lou 17 tausaga, e 17 tausaga fanau lou toalua, 18 tausaga toe fanau lou toalua, toe 19 toe fanau, 20 toe fanau ua toafa lau fanau. Ae sau loa lou aunty i o manao e vaetama oe, ia fai lava lea o pepa e vaetama oe o lou toalua ma lau fanau, ia ona mafai loa lea ona e alu i Niu Sila po o Ausetalia, o tamaiti uma lava, ia se i vaai i ai i le maoo'e. O le isi lea auala o lo o avanoa ai o tatou tagata e mafai ona saili le avanoa mo le olaga fou i isi atunuu i latou o fia malaga i fafo e faigofie ai la mea faapea, ona o le faauigaina lea o le Tulafono o tamaiti uma lava, aua e le mafai ona e vaetama tagata ua matutua. Ae o le manaia lena o le mea, e vaetama atu oe o lou toalua ma lau fanau e toafa, ia ua toaono, ia se i vaai i le manaia o lena mea. E le faapea la o se auala foi lele piopio, a o auala lava e alu i luga o le Tulafono e ogatasi ai tatou ma atunuu i fafo. Ma ua o'o mai ia te au le faamatalaga, fai mai le lauga a le isi Palemia o Niu Sila, sole ua tele tausaga e le o iloa e matou le mea lea. Ae o le faiai foi o le isi Loia Samoa i Niu Sila na amata le mea lea i Niu Sila o le vaetama atu o aiga atoatoa nei ae faatoa tete'i ai lea, o infants uma lava e tau lava i luga e toe tasi le aso 21. Lau Afioga i le Fofoga Fetalai, e i ai lava itu lelei, e le o ni mea o le Tulafono lena e faauiga faaetulafono e le faapea e ese ai tatou, o lea lava e ogatasi tatou ma le tele o atunuu i fafo. E le mafai la ona tuuaia tatou i le faitogafiti.

Lau Afioga i le Fofoga Fetalai ia o le toe faaopoopo atu lena.

FOFOGA FETALAI: Malo faafetai, e manatu ua manino ma malamalama.

Tofa Lealailepule Rimoni Aiafi: Lau Afioga i le Fofoga Fetalai....

FOFOGA FETALAI: Ia se i tuu atu muamua la le avanoa i le sui usufono mo Faleata Sisifo, faauma mai lau pitolaau le sui usufono mo Faleata Sisifo ona avatu lea o le avanoa i le Taitai o le Itu Agai.

Tofa LEALAILEPULE RIMONI AIAFI: Faafetai. O le ala lea o le fia fesili ona o tatou Tulafono e eseese ia tausaga ia e tuu i mea tau infants, a? Ia

afai la lea ua faapea mai e 21 agai i lalo aua o le mea o lea ua aumai e faalauaugatasia uma ai Tulafono. A o lea la ua faamalamalama mai e le Palemia le isi mafuaaga na ala ai ona faa-Infant le 21 ia vave faaipoipo i le 18 ma fanafanau, ia ona o ai loa lea i fafo, ia o le aoga la lena.

Susuga Hon TUILAEPA FATIALOFA AUELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai o lea e sese le faamalamalama, e le o le uiga lena na ala ai ona fai. A o le tulaga na ala ai ona fai, ia ogatasi lava tatou ma tulaga ia, ae pau lava o uiga o mea na, e i ai lava le suiga ae i ai foi ona taunuuga lelei. Ae le faapea na faia le Tulafono o le faamoemoe lena.

FOFOGA FETALAI: Malo, ia lau Afioga i le Taitai o le Itu Agai.

Afioga Hon PALUSALUE FAAPO II (Taitai Itu Agai): Faafetai lava mo le avanoa i lau Afioga i le Fofoga Fetalai. E tulai atu ma lou faaloalo, ona e i ai lou talitonuga i mea ia e saunoa i ai le Palemia, aua o Tulafono mai fafo o lea ou te iloa, e fai loa lou toalua e le toe tauina oe o se infant, e tusa lava pe ua uma ona liliu oe. E le mafai ona toe talia e Niu Sila ma Ausetalia pe afai ua fai lou aiga ma fai lau fanau. O le mea foi lea ou te popole ai, e le i faia e isi atunuu le mea lea e saunoa i ai le Palemia, ne i te i ua liliu mai ia Asia ma omai tai sefulu tai toa sefululua ma agai ina tumutumu ai lo tatou atunuu. A o le mea lea ou te fai atu ai, e leai e le o toe talia e atunuu i fafo le mea lea, e fai loa lou aiga e le toe taua oe o se infant.

Susuga Hon TUILAEPA FATIALOFA AUELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai, ou te faamalo lava i le alii loa mai Niu Sila. O lea ou te tautala atu i mea o lo o tutupu, aemaise foi o le Ofisa lea, e alualu lava lea tulaga faigata i tatou tagata, e ese le atamamai o tatou tagata, ae i ai le mea foi lele e taamilo taamilo lava le paa, ae i ai lava le kesi e alu atu nofo ai, o le kesi la a au e nofo ai le taamiloga lea o faafitauli o faafeagai ma o tatou tagata, e le faapea la ua tuua o la e fai. Ae ou te le iloa la po o fea e taamilo mai ai lea loa mai Niu Sila ma ana ia foi manatu.

FOFOGA FETALAI: Ia lau Afioga i le Sui Fofoga Fetalai.

Tofa AGAFILI PATISELA ETEUATI TOLOVAA (Sui Fofoga Fetalai): Lau Afioga i le Fofoga Fetalai o se mea e fia faamalamalama.

FOFOGA FETALAI: Se i tulai mai le sui usufono.

Tofa AGAFILI PATISELA ETEUATI TOLOVAA: O le tulaga lea na saunoa i ai le Afioga i le Palemia faapea foi le faaliga a le Afioga i le Taitai o le Itu Agai. Ua leva ona ou faigaluega ai i le vaega tonu lea e lesitala ai ia tamaiti liliu faale-Tulafono. O le tonu ma le sao lea na saunoa i ai le Afioga i le Palemia, pe fai lou toalua pe leai ae le i atoa lou 21 tausaga, e mafai lava ona liliu faale-Tulafono oe, pe toe tasi foi le aso atoa lou 21, ae sainsi loa le Faamasino ua faamaonia le liliuga faale-Tulafono, e mafai lava ona fai. A o le Tulafono a Niu Sila o lo o i ai, e mafai ona liliu oe e lei atoa lou 21, ae

mafai ona e alu atu i Niu Sila e le i atoa lou 24 tausaga, o lona uiga a liliu oe ae la e 21 ou tausaga pe le i atoa, e mafai lava ona e nofo iinei i Samoa se i atoa lou 24 tausaga ona e malaga lea i Niu Sila. O le faamalamalamaga lea ma le faaaloalo.

FOFOGA FETALAI: Malo, faafetai ua manino le mataupu.

Afioga Hon PALUSALUE FAAPO II: Lau Afioga i le Fofoga Fetalai, e matua sese foi le faamalamalamaga a le loia ia, le Afioga i le Sui Fofoga Fetalai, se leaga o le mea na tupu, lea ou te tautala atu ai, ioe, o le tagata na liliu ae le i faia se toalua, peitai na fai loa lona aiga taumafai atu e fai le sitiseni e le mafai leaga lea ua fai le aiga.....

FOFOGA FETALAI: O lea ua maua lou finagalo, ia malie ia, o lea foi e sao le mean a tupu lea e te saunoa i ai, ae o le Tulafono lava ia o le 21, le ala lena o le faamaninoga, aua e le tasi se mea e tupu mai lea taimi i lea taimi, o lea foi na saunoa mai le Sui Fofoga Fetalai, ia e matautia le gasu lea sa feagai ai, o le ala lea o le fai o le Tulafono.

Faamaonia le Teuteuga.

Faamaonia le Fuaiupu 3 e pei ona Teuteuina.

FUAIUPU 4: E faaaogā faamatalaga i totonu o Tulafono i tulafono laiti.

Faamaonia.

FUAIUPU 5: Kerena, aofaiga ma faatulagaga o le gagana.

Faamaonia.

FUAIUPU 6: Faasinomaga i le Kaseti e aofia ai Savali.

Faamaonia.

FUAIUPU 7: Taiala faavae o le faamatalaina o uiga o upu.

FOFOGA FETALAI: O lo o i ai le Teuteuga a le Komiti i le fuaiupu 7 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono.

Tofa TUISA TASI PATEA: Lau Afioga i le Fofoga Fetalai, ou te faatu le Teuteuga i le fuaiupu 7 e faapea:

“TEUTEUGA:

ii) Fuaiupu 7

Ina ia aveese upu “faamatalaina o uiga o upu” ma suia i upu “faamatalaina o le uiga o upu” ina ia faitauina ai le fuaiupu e faapea:

“7. Taiala faavae o le faamatalaina o le uiga o upu.”

Faamaonia le Teuteuga.

Faamaonia le Fuaiupu 7 e pei ona Teuteuina.

FUAIUPU 8: Faamatalaina o uiga o upu “tatau” ma le “mafai.”

Faamaonia.

FUAIUPU 9: Faasilasilaga faa-faamasinoga, vaevaega ma vaega o Tulafono.

Faamaonia.

FUAIUPU 10: Faasinomaga i aiaiga o se Tulafono.

Faamaonia.

FUAIUPU 11: Lomiga faa-Peretania ma lomiga i le Gagana Samoa o Tulafono.

Afioga Toeolesulusulu Cedric Pose Salesa Schuster (Aana Alofi Nu. 3):
Lau Afioga i le Fofoga Fetalai....

FOFOGA FETALAI: Tulai mai lau Afioga i le sui usufono mo Aana Alofi Nu. 3.

Afioga TOEOLESULUSULU CEDRIC POSE SALESA SCHUSTER: Faafetai lau Afioga i le Fofoga Fetalai mo le avanoa. Leai o le faafesili ona o le vaega o le suiga o lo o aumai i le Tulafono e tusa ai foi o le Iloiloga a le Komiti, o lea e faatulaga mai ai e suia i le faamatalaina se i vagana ai o le uluai tusi na faataitai o lo o i le Gagana Samoa. O le fesili e fia malamalama lau Afioga ona o Tulafono o lo o faapea ona pasia e lo tatou Maota nei lau Afioga o lo o i ai uma le faa-Samoa ma le faa-Peretania, ae po o le a la le taimi e taua o le tusiga faataitai o le Tulafono? Afai o lou talitonuga lau Afioga i le Fofoga Fetalai, a pasia i i o le Tulafono lea e faaoga, pe o le mea la e toe foi, a oo ina iloilo i totonu o le fale faamasino, pe toe aumai ia tusiga faataitai, po o drafts ia po o le first drafts i le taimi e tapena ai e le Loia Sili po o le draft e tusia e le Matagaluega e le i faatinoina ia consultation, ona e tele le vaega lea e taua o drafts? Peitai ane, o lou talitonuga lau Afioga i le Fofoga Fetalai, seiloga ua pasia i totonu o le Maota, ona taua lea o se Tulafono, a o Tulafono foi ua pasia i totonu o le Maota, ua i ai le faa-Samoa ma le faa-Peretania.

FOFOGA FETALAI: Ua maua le finagalo o le sui usufono, tulai mai le Taitaifono.

Tofa TUISA TASI PATEA: Faafetai mo le fesili. O le tulaga e pei ona i ai le tatou tatou faavae, e tutusa lava le taua o Gagana uma e lua, ae peitai e i ai le faasiliga o le Gagana faa-Peretania, o lea la ua i ai le suiga, a faapea e pei ona faitau i ai i le suiga lea, a i ai se feeseeseaiga i Gagana nei e lua, ia e ave le faamuamua i le taimi na fausia ai le Tulafono. A faapea o le Gagana Samoa na faatino ai le taumafaiga o le faataitai o le Tulafono, o lona uiga e ave le faamuamua. O lo o i ai foi i totonu o le tulaga lea le sipili o le Tulafono ma le intention o latou na faia le Tulafono ma faatinoina le Tulafono, ia e taua la le tulaga foi lea, ae pei o le gagana na tusia muamua ai, ia o lena e avatu e le Tulafono, ua i ai sina suiga laititi, ua faataua ai le tatou Gagana faa-Samoa.

FOFOGA FETALAI: Malo. Ia lau Afioga i le sui usufono.

Afioga TOEOLESULUSULU CEDRIC POSE SALESA SCHUSTER: Lau Afioga i le Fofoga Fetalai. E i ai sina popolega o lou sui usufono, ona e le o manino mai i totonu o le vaega lea, po o le a le vaega o le draft e pei ona avatu ai foi se faafesili. O lou talitonuga, e ao ona faaogaina Tulafono ua pasia i totonu o le Maota, a tuu atu i tua i se tulafono na fuafua ae le i pasiaina e le Maota, e tele faauigaina, tele vaega o lea e tele ina ono toe sui i le vaega mulimuli e faaoo mai i totonu o le Palemene, ma e i ai lou talitonuga lau Afioga ae tusa ai, e talitonu, e le tataua ona i ai lea vaega ona e tele foi le numumi o le a i ai i le aso i luma o le a faatinoina ai le Tulafono.

FOFOGA FETALAI: O lea ua maua le finagalo, lea ua maua le finagalo o le sui usufono, ma e manatu e le se mea fou le mea lea. A alu alu tualumaga o le Faamasinoga ua le gafataulimaina le interpretation, ona tatou toe foi lava lea i le drafting, o le mea masani, e aumai uma lava drafting na feagai ai le afuafuaina o le Tulafono po o le Ofisa o le Fono po o fea lava na amata ai le Tulafono, e agai foi i drafting a le Loia Sili. O i ina e maua ai, e pei o lea na saunoa le Taitaifono o lena e maua uma ai le intention na ala ai ona tusi le

Tulafono, pe a faapea ua alu alu se taualumaga o se faamalamalamaina o le Tulafono i se Faamasinoga, o i ina e maua ai le auga o aute o le toe foi i tulaga ia, ma e manatu o le tulaga lautele drafting is drafting, e aofia uma ai ia latou na afuafuaina le Tulafono.

Lau Afioga i le Taitaifono.

Tofa TUISA TASI PATEA: Ia na ona faaopopo lau Afioga i le Fofoga Fetalai, o lea foi faaiuga sa mafua ona o nisi o faaiuga a le Faamasino Sili o nisi o Faamasinoga a lo tatou Ofisa o Faamasinoga na faia, ia lea pei na aumaia ai le faaiuga foi lea ina ia tilotilo totoa i le amataga mai o se mataupu, a faapea na tusia i le Gagana Samoa, o lona uiga e tatau ona ave le faamuamua i le Gagana Samoa.

FOFOGA FETALAI: Ia e tasi lena tulaga e tatau pea ona faamalamalama leaga o nei taimi uma sa tatou fai tulafono ai e faaoga le Gagana Peretania, a o lea e taumafai nei e faaoga pea le tatou Gagana e lelei e talafeauga ma le tu ma le aga o Gagana ma kalama faa-Samoa. O nisi foi taimi ua le mafai e le Gagana Peretania ona faamalamalama le aano o le faa-Samoa. Ae lafo pea i le matafaioi a le Loia Sili ma latou o lo o faia Tulafono lea lava tatou te faufau e aumaī avatū, o le tulaga sagatonu e le o i ai se faafitauli tele faapea ua tulai mai se le malamalama tele, na o nai mea laiti a o lo o tau faamanino.

Tulai mai le sui usufono mo Faleata Sasae.

Tofa AVEAU TUALA LEPALE NIKO PALAMO (Faleata Sasae): Lau Afioga i le Fofoga Fetalai, leai o lena ua manino lau faamalamalama. E pau lava le mea na ou fia malamalama ai, ona e silafia foi e le mamalu o le Fonotaga e le o mafai e tagata taitoatasi ona oo agai i le drafting lea, o le faaupuga lea, pau le mea lea e faitau ai tagata o le Tulafono, a soli la le Tulafono e le o i ai se malamalamaaga o tagata. E pei o le mea lena e ala ai ona ou tulai atu i le uiga o le vaega lea, e tatau lava ona faamanino mai le vaega lea, pe o le a le mea ua ala ai ona alu i le faa-Samoa le vaega lea, ma le faaaloalo lava.

Tofa TUISA TASI PATEA: Lau Afioga i le Fofoga Fetalai, o lena e manino le.....

FOFOGA FETALAI: Malie le Taitaifono, se i tulai mai le Afioga i le Palemia.

Susuga Hon TUILAEP A FATIALOFA AUELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai, o lena e manino lava o le tele lava o a tatou Tulafono e tusi i le Gagana Peretania, ma o mafauauga foi faa-Peretania lea e limataitaiina ai le Loia na tusia le Tulafono, ae e i ai taimi e alu alu ai ona faa-Samoa foi lea o Faamasinoga. O lea ou te manatua le isi Faamasinoga sa valaau mai ai ou te alu atu, ia ona alu alu lava lea o le Faamasinoga, o le mea lea e talanoa o le mau lea ou te avatua e eseese ma le mau tusitusia, ia ona fesili mai lea o le Faamasino i le Gagana faa-Samoa, o le a le mea e eseese ai mea ia e lua? Ia ona ou tali foi lea faa-Samoa. O le mea lena e afua mai i le Gagana Samoa foi lele muagagana o le lape o upu, na ona alu atu lava o le lape o upu, lulu mai

loa ma le ulu o le Faamasino Sili o lea ua malamalama, ae ou tilotilo atu i Loia nei, ua matua ninimo le lalolagi i Loia, aua foi e le masani ona saofafai i totonu o fonu a nuu ma faalogo i le upu lea, o le faaupuga lena e afua mai i le lape o upu, ia uma loa ma le Faamasinoga fai ma le Iuga, malo le Malo.

Lau Afioga i le Fofoga i le Fetalai, o le tulaga lena, e i ai lava le taimi e alualu ai uma le faa-Peretania ae sau loa le faa-Samoa.

FOFOGA FETALAI: O lo o i ai le Teuteuga a le Komiti i le fuaiupu 11 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Tofa TUISA TASI PATEA: Lau Afioga i le Fofoga Fetalai ou te faatu le Teuteuga i le fuaiupu 11(2) e faapea:

“TEUTEUGA:

iii) Fuaiupu 11(2)

Ina ia faaofi upu “se i vagana ai o le uluai tusiga faataitai o lo o i le gagana Samoa” ina ia faitauina ai le (2) e faapea:

(2) Afai e tulai mai se eseese i le va o lomiga faa-Peretania ma le Gagana Samoa o se Tulafono, e mausali le lomiga i le faa-Peretania se i vagana ai o le uluai tusiga faataitai o lo o i le Gagana Samoa.”

Faamaonia le Teuteuga.

Faamaonia le Fuaiupu 11 e pei ona Teuteuina.

FUAIUPU 12: Faaofiina o le aso e tuuina i ai le maliega i Le Ao o le Malo.

Faamaonia.

FUAIUPU 13: Aso e amata faamamaluina ai le Tulafono.

FOFOGA FETALAI: O lo o i ai le Teuteuga a le Komiti i le fuaiupu 13 e pei ona faaalua i le Pepa Faaopoopo o Galuega.

Tulai mai le Taitaifono o le Komiti.

Tofa TUISA TASI PATEA: Lau Afioga i le Fofoga Fetalai, ou te faatu le Teuteuga i le fuaiupu 13(5) e faapea:

“TEUTEUGA:

iv) Fuaiupu 13

Ina ia aveese le fuainumera “36” i le fuainumera “35” ina ia faitauina ai le (5) e faapea:

“(5) O le malosiaga i lalo o se Tulafono e filifilia ai se aso e amata faamamaluina ai, e lē faatagaina ai le filifilia o se aso e amata faamamaluina i se taimi ua tuanai, ma e na o le faa-tasi lava ona faatino le malosiaga, seia vagana ai ua faasaoina o se mea sese po o se mea ua le faia i lalo o le fuaiupu e 35.”

Faamaonia le Teuteuga.

Faamaonia le Fuaiupu 13 e pei ona Teuteuina.

FUAIUPU 14: Taimi e amata faamamaluina ai.

Faamaonia.

FUAIUPU 15: E lē tau faasalalauina Tulafono i le Kaseti.

Faamaonia.

FUAIUPU 16: O le taua o le Tulafono.

Faamaonia.

FUAIUPU 17: Faasinomaga i ata lomina o Tulafono.

Faamaonia.

FUAIUPU 18: O le taua o Tulafono e aofia ai teuteuga ma upu muamua ma upu mulimuli.

Faamaonia.

FUAIUPU 19: Teuteuga.

Faamaonia.

FUAIUPU 20: Faamamaluina o teuteuga.

Faamaonia.

FUAIUPU 21: E lē toe faaaogāina faaletulafono se Tulafono ua soloia.

Faamaonia.

FUAIUPU 22: Faaaogāina o mea ua soloia.

Faamaonia.

FUAIUPU 23: Aloaia o mea ua soloia i soligatulafono na faia muamua ma le soliga o tulafono.

Faamaonia.

FUAIUPU 24: Malosiaga i totonu o Tulafono ua soloia e Tulafono ua tuufaatasia.

Faamaonia.

FUAIUPU 25: Aafiaga o le soloia o Tulafono.

Faamaonia.

FUAIUPU 26: Faasinomaga i se Tulafono ua soloia i totonu o se Tulafono.

FOFOGA FETALAI: O lo o i ai le Teuteuga a le Komiti i le fuaiupu 26 e pei ona faaalāia i le Pepa Faaopoopo o Galuega. Tulai mai le Taitaifono o le Komiti.

Tofa TUISA TASI PATEA: Lau Afioga i le Fofoga Fetalai ou te faatu le Teuteuga o le fuaiupu 26(1) e faapea:

“TEUTEUGA:

v) **Fuaiupu 26(1)**

Ina ia faaofi upu “(“o le Tulafono”)” i le tuanai ai o upu “o se Tulafono” ina ia faitauina ai le (1) e faapea:

- (1) **O se faasinomaga i totonu o se Tulafono (“o le Tulafono”) i se Tulafono po o se aiaiga ua soloia, o le a faauigaina e faapea o lo o faasino i se Tulafono o mulimuli ane ai po o se aiaiga, o se Tulafono (“o le Tulafono”) na pasia e sui ai le Tulafono ua soloia po o se aiaiga.”**

Faamaonia le Teuteuga.

Faamaonia le Fuaiupu 26 e pei ona Teuteuina.

FUAIUPU 27: Faataunuaina o malosiaga a o lumanai ai le amata faamamaluina o Tulafono.

Faamaonia.

FUAIUPU 28: Tulaga o malosiaga ma malosiaga e lē tau faailoaina.

Faamaonia.

FUAIUPU 29: Malosiaga e lē tau faailoaina e faatonutonu ai faaletulafono.

Faamaonia.

FUAIUPU 30: Tofiga e ala i le igoa po o le tofi.

Faamaonia.

FUAIUPU 31: Malosiaga e tofia ai.

Faamaonia.

FUAIUPU 32: Faatinoina o malosiaga i tulaga faapitoa e aliae mai.

Faamaonia.

FUAIUPU 33: Faatinoga o malosiaga o le Minisita.

Tofa Lealailepule Rimoni Aiafi: Lau Afioga i le Fofoga Fetalai.....

FOFOGA FETALAI: Tulai mai le sui usufono mo Faleata Sisifo.

Tofa LEALAILEPULE RIMONI AIAFI: O le vaega lea e 33, Faatinoga o malosiaga o le Minisita, ona o lea e faapea mai, e mafai ona faatinoina e se isi Minisita ese mai le Minisita lea, pe a le o mafai ona faatinoina e le Minisita e ana le Tulafono. A o le fesili, pe le ono faaaogaina ai ia Minisita Lagolago, e patino tonu i le vaega lea aua o latou lea o lea e lava le malamalama? Aua a faitau i lalo ifo o le vaega 43 i le tuuina atu o malosiaga, o lena la e faataga ai i ina i le vaega lena o le Tulafono, e fai ai i ina le faataga a le Minisita ona tuuina atu i le Minisita Lagolago ia le malosiaga lea. O lea la e le o faatagaina i le vaega 43, pe i ai se mafuaaga, po o le mea o le lē agavaa.

FOFOGA FETALAI: O lea ua maua le fesili. Tulai mai lau Afioga i le Taitaifono.

Tofa TUISA TASI PATEA: Faafetai mo le fesili. Ia o le tali atu, e pule lava le Afioga ia i le Minisita, o lana ia lena matafaioi, ae i ai foi le taimi e silasila atu ai ma tagai atu le Minisita, e faale o lelei foi le Minisita Lagolago, ia ua tatau foi ona sui se isi, faafetai.

FUAIUPU 34: E mafai ona fofogaina talosaga tetee e se tagata agavaa.

Faamaonia.

FUAIUPU 35: Malosiaga o le Kapeneta.

Faamaonia.

FUAIUPU 36: Malosiaga e faasao ai se mea sese.

Faamaonia.

FUAIUPU 37: Malosiaga ma tiute tauave o faalapotopotoga ua tuufaatasia faaletulafono.

Faamaonia.

FUAIUPU 38: Sui e auauai ma sui e suitulaga, faamavaega ma fautuaga tau tomai faapitoa.

FOFOGA FETALAI: O lo o i ai le Teuteuga a le Komiti i le Fuaiupu 38 e pei ona faaalua i le Pepa Faaopoopo o Galuega.

Tulai mai le Taitaifono o le Komiti.

Tofa TUISA TASI PATEA: Lau Afioga i le Fofoga Fetalai ou te faatu le Teuteuga i le Fuaiupu 38 e faapea:

“TEUTEUGA:

vi) Fuaiupu 38

Ina ia faaofi le faafuuiupu (2) fou ae faatulaga le faafuuiupu (2) o lo o i ai e avea ma faafuuiupu (3) ina ia faitauina ai le (2) & (3) e faapea:

- (2) **Afai ua aiaia e se Tulafono se sui auai ona o le tofi, a se faalapotopotoga ua tuufaatasia faaletulafono po o se faalapotopotoga e le o tuufaatasia faaletulafono ua faavaeina e se Tulafono:**
 - (a) **e mafai, ona tofia e le pulega e faia tofiga, se sui e auauai, mo le sui auai ona o le tofi; po o**
 - (b) **e mafai, e le sui auai ona o le tofi ona faia i se faiga tusitusia, le faatuina o se tagata e galue, pe afai ua le mafai e le sui auai ona tauaveina galuega tauave a le sui auai,ona o so o se mafuaaga.**
- (3) **O le sui auai e fesui ai po o le sui auai o suitulaga, ua faatatauina e avea o se sui auai o le faalapotopotoga pe afai e auai o ia i se fonotaga a le faalapotopotoga.”**

Faamaonia le Teuteuga.

Faamaonia le Fuaiupu 38 e pei ona Teuteuina.

FUAIUPU 39: Taitaifono ma le Failautusi.

Faamaonia.

FUAIUPU 40: Sainia o pepa aloaia.

FOFOGA FETALAI: O lo o i ai le Teuteuga a le Komiti i le Fuaiupu 40 e pei ona faaalua i le Pepa Faaopoopo o Galuega.
Tulai mai le Taitaifono o le Komiti.

Tofa TUISA TASI PATEA: Lau Afioga i le Fofoga Fetalai ou te faatu le Teuteuga i le Fuaiupu 40 e faapea:

“TEUTEUGA:

vii) Fuaiupu 40

Ina ia faaofi upu “ua faavaeina e se Tulafono” i le tuanai ai o upu “faalapotopotoga ua tuufaatasia faaletulafono po o se faalapotopotoga e le o tuufaatasia faaletulafono” ina ia faitauina ai le fuaiupu 40 e faapea:

40. O se pepa aloaia, pepa faamaonia faaletulafono po o tulafono laitiiti lea e manaomia ina ia faia e se komiti faatino po o se faalapotopotoga ua tuufaatasia po o e le o tuufaatasia faaletulafono ua faavaeina e se Tulafono, e mafai ona sainia e le taitaifono po o le sui taitaifono po o pe afai ua le mafai ona sainia e i laua uma e toalua, e mafai ona sainia e se sui auai.”

Faamaonia le Teuteuga.

Faamaonia le Fuaiupu 40 e pei ona Teuteuina.

FUAIUPU 41: Fonotaga ma le vaega aupito toatele o sui auai.

Faamaonia.

FOFOGA FETALAI: O lo o i ai le Teuteuga a le Komiti i le Fuaiupu 41 e pei ona faaalua i le Pepa Faaopoopo o Galuega.

Tulai mai le Taitaifono o le Komiti.

Tofa TUISA TASI PATEA: Lau Afioga i le Fofoga Fetalai ou te faatu le Teuteuga i le Fuaiupu 41(1) e faapea:

“TEUTEUGA:

viii) Fuaiupu 41(1)

Ina ia faaofi upu “ua faavaeina e se Tulafono” i le tuana'i ai o upu “faalapotopotoga ua tuufaatasia faaletulafono po o se faalapotopotoga e le o tuufaatasia faaletulafono” ina ia faitauina ai le fuaiupu 41(1) e faapea:

- (1) E faaoga tulafono faafoe ua taua i se fonotaga a se faalapotopotoga ua tuufaatasia faaletulafono po o e le o tuufaatasia faaletulafono ua faavaeina e se Tulafono.”

Faamaonia le Teuteuga.

Faamaonia le Fuaiupu 41 e pei ona Teuteuina.

FUAIUPU 42: E le aafia malosiaga i se avanoa po o tulaga faaletonu.

FOFOGA FETALAI: O lo o i ai le Teuteuga a le Komiti i le Fuaiupu 42 e pei ona faaalua i le Pepa Faaopoopo o Galuega.

Tulai mai le Taitaifono o le Komiti.

“TEUTEUGA:

ix) Fuaiupu 42

Ina ia faaofi faafuaiupu (3) & (4) fou e faapea:

- (3) E lē faaogaina le faafuaiupu (2)(a) pe afai e aafia le fonotaga i le aofaiga o tagata e lē agavaa ona auai pe auai i le fonotaga.

- (4) **E lē faaaogaina le faafuaiupu (2)(b) pe afai e i ai se tulaga faaletonu o aafia ai se vaega toatele o sui o lo o auai i le fonotaga.”**

Tofa Aveau Tuala Lepale Niko Palamo: Lau Afioga i le Fofoga Fetalai....

FOFOGA FETALAI: Tulai mai le sui usufono mo Faleata Sasae.

Tofa AVEAU TUALA LEPALE NIKO PALAMO: Faafetai mo le avanoa i lau Afioga i le Fofoga Fetalai, e muamua ona ou faafetai i le Komiti ma le Ofisa o le Loia Sili ua i ai le suiga lea ua tuu mai lalo o le Tulafono lea pei ona talosagaina foi. Ae ua faafesili lava le faauigaina o le (b) lea e sau ai le faasaoga lea, aua a tagai i i i le Tulafono tuai o lea e faapea mai i le (b) se tulaga faaletonu i totonu o tofiga, tofiga foi nei pe a faapea po o ai e maufofi i se faalapotopotoga. O lea la e sau le suiga lea e i i e faapea mai, e le faaaogaina le (b) pe afai e i ai se tulaga faaletonu e aafia ai le toatele o sui, ua toatele sui lea e i ai i i le vaega lea e refer i le toatele o sui o tagata lē auai i totonu o le fonofono, pe e faasino i se itu ua malo ae palota i ai nisi e lē o ni tagata e tataua ona i ai i totonu o le fonofono.

O le vaega lona lua, e faapena foi la i le vaega (a), po o le majority lea e refer i ai, pe refer agai i le toatele o tagata e le o ni sui o le faalapotopotoga, pe refer i le itu ua malo ae ua palota i ai tagata ia?

O le isi vaega o le fesili, pe aisea le mea ua le lavea ai ma le (c) i lalo i i i i le suiga lea ua sau ai i le (a) ma le (b)? O le a le mea ua le tuua i ai le (c) i i? Leaga a tagai foi i ina i le vaega o le (c) lena e fai mai ai, se tulaga faaletonu itiiti i le taloina po o le faatautaiga o se fonotaga. O lea foi la ou te fia malamalama, po o le a le tulaga faaletonu itiiti, pe afai e aafia ai le tagata lea e le o se tagata o le faalapotopotoga?

FOFOGA FETALAI: O lea ua maua, tulai mai lau Afioga i le Taitaifono.

Tofa TUISA TASI PATEA: Faafetai mo le faafesili, e talitonu o lena ua e toe tali lava i le tele lava o au fesili na na e fesili ai. Ae o suiga na e lua lea ua i ai nei o lena ua faaopoopo i ai le vaega 3 ma le vaega 4, e fesoasoani atu ai i le vaega o lo o i luga atu o le 2, pei ona i ai le (a) ma le (b), e faapea foi ma le (c), ou te talitonu o lena ua aiaia uma ai lava fuafuaga na e pei ona i ai ia le 3 ma le 4, e le faaaogaina le faafuaiupu (2) (a) pe afai e aafia le fonotaga i le aofaiga o tagata e le agavaa ona auai i fonotaga. O nai Teuteuga laiti na, aemaise foi le 4, e le faaaogaina le faafuaiupu (2) (b), pe afai o i ai se tulaga faaletonu e aafia ai se vaega toatele o sui o lo o auai i fonotaga. O se tau faamalamalama atu lena.

FOFOGA FETALAI: Malo.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, masalo e le o maua mai e le Taitaifono o le Komiti. O lea e manino lava le vaega lea i i e toatele. A o lau fesili, o le faaiuga, afai e fai se palota foi lele e tofi ai ni sui o se faalapotopotoga, ae pe toalua nisi sui lē auai lea e i ai e le tataua ona i ai i totonu o le faalapotopotoga lea, ae tuu e palota i

le vaega lea ae malo ai le tagata lea o le a peresetene o le faalapotopotoga. E carry la faaiuga na pe leai?

Tofa TUISA TASI PATEA: A lena e manino lava, e le mafai ona faatinoina lena tulaga, pe a faapea o le a aafia ai sui na e le o sui auai.

Faamaonia le Teuteuga.

Faamaonia le Fuaiupu 42 e pei ona Teuteuina.

FUAIUPU 43: Malosiaga tuuina atu ma tiute tauave.

Tofa Lealailepule Rimoni Aiafi: Lau Afioga i le Fofoga Fetalai.....

FOFOGA FETALAI: Tulai mai le sui usufono mo Faleata Sisifo.

Tofa LEALAILEPULE RIMONI AIAFI: O le mafuaaga tonu la lea lau Afioga lea na ou fesili atu ai e toe fia maua se faamalamalamaga a le Afioga i le Taitaifono, ona o lea la e avanoa la i lalo i i i le vaega 43 lea, le malosiaga tuuina atu lea e se Minisita i lana Minisita Lagolago po o nisi lava e mafai ona faatinoina ona tiute. Pe le o i ai la se feteenaiga ma le vaega 43 lea e faapea mai, e na o se isi Minisita e mafai ona faatinoina le malosiaga lea? Afai o lea ua faataga i i, e le afaina, lelei. Ae o lea la e le o mafai, o lea ua tatou tuu i se isi vaega. Po o le a tonu le faamalamalamaga o le vaega lea, ma le faaaloalo lava faafetai.

FOFOGA FETALAI: Tulai mai le Taitaifono.

Tofa TUISA TASI PATEA: Ia ou te masalo o lena e maai uma itu o le peni, e mafai ona kava le isi itu kava foi le isi itu, o le agaga tonu lena o le vaega lena, e pule lava le Afioga i le Minisita mai lea taimi i lea taimi, po o le a le tulaga e tataua ona i ai, e fai i luga o fuafuaga tataua ma fuafuaga lelei ina ia manuia le faaiuga.

FOFOGA FETALAI: Se i tulai mai le Afioga i le Palemia.

Susuga Hon TUILAEPA FATIALOFA AUUEA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai, ina ia manino lelei le tulaga lea, e lelei foi ona faitau le sui usufono i tiute tauave o Minisita Lagolago o lena e matua faamaoti mai lalo o le Tulafono lena, ina ia manino atili ai, e manino atili le mea lea ma malamalama tele i le mea lea pe a toe faitau i le Tulafono ae faamaoti lelei mai ai lava i le Tulafono na pasia i le Paeiga o le 1988 i le 1991, ia tiute faatulaga faale-Tulafono o Minisita Lagolago.

FOFOGA FETALAI: Ia.

Tofa LEALAILEPULE RIMONI AIAFI: Lau Afioga i le Fofoga Fetalai o le mea e fia faamalamalama. O le mea lea ou te faanoanoa ai o le Taitaifono, a e fesili e te fia malamalama, ae a tali mai le Taitaifono, e matuai e le malamalama ai lava, a o le faigofie ia o le faamalamalama o le mea. Aua o le mea ou te ofo ai, o le loia le toeaina, a, o le malosiaga lea e sau ai le isi vaega, a o le delegation of authority, tuuina atu o le malosiaga le isi vaega. O fea la le malosiaga e te uua, a o fea la le malosiaga e te ave, a o le a le taimi e ave ai? A o lea e saunoa mai, e pule lava le Minisita. E le faapena le faiga o mea, e faamanino mai i le Tulafono, a, le taimi e tatau e faaoga ai, e le soona faaoga faatalaloaina le.....

FOFOGA FETALAI: O lea ua maua atu lou finagalo.

Susuga Hon TUILAEPFA FATIALOFA AUELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai, o la e sao le tali atu a le Taitaifono. E pule lava le Minisita, a o le pule la a le Minisita, o la e faatonutonu mai i le Tulafono, le Tulafono e fitoitonu lava i Minisita Lagolago, e le o aumaia i i a o la e i le Tulafono o Minisita Lagolago, o la e sao le tali a le Taitaifono.

Tofa Lealailepule Rimoni Aiafi: Lau Afioga.....

FOFOGA FETALAI: Ua maea avanoa e lua, malilie, ua maea ou avanoa e lua le sui usufono mo Faleata Sisifo?

Tofa LEALAILEPULE RIMONI AIAFI: Leai, aua e lua i i ae tasi i, o lea se i avatu sou manatu i le.....

FOFOGA FETALAI: O lea ua faamalamalama e le Afioga i le Palemia le saunoaga a le Taitaifono, ia malilie sui usufono ua manino le tatou mataupu. Tulai mai lau Afioga i le Taitaifono.

Afioga Hon Palusalua Faapo II: Lau Afioga i le Fofoga Fetalai....

FOFOGA FETALAI: Se i avatu muamua le avanoa i le Taitaifono lau Afioga i le Taitai o le Itu Agai ona e.....

Afioga Hon Palusalua Faapo II: Lau Afioga i le Fofoga Fetalai o se mea e fia faamalamalama.

Tofa TUISA TASI PATEA: Lau Afioga i le Fofoga Fetalai, e fai sina mamafa o lafoga a le Afioga i le sui usufono mo Faleata Sisifo, a o le tele o taimi, e pei foi lea e musumusu ane i ai le matou loia lena e i autafa, ma sese atu ai lava ma si sui usufono mamalu, ae faamalulu atu i lau Afioga i le ... o upu lava foi ia e masani ai, e ese lava foi le... ae ese lava foi le... you know... ia ta te musu lava e fai atu se tala, ne i te i ua... Ae...

Tofa LEVAOPOLO TALATONU (Gagaemauga Nu. 2): Lau Afioga i le Fofoga Fetalai, ona o lea ua taua lo'u igoa, ae faafetai foi le faatoesega i lou vaivai....

Tofa TUISA TASI PATEA: Ia o lea o le a ou fai atu loa, e lelei lava le poto ae ese foi le faafiapoto. O tala na e tatau ona avatu, aua o le mea lea e i ai nei, o lea lava e malamalama le Tulafono ae tou te manao e toso lava. Faafetai.

FOFOGA FETALAI: Ia aua foi ne i te'e le uluga i lau Afioa i le Taitaifono.

Tofa LEALAILEPULE RIMONI AIAFI: O le mea la lea e igoa o le sui vaivai. A fai atu lou faavalevlea ae oso i le faavalevlea tele.

FOFOGA FETALAI: Malie le sui usufono mamalu Lealailepule, vaai e ese le maota lea ua tatou fono ai, o le faigofie ia ona filiki o le faaiuga i le taimi lenei.

Tofa TUISA TASI PATEA: Ua iloa ai foi lou faavalevlea.....

FOFOGA FETALAI: Malie le sui usufono mamalu le Taitaifono, malie o lea o le a ou faaupua. E ta te fono, ae ia outou alofagia, e fai foi o lena a o lenei, se i tau lauama tootoo mai le tatou Fono ma tausi le tatou mamalu. E moni foi tatou te faalelefulu, a o la e faafofoga le tatou atunuu. Malilie sui usufono, tausi pea le tatou vatapuia ma le tatou vanonofo i tau faatauvaaina se tagata. O aga ia e puipui ai le Nofoa ina ia tausi pea lo outou mamalu aua saunoaga ma tuleiga i totonu o le Maota.

Faamaonia le Fuaiupu 43.

FUAIUPU 44: Tulaga lautele o le tuuina atu o malosiaga.

Faamaonia.

FUAIUPU 45: Taimi faatulagaina.

Faamaonia.

FUAIUPU 46: Fuafuaina o le taimi.

Faamaonia.

FUAIUPU 47: Taimi e le o faamaotiina.

Faamaonia.

FUAIUPU 48: Mamao.

Faamaonia.

FUAIUPU 49: Faasilasilaga faa-faamasinoga.

Faamaonia.

FUAIUPU 50: Igoa ua taua ai ma faasinomaga.

Faamaonia.

FUAIUPU 51: Aiaiga lautele.

Faamaonia.

FUAIUPU 52: Totogifuapauina ma tau faaee atu.

Faamaonia.

FUAIUPU 53: Tulafono faafoe o le faamasinoga.

Faamaonia.

FUAIUPU 54: Faasalaga i tapulaa maualuga ma faasalaga i tulaga faatupulaia.

Faamaonia.

FUAIUPU 55: Faamatalaga o faasalaga.

Faamaonia.

FUAIUPU 56: Soligatulafono e faasaga i faalapotopotoga ua tuufaatasia faaletulafono.

Faamaonia.

FUAIUPU 57: Totogiina o sala tupe ma faasalaga.

Faamaonia.

FUAIUPU 58: Ia lē taofia tualumaga ona o se maliu.

Faamaonia.

FUAIUPU 59: O le faaeeina atu o faasalaga e lē aafia ai se tagi tau le va o tagata.

Faamaonia.

FUAIUPU 60: Mea ua faoa faamalosi.

Faamaonia.

FUAIUPU 61: Faamatalaga molimau.

Faamaonia.

FUAIUPU 62: Faafoeina o se tautoga.

Faamaonia.

FUAIUPU 63: Pepa faatumu.

Faamaonia.

FUAIUPU 64: Faaooina atu o pepa aloaia.

Faamaonia.

FUAIUPU 65: Malosiaga e faia ai faasaoga i totonu o Tulafono.

Faamaonia.

FUAIUPU 66: Faataitaiga.

Faamaonia.

FUAIUPU 67: O Tulafono e lē noatia ai le Malo.

Faamaonia.

FUAIUPU 68: Soloia.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Tulafono o le Faauigaina o Tulafono 2015.

Faamaonia.

Na faagasolo le Tulafono Tau Faaofi o le Faauigaina o Tulafono 2015 faatasi ma Teuteuga.

**TULAFONO TAU FAAOFI O LAFOGA O OLOA GAOSIA MA
GALUEGA FAATINO I LUGA O AOFAIGA O TAU 2015
– iloiloga auiliili**

FOFOGA FETALAI: E tusa ai ma le Tulafono Tumau 106, e tatau ona faamaonia muamua e le Fono Aoa le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono Tau Faaofi.

Tulai mai le Afioga i le Taitaifono o le Komiti o Mataupu tau le Va i Fafu, Fefaatauaiga ma Tupe Maua.

Tofa SOOALO MENE (Taitaifono o le Komiti o Mataupu tau le Va i Fafu, Fefaatauaiga ma Tupe Maua): Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoa le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Lafoga o Oloa ma Galuega Faatino e Faia i Luga o Aofaiga o Tau 2015 faatasi ma Teuteuga.*

Faaluaina e le sui usufono mo Palauli, sui usufono mo Falelatai ma Samatau, se tasi o sui usufono mo Vaimauga Sisifo, Tofa Lenatai Victor Faafoi Tamapua ma le sui usufono mo Sagaga le Falefa.

FOFOGA FETALAI: E faasilasila atu ua faamaonia nei e le Fono Aoa le Lipoti a le Komiti o Mataupu tau le Va i Fafu, Fefaatauaiga ma Tupe Maua i le Tulafono Tau Faaofi o Lafoga o Oloa ma Galuega Faatino e Faia i Luga o Aofaiga o Tau 2015.

O le a sagai atu loa le Fono Aoa i le Iloiloga Auiliili o le Tulafono Tau Faaofi o Lafoga o Oloa ma Galuega Faatino e Faia i Luga o Aofaiga o Tau 2015.

E tusa ai ma le Tulafono Tumau 102, e amata le Iloiloga Auiliili o le Tulafono Tau Faaofi i le Fuaiupu 2.

FUAIUPU 2: Faamatalaina o uiga o upu.

Faamaonia.

FUAIUPU 3: Faamatalaga o “gaioioiga e aafia i lafoga totogi”.

Faamaonia.

FUAIUPU 4: Faamatalaga o “tau talafeagai faamaketii”.

Tofa LEVAOPOLO TALATONU: Lau Afioga i le Fofoga Fetalai, o le Fuaiupu 4 faamolemole.

FOFOGA FETALAI: Tulai mai lau Afioga i le sui usufono mo Gagaemauga Nu.2.

Tofa LEVAOPOLO TALATONU: E fia faafesili atu lava i le Afioga i le Taitaifono ona o le tulaga lava ia i le maketiina o oloa ma tulaga faapena, e i ai le tulaga ua matauina i Niu Sila i mea ia o tatou oloa elei lea ou te tilotilo o lo o faatauina e nisi o faipisinisi i totonu o Aukilani. I lau matau la, o lea ua copyright e le vaega lea tatou elei ia, e pei o le Tulafono lea e ao ai ona matua taofia le vaega lenei aua i lau tilotilo e pei e computerise le faaaogaina e nisi o atunuu o le Pasefika lea latou te faatauina a tatou oloa ia, e pei o le tele lava e leai se competition leaga o lea latou te faaaogaina tulaga lava ia o tatou meafaigaluega iinei e pei o laupapa foi nei e fai ai tatou oloa. Pe ua oo i ai se sailiiliga po o le a se tulaga e tatau ona taofia ai lea vaega i le faatauina lea e

nisi o atunuu o le Pasefika o a tatou lava oloa, ae fesoasoani ai i lo tatou tamaoaiga.

Ma le agaga faaaloalo.

FOFOGA FETALAI: O lea ua maua le agaga o le sui usufono. Tulai mai lau Afioga i le Taitaifono o le Komiti.

Tofa SOOALO MENE: Faafetai mo le faafesili a le sui usufono mamalu. O le tulaga o lo o faafesiligia e uiga i oloa ia lea e faatauina i fafo a tatou, o lea foi e faalogologo atu o lea e aafia mai ai ma le tulaga lea. O le atugaluga lea o le Copyright lea ou te iloa lau Afioga, o le tulaga lea e patino tonu, e i ai foi le isi Tulafono e aafia ai le tulaga lea e nafa ma le Afioga i le Sui Palemia. A o le Tulafono lava lena o lo o agai tonu lava i le tulaga lea i teuteuga o oloa ia tuusaunua pei o le oloa tuusaunua tulaga muamua. E pei o le agaga tonu lena o le tatou Tulafono lena, a o le faafesili ou te iloa o lo o i ai isi Tulafono o lo o aafia ai foi le tulaga lea o le faafesiligia e le sui usufono e tusa ai ma oloa ia e faatau i fafo. Ma lou faaaloalo lava.

Faamaonia le Fuaiupu 4.

FUAIUPU 5: Faamatalaga o “tau”.

Faamaonia.

FUAIUPU 6: Faamatalaga o le “tuuina atu”.

Faamaonia.

FUAIUPU 7: Faaaogaina.

Faamaonia.

FUAIUPU 8: Faaeina atu ma noataga mo Lafoga o Oloa ma Galuega Faatino.

Faamaonia.

FUAIUPU 9: Talosaga mo le faamauina.

Faamaonia.

FUAIUPU 10: Faamauina.

Faamaonia.

FUAIUPU 11: Noataga o se tagata faamauina.

Faamaonia.

FUAIUPU 12: Faalēaogaina o le faamauina.

Faamaonia.

FUAIUPU 13: Oloa tuuina atu ua faatatauina e aafia i lafoga totogi i luga o le faalēaogaina o le faamauina.

Faamaonia.

FUAIUPU 14: Oloa eseese e tuuina atu.

Faamaonia.

FUAIUPU 15: Taimi e tuuina atu ai oloa.

Faamaonia.

FUAIUPU 16: Nofoga o lo o tuuina atu ai oloa.

Faamaonia.

FUAIUPU 17: Nofoga e tuuina atu ai galuega faatino.

Faamaonia.

FUAIUPU 18: Tau aogā o oloa tuuina atu.

Faamaonia.

FUAIUPU 19: Tau aoga o le tuuina atu o galuega faatino faaulufale mai.

Faamaonia.

FUAIUPU 20: Faaaogāina o oloa i tulaga tumaoti po o tuusaunoaga.

Faamaonia.

FUAIUPU 21: Oloa tuai ua toe faatau atu i ni tau pa'ū.

Tofa Lealailepule Rimoni Aiafi: Lau Afioga i le Fofoga Fetalai.....

FOFOGA FETALAI: O le a le Fuaiupu?

Tofa LEALAILEPULE RIMONI AIAFI: O le Fuaiupu 21 lea. Ou te fia faafesili atu i le Afioga i le Taitaifono faamolemole i le vaega lea o oloa toe faatau atu po o second hand goods, i le fuafuaina o le lafoga lea, pe ao pea ona fai se lafoga pe o le a le ituaiga faiga aua e tele ituaiga mea, mea foi nei mai fafo lea e aumai i uta e faatau ai. Po o le a tonu le faiga o le faatinoga o le VAGST i vaega ia faamolemole.

FOFOGA FETALAI: Tulai mai le Afioga i le Taitaifono.

Tofa SOOALO MENE: Lau Afioga e aafia lava vaega ia i aiaiga ua faataoto ai le totogiina o tatou lafoga ia o oloa gaosi ma oloa auina mai po o oloa faatino. O aiaiga lava o lo o faatino e totogiina ai lafoga e tai pei o le mea lea o lo o faataoto atu i le tatou Tulafono lenei i le tulaga lea i le threshold po o le laasaga amata e tatau ai ona totogi a tatou lafoga ia o le VAGST, o lo o alu lava i le aiaiga lena. Afai lava o le tulaga lena e mafai ona ausia e le faipisinisi, pe second hand po o le a lava le ituaiga pisinisi, e totogi lava pe a ausia le tulaga lea ua faataoto atu i le tatou Tulafono. Ma lou faaaloalo lava.

Faamaonia le Fuaiupu 21.

FUAIUPU 22: Aia tatau, filifiliga ma pepa e totogi ai tupe.

Faamaonia.

FUAIUPU 23: Oloa faatau atu e totogi auauai.

Faamaonia.

FUAIUPU 24: Taimi e faaulufale mai ai.

Faamaonia.

FUAIUPU 25: Tau aoga o oloa faaulufale mai.

Faamaonia.

FUAIUPU 26: Faatagaga o se faasiliga o lafoga maua mai.

Faamaonia.

FUAIUPU 27: Faasiliga o lafoga maua mai mo tagata faatoa faamauina.

Faamaonia.

FUAIUPU 28: Fetuunaiga o oloa tuuina atu mulimuli ane.

Faamaonia.

FUAIUPU 29: Vaitaimi o Lafoga o Oloa ma Galuega Faatino.

Faamaonia.

FUAIUPU 30: Tupe totoe o Lafoga o Oloa ma Galuega Faatino e Tatau ona Totogi mo le Vaitaimi o Lafoga o Oloa ma Galuega Faatino.

Afioga Hon Palusalua Faapo II: Lau Afioga i le Fofoga Fetalai....

FOFOGA FETALAI: O le a le fuaiupu?

Afioga Hon PALUSALUE FAAPO II: O le Fuaiupu 30. Lau Afioga i le Fofoga Fetalai, e puupuu lava se fesili lau Afioga i le Taitaifono ona o le tulaga lea o le aufaifaatoaga. E pei ona silafia o lea e tuu mai i i le tupe tapulaa e \$130,000 ona totogi lea o le lafoga. Pe na fai sa outou suesuega, e fia ni aufaifaatoaga o le a aafia ai i le GST lea ia latou talo ia e ave i fafo ma oloa ia e ave i fafo a o lea o le a faaopoopo atu i ai le GST lea, pe na i ai sa outou suesuega? E puupuu a le fesili lau Afioga i le Fofoga Fetalai.

FOFOGA FETALAI: Ia se i tulai mai le Afioga i le Taitaifono.

Tofa AVEAU TUALA LEPALE NIKO PALAMO: Lau Afioga i le Fofoga Fetalai na ona ou fia faaopoopo atu lava semeamanu e le i saunoa mai le Taitaifono.

FOFOGA FETALAI: Ia tulai mai le sui usufono mo Faleata Sasae. O le fuaiupu lava lea e tasi?

Tofa AVEAU TUALA LEPALE NIKO PALAMO: Ia o le fuaiupu lava lea e tasi. O lea ua saunoa le Taitai o le Itu Agai i le isi vaega, ae o le vaega o la outou Lipoti lea sau ai i i le vaega lea, o lea e faapea mai ai la outou Lipoti, o le aveeseina mai i le tuusaunoaga mai lafoga e le o se fua faatatau e siitia ai ni alagatupe maua, o lea tulaga ua faatinoina, ina ia faamalieina aiaiga o le avea ai o Samoa ma sui auai o Faalapotopotoga mo Fefaatauaiga a le Lalolagi lea sa faamamaluina ia Me 2012. E faamaonia lea vaega o le mafuaaga lea o le vaega, ma le faaloalo lava?

FOFOGA FETALAI: Ia tulai mai le Taitaifono.

Tofa SOOALO MENE: Lau Afioga i le Fofoga Fetalai o le faafesili sa tuuina mai e le Taitai o le Itu Agai i le tulaga lea, pe na oo se suesuega a le matou Komiti i le vaega lea i faifaatoaga? Ioe e sao, sa fai suesuega a le matou Komiti i le tulaga ia i faifaatoaga lea o lo o faapea o le a matua aafia aemaise lava i latou lea o le a auina atu ia le talo i fafo. Mo le silafia e lau Afioga ma le Maota, e matua leai lava se aafiaga o tatou faifaatoaga. Muamua, o le tatou laasaga amata lea sa i ai e tatau ai ona totogi le lafoga e \$78,000 tupe sa i ai, o le taimi nei o lea ua \$130,000 le seleni lea ua ausia, ona mafai loa lea ona totogi le lafoga. O lona uiga lau Afioga i le Fofoga Fetalai, e tele ia o lea siitaga o le a mafai ona maua. O le a mafai ona tuuina atu le fesoasoani mo aufaifaatoaga, ae na faamauina foi e le matou Komiti ia le molimau na tuuina mai e le Matagaluega o Tupe, e oo mai i le taimi nei e le o i ai se faifaatoaga ua lesitala atu i lalo o le tatou VAGST, aua na o le pau a le vaega e ono mafai ona ausia le \$130,000 lea, na o le vaega o aufaifaatoaga ia e aveatu oloa i fafo. Mo le silafia e lau Afioga, o tatou oloa ia e aveatu i fafo o lo o exempt po o lo o tuusaunoa e le aafia i lafoga. E le lavea la ia faifaatoaga ia e auina atu latou oloa i fafo i le vaega lea po o le status lea o le exempt, o lona uiga, e leai lava se tupe e totogiina, po o fea lava e oo i ai le tupe maua a le tatou faifaatoaga lea e auina atu ana oloa i fafo, e le mafai lava ona totogia, pe oo lava i le \$300,000 pe \$500,000 pe miliona lana tupe e maua mai i lana talo lea aveatu i fafo, e le totogia lava se VAGST ona o la e ave i fafo. Ae se i vagana ai lava oloa, o lea e faatau i totonu i a tatou maketi i

inei ma faatau i luga o le aualatele, se i tulou le faafogafoga mai foi a le atunuu, e pau na o oloa e mafai ona faamauina i lalo o le vaega lea o le tatou Tulafono. A o le tulaga lava ia i oloa e auina atu i fafo, o le faamatalaga sao lava lena, e leai sa tatou lafoga e totogia, ma le isi mea o lo o i ai foi i totonu o le Tulafono lea o le Income Tax, e leai foi se income tax e totogia e tatou aufaifaatoaga lea e auina atu a latou talo i fafo po o se isi lava oloa. O lona uiga, o le matua tele lava o le faamama avega ua tuuina atu foi i le aufaifaatoaga, aemaise ua faamanuiaina atu ai ma isi aufaipisinisi laiti. Ma lous faaaloalo lava lau Afioga i le Fofoga Fetalai.

FOFOGA FETALAI: Ia tulai mai le sui usufono.

Afioga Hon PALUSALUE FAAPO II: Lau Afioga i le Fofoga Fetalai, o lea ou te faalogologo atu e manino lava le faamalamalama. E moni e le tologiina se lafoga i le taimi e ave ai le talo i fafo, ae a oo loa ina faatino le tupe maua a le faifaatoaga, lea e te saunoa mai pe oo i le miliona e leai se GST e tologiina. A o lea e manino lava i i le Tulafono le \$130,000 i le taimi e faatino ai ia ana tupe maua, o le taimi lena e tologi ai le GST, ioe. O le isi tulaga lau Afioga i le Fofoga Fetalai, o le a la le mea na tuu ai i le Tulafono pe afai e leai se aafiaga.

FOFOGA FETALAI: O lea ua maua lou finagalo lau Afioga i le Taitai o le Itu Agai.

Susuga Hon TUILAEPA FATIALOFA AUELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai, o le faavevesi lava, e soona faavevesi lava ai ona ua lata mai le Palota. E te fiu lava e sue se faifaatoaga e oo i se \$50,000 sana tupe maua i le tausaga, a o lea o le a vevesi ai lava isi nei mea, o le matua faatauvaa o lenei mea. Se le Taitai o le Itu Agai, se ave se isi mea e talitonuina, e le valea uma le atunuu.

Afioga Hon PALUSALUE FAAPO II: Leai lau Afioga i le Fofoga Fetalai leaga o lea ua taatia, lea e manino i le Tulafono, e \$130,000.

FOFOGA FETALAI: O lea ua maua lou finagalo le Taitai o le Itu Agai.

Afioga Hon PALUSALUE FAAPO II: O le a la le mea e ala ai ona tuu i le Tulafono pe afai e leai se mea.

FOFOGA FETALAI: O lea ua maua lou finagalo le Taitai o le Itu Agai, e taua lou finagalo i lou taumafai mai e tulituliloa le \$100 ma ona tupu afe lena, a o la foi e manino le saunoaga a le Taitaifono, se i vagana ua oo i ai, ia ae oo mai i le taimi lenei i le faamalamalama e leai a se faifaatoaga ua laasia lea mea. Ia na o alafua e faataatitia ae manatu o lea e manino lou finagalo faalia.

Afioga Hon PALUSALUE FAAPO II: Lau Afioga i le Fofoga Fetalai, o se mea lava e fia faamalamalama. O le mea lea e tataua ona uunaia ai faifaatoaga, a o le saunoaga lea faapea e le taitai ona oo i ai, leai e le

talafeagai lena mea. Ae o la e toatele faifaatoaga e ave latou oloa i fafo e i ai lava le taimi e oo i ai.

FOFOGA FETALAI: E le o le agaga lena le Taitai o le Itu Agai, malie.....

Susuga Hon TUILAEP A FATIALOFA AUELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai na amata mai lava i le 1962 o tatou sasaa atu le seleni i faatoaga. A outou tilotilo nei i mea ia e ave i fafo, e pito pau lava mea e ave i fafo. O le mea lena lea ou te fai atu ai, o lou fatu i te'i ua e ma'i i le popole fua ma le popole vale, ae masalo e uma atu lava le tatou Paeaiga lena ma le isi Paeaiga ma le isi foi Paeaiga, e le i taitai lava oo ia ni talo e ave i fafo i lena fuainumera.

Lau Afioga i le Fofoga Fetalai, o le taofi ai o le tatou Fono, ua ou vaai atu ua e sela lava i le tau aumaiga o le mataupu.

Afioga Hon PALUSALUE FAAPO II: Lau Afioga i le Fofoga Fetalai, e manatua le tatou Tala o le Tupe na faatupe i fua ma faaeleeleaga ae le i tulai mai le HRPP. O e manatua lau Afioga i le Fofoga Fetalai sa tele a tatou oloa o faatoaga na ave i fafo lea i le tatou Tala o le Tupe. Ae a la le taimi lena? O lea ua saunoa i ai le Afioga i le Palemia, ioe, e mafua mai o le saina a le Malo e fesoasoani i le afaifaatoaga. O le mea lea lau Afioga e tataua ona faasao, e tele tupe a le atunuu na faatupe ai lana Tala o le Tupe.....

FOFOGA FETALAI: O lea ua maua lou finagalo, o lea o le a faafa ona ou fai atu. Ua uma ou avanoa o lea ua faafa, faalima, malie lau Afioga i le Taitai o le Itu Agai e tau faatonutonu lelei mai le tatou Fono.

Tulai mai le Afioga i le Minisita mo Leoleo ma Falepuipui, Auaunaga o Tinei Mu ma Faalavelave Tutupu Faafuasei.

Afioga Hon SALA FATA LISATI PINATI (Minisita mo Leoleo ma Falepuipui, Auaunaga o Tinei Mu ma Faalavelave Tutupu Faafuasei): Lau Afioga i le Fofoga Fetalai faapea le Fonousu a Samoa. Ou te tulai atu ma lou ava tele, ona o mea ia o talo lea e ave i fafo. Ua tele tausaga o fai pea lea auaunaga o le ave o le fai ma le talo i fafo. O le mea moni lava ia masalo ua ova atu i le 30 tausaga o fai, e leai lava ni matou lafoga o faia ae ua ta fiu foi e saili pe maua se \$100,000 i se uta talo e ave i fafo, e le maua. O le pogai o le mea lea e tupu, o le taugofie o le tatou talo la e ave i fafo, o lea la e manuia ai tatou tagata la i fafo a o lo o faapea ona taumafai pea nai a tatou faifaatoaga e tausaili. Ae o le mea moni lava ia, e manaia foi le concern a le Taitai o le Itu Agai ae ia te au lava ia o le faifaatoaga, e leai lava ni mea faapea o tologi ni lafoga. Ae ou te faafetai foi i le Malo ona o le tasi lea matafaioi o lo o faapea ona taumafai i ai le Minisita mo Faatoaga ma Faigafaiva ma le Taitai o le Malo, e unai tagata e fai faatoaga. O lau talo la e i ai o le matua tele a, e le faapea o se upu e avane ai, ae ua ou fiu e taumafai ae le i oo lava sau tupe i se \$50,000, e uma lava le tausaga o tausaili pe maua se na vaega. Na o le mativa lava le mea lea e oo aumai, ia ma le faaloalo lava.

Afioga Hon AEAU PENIAMINA LEAVAISEETA (Falealupo): Lau Afioga i le Fofoga Fetalai, o le tatou Tulafono lea na ona fai ae le faaogaina. E faapuupu ai le tatou mea lea ma le alu o le taimi.

FOFOGA FETALAI: Ia le sui usufono mo Faleata Sasae, o lou avanoa mulimuli.

Tofa AVEAU TUALA LEPALE NIKO PALAMO: Lau Afioga i le Fofoga Fetalai ua ou toe tulai atu leaga o au lea sa fai lau fesili anaeila muamua i lau Afioga i le Taitaifono. O le uiga o lou tulai atu, ona o le tele o faamatalaga lea e tau fai mai a le Taitaifono ma le la foi vaega, a o lea lava e manino le tali na ala ai ona fai le vaega lea ona o le WTO, aiaiga a le WTO, a lea fai mai i le parakalafa....

FOFOGA FETALAI: Ia o lea ua maua le finagalo o le sui usufono, tulai mai lau Afioga i le Palemia.

Susuga Hon TUILAEPA FATIALOFA AUELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai o le isi lea puipuiga o lea e puipui ai ia Malo o le Lalolagi, ona o le faasaolotoina o latou oloa. Mo se faataitaiga, e i ai tausaga e tetee ai le aufaifaatoaga a Falani, ona o ane loa lea ma latou loli o fuamoa, o mea nei o tamato. Ia ona o ane loa lea o loli e afe ma afe loli, ona omai lea i le aualatele sasaa ai a latou fuamoa ma latou tamato, na matua saaki lava i luga o le aualatele ae omai isi a latou loli matua soli pala ma faapala. Aisea? Ua toatamai i le aveatu i totonu o Europa o fuamoa e taugofie a isi atunuu i fafo mai o Europa, ae le gata i lena o tamato ma apu. E toatamai la i luga o le tulaga lea o le faataugofie o isi atunuu i le lē faamauina aloaia i le latou Tulafono o Lafoga. O le tulaga lena, ana leai la puipuiga ia, semeamanu e faigofie lava ona aumai oloa a fafo toetiiti lava leai se tau, toetiiti lava leai se tau aua o mea o subsidies. O lona uiga ua ave faaopopo i ai tupe aua ne'i totogiina ni a latou lafoga ae toe ave i ai ma meaaloa. O le mea la lena e puipui i ai ia atunuu, aua ne'i dump ina. O lona uiga, aua le aumaia oloa a isi atunuu e faafaulai i isi atunuu ona afaina ai lea o latou faifaatoaga. O le noataga la lena, o lea e aafia uma ai lava atunuu o le lalolagi o lo o avea ma similar treat ma sui auai i Faalapotopotoga nei. O lona uiga e i ai le taua o le Tulafono lea, ne'i faapea mai sui na ona fai ae le faaogaina, aua foi a siaki mai la. O a la tou mea? A lea i ai le matou Tulafono ona taatia ai lea pe faaoga pe leai, a o le taua o mea ia, o le noatia ai o atunuu la i fafo, 'aua ne'i soona sasaa maia a latou oloa iinei ma afaina ai a tatou aufaifaatoaga. Lau Afioga silasila loloto i le mataupu, a tatou talanoa i ai, o le ala lena o lea na ala ai ona umi ona o tatou tagata e talanoa noataga ia i le fesootaiga o Malo i tulaga o feafaatauga, ona e tataua ona i ai se Tulafono e noatia ai 'aua ne'i omai ia isi Malo faamata potole tulaga o le sasaa mai o latou oloa iinei ia ma ola ai a latou pisinisi ae oti ai a tatou pisinisi.

Lau Afioga i le Fofoga Fetalai, e lavelave le mataupu ae telē le aogā o le Tulafono.

Faamaonia le Fuaiupu 30.

FUAIUPU 31: Lafoga toe faafoi.

Faamaonia.

FUAIUPU 32: Ofisa Tau le Va o Malo ma Maliega Faava o Malo.

Faamaonia.

FUAIUPU 33: Pepa o lafoga o oloa.

Faamaonia.

FUAIUPU 34: Pepa o lafoga ma oloa ua faia- lē e taliaina.

Faamaonia.

FUAIUPU 35: E mafai e le Komesina ona fuafuaina o isi faatulagaga.

Faamaonia.

FUAIUPU 36: Faamatalaga o faasiliga o lafoga ua totogi ma faamatalaga o aitalafu tau lafoga.

Faamaonia.

FUAIUPU 37: Faamaumauga aloaia o Lafoga o Oloa ma Galuega Faatino ua tuuina atu e, po o i sooupu.

Faamaonia.

FUAIUPU 38: Talosaga mo faamaumauga aloaia o Lafoga o Oloa ma Galuega Faatino.

Faamaonia.

FUAIUPU 39: Tausiga o faamaumauga aloaia o Lafoga o Oloa ma Galuega Faatino.

Faamaonia.

FUAIUPU 40: Faiga o tau e aofia ai Lafoga o Oloa ma Galuega Faatino o oloa tuuina atu e aafia ai lafoga totogi, i tagata e le i faamauina.

Faamaonia

FUAIUPU 41: Faamatalaga o tupe maua o Lafoga o Oloa ma Galuega Faatino.

Faamaonia

FUAIUPU 42: Aso e faagata ai le totogiina o Lafoga o Oloa ma Galuega Faatino.

Faamaonia.

FUAIUPU 43: Aoina o Lafoga o Oloa ma Galuega faatino i luga o oloa faaulufale mai.

Faamaonia.

FUAIUPU 44: Sui e faatinoina Lafoga o Oloa ma Galuega Faatino a tagata e lē nofomau.

Faamaonia.

FUAIUPU 45: Suesuega o lē e taliaina se oloa ua tuuina atu.

Faamaonia.

FUAIUPU 46: Soligatulafono.

Faamaonia.

FUAIUPU 47: Faasalaga tau lafoga i le alofaga mai le totogiina o lafoga.

Faamaonia.

FUAIUPU 48: Fuafuaga e alofia ai lafoga.

Faamaonia.

FUAIUPU 49: Lala ma vaega.

Faamaonia.

FUAIUPU 50: Faaliliuina o tupe.

Faamaonia.

FUAIUPU 51: Tulafono Faatonutonu ma pepa faatumu faamaonia.

Faamaonia.

FUAIUPU 52: Soloia, aiaiga tau soloaiga ma aiaiga faasaoina.

Faamaonia.

FAAMATALAGA:

FOFOGA FETALAI: O lo o i ai le Teuteuga a le Komiti i le Faamatalaga e pei ona faalia i le Pepa Faaopoopo o Galuega.

Tulai mai lau Afioga i le Taitaifono.

Tofa SOOALO MENE: Lau Afioga i le Fofoga Fetalai ou te faatu le Teuteuga e faapea:

“TEUTEUGA:

i) Faamatalaga 2 parakalafa 1(d):

Ina ia aveese le parakalafa 1(d) mai le Faamatalaga 2 ma toe faanumera parakalafa i le faasologa e tatau ona i ai.

ii) Faamatalaga 3 parakalafa 1:

Ina ia faaofi le (o) fou i le tuanai ai o le parakalafa (n) o le faafu'aiupu (1) ina ia faitauina ai le (o) fou e faapea:

“(o) le tuuina atu o le eletise i lalo o le Tulafono o le Faalapotopotoga o le Malosi Faaeletise 1980.”

Faamaonia le Teuteuga.

Faamaonia le Faamatalaga e pei ona Teuteuina.

Tofa Lealailepule Rimoni Aiafi: Lau Afioga i le Fofoga Fetalai.....

FOFOGA FETALAI: Ia saunoa.

Tofa LEALAILEPULE RIMONI AIAFI: Ou te fia fesili i le vaega lea o faamatalaga i le vaega muamua. O le faamatalaga o vaega lua i le vaega muamua o lo o faapea, o le agavaa o oloa foi ia tuusaunoa mai fafo e oo atu i le \$200 Ausetalia le tau.

O le fesili muamua la lau Afioga, Aisea ua faaaoga ai tala Ausetalia a o le Tulafono a tatou? A uma ona faaaoga tala Ausetalia i le vaega lea ona faaaoga lea o le tala Samoa i lalo ane. O le mea masani lava lea e i ai e \$500 i le exempt foi lea e i ai i le taimi nei. O le fesili muamua la lena lau Afioga i le Fofoga Fetalai pe aisea ua faaaoga ai tala Ausetalia ae le faaaoga pea le tala Samoa?

O lona lua, o le tele o atunuu o le Lalolagi ua le o toe faatagaina mea ia o sikaleti ona ave fua i totonu ona o le taumafai e puipuia le tulaga o lo o i ai nei, a o lea e faataga pea i lalo o le tatou Tulafono.

O lona tolu, o le vaega lea o fagumalosi lea sa i ai le tuutuuga foi lea e toe fetuunai. A o lea e le o tuu mai ai i le Teuteuga i le taimi nei, o nai fesili muamua ia lau Afioga.

O le isi vaega (h) i le tulaga o le aircraft le mamafa lena i ai, o lena i ai a le exempt i lalo o le Tulafono o le 1975 ae manatua ua eseese tausaga eseese foi vaitaimi. Pe na tagai la i ai ia le Taitaifono i le vaega lea faamolemole?

FOFOGA FETALAI: O lea ua maua, tulai mai le sui usufono mamalu mo Faasaleleaga Nu. 2.

Susuga PAPALII LIO FAAVAIVAIOMANU TAEU MASIPAU (Faasaleleaga Nu. 2): Faafetai lava i lau Afioga i le Fofoga Fetalai, e talitonu foi o le matou Komiti lea sa iloiloina le Tulafono lenei. Ae na o sina fautuaga foi i le faamatalaga, e ao lava ona aveatu ai se lagona ona o le Tulafono lea o le tuuina atu o eletise leaga o lea e ta aofai atoa mai le uiga o le Tulafono atoa. Ia e le afaina la ona o lea e talanoaina tatou oloa e ave i fafo ma oloa aumai. Na o le pau a le popolega o lou sui usufono, ina ne i maua foi le avanoa lea e faaoga ai foi le Tulafono lea aua o lea ua aveese mai le tuuina atu o eletise mai le tatou lisi lea o le exempt, a o lea ua tuuina atu i le zero rated. O le faamatalaga la o le zero rated e i ai le discretion a le Malo e mafai ona fetuunai ai. E pei o le popolega lenei lea i ai ona o le popolega o le ta aofai ai ma le Tulafono atoa o le tuuina atu o le Eletise 1980. E pei o le agaga lenei lea e tau aveatu ai foi se fautuaga i le Malo. Po o le a se silasila a le Malo i le tulaga lea ne i te i ua i ai foi sina faaopoopoga i luga o le eletise e pay atu i le a o lea ua taaofai le Tulafono atoa. O le ala lenei o lea e avatu atu ai se fautuaga i le tatou Malo, ma le faaaloalo.

Susuga Hon TUILAEPA FATIALOFA AUELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai, o au ou te faanoanoa i le sui usufono lea na tulai mai nei, o lea e i ai i totonu o le Komiti lea. O le a le mea na le aumai ai lau fautuaga i totonu o le outou Lipoti? A o lea la ua saunoaga la outou Taitaifono, e le tataua ona toe tutulai mai outou taitoatasi ma aumai ni a outou fautuaga. O lona uiga e aliali mai ai e te le i auai i fonotaga. Ae na ala ona fai la outou fono o lenei e i ai la outou Taitaifono e aumai ai a outou mataupu uma i i, ona faasaina ai lea o le tatou taimi. E le o ala ia o mea. Ae o le tulai mai o le Taitaifono e aumai la outou Lipoti ma aumai a outou fautuaga ae e tu mai foi oe e ese au fautuaga.

Lau Afioga i le Fofoga Fetalai e le o ogatasi ma tulaga masani o mea nei faa-fono.

FOFOGA FETALAI: Ua tatou taunuu mai i le tatou taimi malolo, e manatu o le a faaauau tatou felafolafoaiga pe a tatou talii mai i le tatou malologa o le taeao.

E faamalo atu i le tatou usugafono i lenei taeao fou, e manatu leaga o lea ua tatou taunuu tonu, e faamalulu atu foi i sui usufono mamalu. Ae o le a tuu atu le avanoa e toe tutulai mai ai sui usufono o le Komiti e toe tali i le latou Taitaifono pe a tatou talii mai i le tatou malologa masani o le taeao.

O lou itu taumatau o lo o i ai le ala atu i fafo o le tatou Maota nei o lo ua tapena ai ia tatou faleie mo le tatou malu taeao masani. O le ala foi lenei e toe faaogaina mai e le paia ma le mamalu o le tatou Maota nei pe a ta le tatou logo e faasolo ai a tatou galuega.

Na faataatiaese Taulumaga a le Fono Aoa mo lana malologa masani i le itula e 10:45 i le taeao ma toe faaauau i le itula e 11:27 i le taeao.

FOFOGA FETALAI: E faasilasila atu ua toe amatalia nei Taulumaga a le Fono Aoa Faitulafono.

E momoli atu le agaga faafetai i lenei vaega o le taeao, ou te manatu o lea ua maea ona pale auau le taliga o le sua ma ua matu i fau le tauteaga. E momoli atu le agaga faafetai i le faamalolosi aemaise foi o le tauavagameaina o le tatou Fono i lenei vaega o le taeao, o lea ua tatou taunuu mai i le afa mulimuli o le tatou galuega mo le faatulagaina e tatou te malolo i le itula e 1:00. Ona manatu lea, faafetai i le Atua i kalasia ua foai e tausii ai lo outou soifua, aemaise foi o mea ua foaiina, ia tau ia ina ia maua ai le faasiliga malosi aua le faaauauina o le tatou galuega.

E faia le tatou malologa o le a tuu atu le avanoa i le Afioga i le Taitaifono e faamaea mai le taumafai e tali atu ona o nisi o tulaga sa fesiligia e sui usufono aemaise foi o sui o lau Komiti.

Susuga Papalii Lio Faavaivaiomanu Taeu: Lau Afioga i le Fofoga Fetalai.....

FOFOGA FETALAI: Oi, ia tulai mai lau Afioga i le sui usufono.

Susuga PAPANII LIO FAAVAIVAIOMANU TAEU MASIPAU: Faafetai lava i lau Afioga i le Fofoga Fetalai. E auai faatasi foi lenei sui usufono i le agaga faafetai a lau Afioga faapea foi le Susuga i le Failautusi ma le tatou Fono Aoa o aua foi le faamalositino, ua matu i fau foi le taliga o le sua i le paia o le Maota, ua maua foi le tatou faasiliga malosi.

A o lenei avanoa e talitonu lava lau Afioga i le Fofoga Fetalai e le toe tele foi se tala, e pau lava le tala, ia alolofa foi le tatou Maota, ia pasia ia le matou fautuaga ua tuuina atu. E pau lava o lea, o le mea sili ona taua o lea ua mau i le Hansard sau fautuaga ua avatu, ia a o le agaga ia o lea e faafofoga mai le Taitaifono, e ui lava ina mamao Savaii, ou te tauasa mai lava i a matou fonotaga, o au foi lea ou te saina i le Lipoti lau Afioga i le Fofoga Fetalai.

Ma le agaga faaaloalo.

FOFOGA FETALAI: Ia, e manaia foi aga a la outou Komiti, e le avea fautuaga i le taimi o Komiti ae aumai i le Fono Aoa.

Ia le sui usufono mo Faleata Sisifo.

Tofa LEALAILEPULE RIMONI AIAFI: Faafetai i lau Afioga, ona o lea sa ou fesili i le Afioga i le sui usufono mamalu o le Komiti, sa matou talatalanoa i i ma ou fesilisili i ai. Ou te fia malamalama muamua, o le a le eseese o le exempt ma zero rated? Ae tali mai, o le zero rated, e i ai le malosiaga o le Malo e toe fesiitai ai, a o le exempt e tuusaunoa. O lona uiga, ua ala la ona aumai le eletise mai i i le exempt agai i le zero rated, e i ai le fuafuaga e toe sii. Po o le sao la lea lau Afioga i le Taitaifono? Pe le tuu ai pea le mea na i ai e faamama avega i le atunuu?

Ma le faaaloalo lava.

FOFOGA FETALAI: O le a tulai atu le Afioga i le Minisita e faamalalama. Tulai mai lau Afioga i le Minisita mo Galuega, Felauaiga ma Atinae Eeseese.

Afioga Hon MANUALESAGALALA MATI TUIGAMALA ENOKATI POSALA (Minisita mo Galuega, Felauaiga ma Atinae Eeseese): Faafetai i

lau Afioga i le Fofoga Fetalai mo le avanoa. Ae ou te iloa o mataupu nei pei e agai i ai sui usufono mamalu o le fuafuaga lea mo le EPC po o le Eletise lea e i ai le zero rated. E fou le tulaga lea ua taumafai le tatou Malo e ausia i le tulaga lea o le eletise lea le Renewable Energy o le Eletise Faafouina, lea faatoa fai feagaiga ma tatou kamupani ia e faaaogaina le Solar ma vaega, o latou la ia o lea e faatau foi lele, ae faafetai i le Malo i le tele o le sao o le Malo e taumafai e tuu faaitiitia. O le tulaga lea e i ai le lafoga lea, ina ia ave le faamama avega i le tau o le eletise. O finauga ia e fai nei i le lalolagi ma le taumafai, ia maua le eletise mama, ia taumafai e gafatia e o tatou tagata le tau o le eletise. Ae faafetai i le Malo i le tele o lenei faamama avega, lea ua mafai ai ona taumafai i totonu o le Tulafono lea, ina ia gafatia e o tatou tagata ma maualuga le tulaga o lo o i ai Samoa ma le Faalapotopotoga o le Malosiaga Faaeletise i le taumafaiga ia oo atu i le 2017 ua 100% le eletise faafouina, faafetai mo lenei avanoa ma le faamama avega mo le atunuu, ma le faaaloalo.

Tofa LEALAILPULE RIMONI AIAFI: Lau Afioga i le Fofoga Fetalai, faafetai i le Afioga i le Minisita e manaia le faamalamalamaga. O lea e tatou te malamalama uma lava i le vaega lea ma le taumafaiga a le Malo i lana manulauti i le tulaga lea i le Renewable Energy. O le uiga la o le fesili, afai la o lea ua tuu i le zero rated, aua o lea ou te talitonu i tau ia e faatau mai i kamupani ia, o lea e sau ai ma le GST.

FOFOGA FETALAI: Tulai mai lau Afioga i le Palemia.

Susuga Hon TUILAEPA FATIALOFA AUELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai, o le exempt i le faa-Peretania, a faa-Samoa e leai se mea e totogia, o le zero rated, a faa-Samoa e leai se mea e totogia, o le mea lava e tasi. O le tulaga i le suiga, afai o lea e sui i le Tulafono, e faatulaga i le Tulafono e toe sui foi i le Tulafono. E leai lava se mea i lalo nei po o le exempt po o le zero rated, afai lava o le faaiuga o le a teuteu le Tulafono e sii, o le tulaga lena, sii fou. Ae ua ala ona aumai i i le faaupuga lena, ona e ese le tulaga lea ua i ai Samoa i le gaosia o le eletise. O lea ua taoto le fuafuaga mamao a le Malo, e oo atu i le 2017 ua le toe aumaia ni kiso e faaaoga e gaosi ai le eletise. O lona uiga la, e le tatau la ona toe i ai se tulaga pagatia i le fesiitai tele o le kiso, e le gata i le fesiitai, o le isi aso ua i lūgā, o le isi aso ua toe pau i lalo toe tuu foi i lūgā. A o le eseese la o le mea lea e agai i ai le Malo, e gaosi mai mea o lo o maua lava i Samoa pei o le la, o le tulaga lena ina ia taofiofia ai ia le fesiitai o le tau. Afai o le tulaga ia, e i ai se tau o le la? E leai se tau. O le mea e maua fua. E i ai se tau o le vai? E i ai se tau o le matagi? O mea e maua fua. O le tulaga maoae lena, o le tagata soifua ma le fuafuaga a le Atua. O lea lava ua amata ona tatou o e faaaoga mea maua fua. A o ai e sau ai? E foai mai e le Atua ia Samoa. Ia ua lava ia ia mataupu silisili, ou te ofo i le saga toe fesili i nei mea, a o le faigofie ia.

Faamaonia le Teuteuga.

Faamaonia le Faamatalaga e pei ona Teuteuina.

Tofa LEALAILEPULE RIMONI AIAFI: Lau Afioga i le Fofoga Fetalai, malie lou finagalo o lea ua tali fesili ia i le zero rated. A o fesili ia na tuu atu muamua i le mea foi lea i le faaaogaina o le tala Ausetalia, mea ia o sikareti. Pei o le mea lena o lea na tali mai ai lau Afioga, leaga o lea ua finauina i le mea lea.

FOFOGA FETALAI: Ua tautuaupega lou toe tulai mai o lea ua pasi, o le a fai i tua le fesili lena pe a faapea e avanoa le Komiti e tali mai.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Tulafono o Lafoga o Oloa ma Galuega Faatino e Faia i Luga o Aofaiga o Tau 2015.

Faamaonia.

Na faagasolo le Tulafono Tau Faaofi o Lafoga o Oloa ma Galuega Faatino e Faia i Luga o Aofaiga o Tau 2015 faaasi ma Teuteuga.

**TULAFONO TAU FAAOFI O TEUTEUGA O LE FAAVAE (NU. 2)
2015 – iloiloga auiliili**

FOFOGA FETALAI: E tusa ai ma le Tulafono Tumau 106, e tatau ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono Tau Faaofi.

Tulai mai le Afioga i le Taitaifono o le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa.

Afioga Hon LEAUPEPE TOLEAFOA APULU FAAFISI (Taitaifono Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa): Faafetai mo le avanoa. Lau Afioga i le Fofoga Fetalai ou te tulai atu e faatu le lafo, *Ina ia faamaonia e leni Fono Aoao le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Teuteuga o le Faavae (Nu. 2) 2015 e aunoa ma se Teuteuga.*

Faaluaina e le sui usufono mo Gagaiformauga Nu. 1, sui usufono mo Alataua Sisifo, sui usufono mo Siumu, ma le sui usufono mo Palauli le Falefa.

Na faamaonia le lafo.

FOFOGA FETALAI: E faasilasila atu ua faamaonia nei e le Fono Aoao le Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le Tulafono Tau Faaofi o Teuteuga o le Faavae (Nu. 2) 2015.

O le a sagai atu loa le Fono Aoao i le Iloiloga Auiliili o le Tulafono Tau Faaofi o Teuteuga o le Faavae (Nu. 2) 2015.

E tusa ai ma le Tulafono Tumau 102, e amata le Iloiloga Auiliili o le Tulafono Tau Faaofi i le Fuaiupu 2.

FUAIUPU 2: Ua teuteuina le Mataupu 41.

Tofa Levaopolo Talatonu: Lau Afioga i le Fofoga Fetalai.....

FOFOGA FETALAI: O le a le Fuaiupu le sui usufono mo Gagaemauga Nu. 2?

Tofa LEVAOPOLO TALATONU: O le 41 faamolemole.

FOFOGA FETALAI: Saunoa le sui usufono.

Tofa LEVAOPOLO TALATONU: Lau Afioga i le Fofoga Fetalai ma le mamalu o le Maota, masalo e le natia ia tulaga i Faamaumauga a le Fono lenei i le Teuteuga lenei o le Faavae, sa lagolagoina malosi e lenei itumalo ia tulaga uma. Ae na ona pau lava lea lau Afioga i le Fofoga Fetalai o se tulaga e tau ina avatu, ona o lo o tulai mai se tulaga sa faafoeina ai le faatinoina o le Teuteuga lenei, e tusa ai ma Tulafono ma faiga faavae ia ma alafua a lo tatou Malo e fuafuaina ai se Tulafono, so o se Tulafono po o se Teuteuga. O lea e manino lau Afioga i le Fofoga Fetalai i le Lipoti a le Komiti, e tele ni atugaluga sa toe faaalai i le faatalanoaina o le Teuteuga lea o le Faavae i totonu o le latou Komiti, talu ai, e leai se faatalatalanoaga sa faia ma le atunuu, ma ni sui sa fia auai e faaali o latou finagalo. Silasila lau Afioga i le Fofoga Fetalai, o a nisi Tulafono, a o le Tulafono o le Faavae o le Malo Tutoatasi o Samoa, sa tataua lava ona maua se avanoa o le atunuu e faaali ai o latou finagalo. E tusa lava la lau Afioga i le Fofoga Fetalai, po o se Tulafono lava pei e faigofie, a o ala o mea e tusa ai ma faiga faavae, e tataua lava ona amia se finagalo o le atunuu, ina ia i ai i totonu o Faamaumauga a le Palemene. Ma lou faaaloalo lava, faafetai.

FOFOGA FETALAI: O lea ua maua le finagalo o le sui usufono. Tulai mai lau Afioga i le Taitaifono.

Afioga Hon LEAUPEPE TOLEAFOA APULU FAAFISI: Faafetai mo le mataala, tulou, ma le matapupula foi o le sui usufono mamalu pei ona tulai mai e faaalai foi lona finagalo i se tasi o vaega o le Lipoti a le Komiti ma ana Sailiiliga. Ia so o se mea lava e faapena, e eseese foi le faauigaina e le sui usufono mamalu, ia e ese foi se manatu o le Komiti i tulaga lea o se fesili e tuuina atu i tua i le atunuu.

O manatu ia, e manatu le Komiti e faafoe ina ia tuuina mai i luma o le Palemene, o ni lagona ma ni faaaliga e tuuina mai e nisi o molimau a le atunuu i le Komiti, e ui i lea, e manatu le Komiti, o lea ua uia ala o mea o le faasalalau i tua i televise ma leitio ma fofoga foi le atunuu ina ia autovaa mai e faaali o latou finagalo e tusa ai ma le Teuteuga o le Tulafono. Ae pei o tulaga ia lau Afioga e tali atu ai ma le agaga faaaloalo, ae pei o tulaga masani na o lea ua i ai le faatinoga o a tatou galuega i le tatalo atu lea i le atunuu, ina ia talaao mai e faaali foi o latou finagalo ma faatalatalanoa, e tusa ai o le Teuteuga o le Faavae.

Ma le faaaloalo lava, faafetai.

FOFOGA FETALAI: Tulai mai lau Afioga i le Palemia.

Susuga Hon TUILAEPa FATIALOFA AUeLUa LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai, e eseese lava mea, e i ai lava vaega e talo sao ai le atunuu e faatalanoa i tua faatoa aumai ai i totonu o le Palemene, ae lua isi ituaiga talo e talo ai le atunuu. O le talo muamua, o le aumai e faatalanoa o sui usufono o le atunuu o lea e i totonu o le Palemene, o tatou, o sui ia o le atunuu, ua tofofi mai tatou o lea ua faaee uma i ai mamalu o itumalo, o lea la ua atoa, ua atoa le atunuu iinei. O le faatalanoaga muamua lena ma sui o le atunuu. Ia ona faatalanoa faatalanoa lea o tatou, see i le Komiti, toe valaau e le Komiti ia sui taitasi e gasolosolo mai e toe faaali ni o latou finagalo i le Tusi Tulafono. O lona uiga la, e tolu auala e talo ai le atunuu, a o le i aumaia se Tulafono iinei e mafai ona o e faatalatalanoa pei o le Teuteuga o le Faavae sa talanoa ai e tatau ona sui le Faavae, ua tele nei mau lotu ua i ai, ua tatau ona taofi. Ua toetiiti atoa le lua tausaga o faatalanoa e le Komiti sa Taitaifono ai le Toeaina o Oka Fauolo. Sa fai ia fonotaga iinei Upolu fai i Savaii, na talo foi fonotaga a le Aufailotu e omai i le malosi o le manatu o le Fono a Ekalesia, ua lava ia lotu, ua ova lotu ia le atunuu, toetiiti atoa le lua tausaga. O lea la, ua alu alu le latou faatalanoaga, o lea e faatali le Malo lua tausaga pe a o faatali, ae aumai le lipoti o lo o faapea mai, “aia le teuteua le Faavae, o lea lava e lelei le mea lea o lo o i ai.” Ma a fua i luga o finagalo na faaalia, i le o sao i le atunuu.

A o le isi la auala, o tatou nei o sui usufono o le Palemene, o lea ua atoa i i le atunuu, e aumai lea faaali o outou taofi aemaise o tatou nei o lo o aupito i sili ona malamalama i mataupu nei, e faapena foi ona fai mai ia itumalo se o outou a na o matou a lena. O le faatolu ai lea ona talo le atunuu ona see lea o le Tulafono i le Komiti ona toe faasalalau foi lea o nisi lava e fia omai pea. O lea la e maua ai le avanoa e pei la o le tulaga lena e taua le finagalo na aumai e le sui usufono, a o lea lava e pei ona saunoa, faamalo foi i le Taitaifono, faamalo i le Taitaifono o lea e le i faatamala ona fai le latou galuega, e le o se galuega foi e faigofie aemaise o le faigofie ia o le Teuteuga lenei, o le faigofie o le Teuteuga lenei, o le aveese mai i le Loia Sili ae faatu se isi itutino e nafa ma le tulaga foi lea o moliaga, ina ia ‘aia ne’i tilofia ai Malo, faapea o lea ua i ai le aao malosi o le Malo o lea ua tu ai le Loia Sili i se moliaga e fai aemaise pe a te’i ua molia le Taitai o le Itu Agai, a, i le amio le popoi ua ia faia, ia ae faatino e le Loia Sili.

O le a le mea? E le o se tutoatasi le mea lena, ae o lea e tu ai i tua Tuilaepa, lea e tu ai i tua le Kapeneta. O le mea la lena lea o lea e faaeteete i ai le Loia Sili i le faatinoina o le amiotonu e tatau ona faasee ese ia see tuafaiga ae see atu mea ia ia ‘aia ne’i aafia le Loia Sili leaga o le Loia Sili o le Loia e tu mo le Malo, ae ia i ai se isi itutino e independent.

Lau Afioga i le Fofoga Fetalai, lea foi tatou te iloa uma le taua i le atunuu, a avatu se Faamasinoga ae iloa e aiga ia le Faamasino la ma se mataupu e aafia ai se aiga, e muliga le fai atu le aiga ae aumai lava le faasilasilaga a le Faamasino, o le a le auai ia Kome ma Seve ma Pai ma Lafai leaga e i ai latou sootaga faapitoa i i. Lau Afioga i le Fofoga Fetalai, o le sootaga lena e ono

aafia ai le amiotonu o le Faamasinoga lea e aumai i totonu o le Tulafono e ao ai ona Teuteu le Faavae.

FOFOGA FETALAI: Malo faafetai.

Tofa Lealailepule Rimoni Aiafi: Lau Afioga i le Fofoga Fetalai.....

FOFOGA FETALAI: O le a le fuaiupu le sui usufono mo Faleata Sisifo?

Tofa LEALAILEPULE RIMONI AIAFI: O le fuaiupu 3.

FOFOGA FETALAI: Saunoa le sui usufono.

Tofa LEALAILEPULE RIMONI AIAFI: Faafetai, lau Afioga i le taitaifono, talu ai ona sa ou taua nei vaega i lau lauga e pei ona fesiligia e lau Afioga molimau e tusa ma le vaega leni. O le mea lea e fia maua ai se malamalama, pe aisea le mafuaaga ua ono ai tausaga o le Faatonu? Ua atagia ai, le lē tutusa o le filifiliina o Pule Sili o Matagaluega, o lona uiga ua i ai Pule Sili e tolu tausaga, ua i ai le Pule Sili e ono tausaga faaopoopo le ono tausaga maea, a o lea la e sau nei ma isi ituaiga Pule ia, e ono tausaga ae tuusaunoa, ae faaopoopo ai pea faaopoopo ai pea, pei la ua leai se consistence ua leai se atagia tutusa i le filifiliga o Pule Sili o Matagaluega. Sa augofie le taofi i le vaega lea na aumai e sui usufono o le Palemene, o le Auditor ma le Suetusi Sili ma le Central Bank, ona o lea ua sa i ai le pa puipui e ono tausaga faaopoopo le ono tausaga, maea loa, a o lea la ua toe sau nei le vaega fou lea ua sau nei, ono tausaga ia ae leai se tapulaa. Pe i ai ni mafuaaga talafeagai ua fai ai le vaega lea, ma le faaaloalo lava.

Susuga Hon TUILAEPA FATIALOFA AUELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai, o faiga faavae lea ou te tutulai atu ai leaga o faiga faavae. A aafia loa faiga faavae o le Malo e alu atu ai le tulaga lena, e i ai ia e eseese lava mea, o le ala foi lena a o'loa ina oo i tulaga o tagata e faia faaiuga ogaoga, lea la e pei o le Pule Faatonu lea e lavea ai ma Suetusi, o latou ia na o se faataitaiga, e tēlē lava lo latou aafia i faaiuga ia atagia matilatila ai le amiotonu. O le manatu la faavae, afai e puupuu tele le taimi, a, e ono le atoatoa ai ona latou faatino le tiute ona o la ua manatu ua lata mai le tofiga, ia ona le faia loa lea o le amiotonu, ae pei e manaia le umi e tuu umi foi lele, e fesoasoani ai i lana amiotonu. O le isi foi la faiga lea ua agai i ai le Malo, a uma loa ua toe mafai ona toe faaopoopo se isi ono uma loa i ina, 'aua le toe faaumia, ae afai foi e muta i ina, sã sã sã ona sau e toe su'e sana galuega i totonu o le Malo, taofia ai le tulaga foi lele pei ua 11 tausaga ona alu ane lea fai i se faalapotopotoga vaai lea o le a ou le taua le amio pio lea a oe, ae alofa o lea o le a ou faamavae loa ua uma le 12 tausaga o'u sau loa lea ou te faigaluega i i, ae o le ou le tautala i le amiotonu. O le tulaga la lena e ala ai ona faeseese mea, e le afaina mo mea o faalapotopotoga foi ia e alu lava i tulaga masani, ae a o'loa i mataupu ogaoga e faamasino ai le amiotonu ua oo i tulaga o le tulafono ona tuu eseese loa lea o mea. E pei lava...ua iloa foi le lalolagi leni, a, e i ai lava mea laugatasi ae i ai foi mea e le laugatasi, e faapena i le foafoaga a le Atua, e i ai mea e maugā e i ai mea e laugatasi, e i ai mea e vanuvanu, ana faapea e

laugatasi uma le lalolagi, o se lalolagi e matua mātagā tatou te ola ai. Ae o le manaia ia o lou ala mai i le taeao vaai atu i mauga, ala mai i le taeao vaai atu i le sami, e le laugatasi e eseese.

Lau Afioga i le Fofoga Fetalai, ia o se fesoasoania atu lena.

Tofa LEALAI PULE RIMONI AIAFI: Lau Afioga i le Fofoga Fetalai, faafetai lea ua maua mai le ono tausaga e le tetee lou manatu i le ono tausaga lea e overlap ma le lima tausaga o le Palemene, a o le mea lea e talanoa atu ai lea na saunoa le Afioga i le Palemia, a uma loa le ono tausaga uma loa lea la ua i ai le faiga fou lea ua i ai nei, le Suetusi Sili ma isi vaega ia na pasia talu ai nei e tatou, e manatua foi o le Failautusi o le Fono e lavea uma i le vaega lea o le Ofisa o le Palemia, e leai foi se faiga faapea. A o le faiga la lea e fesiligia ai, pe aisea la ua tuusaunoa ai le vaega lea, e leai se tapulaa, ono tausaga, toe ono tausaga, toe sefuluono tausaga.

FOFOGA FETALAI: O lea la ua maua le fingalo o le sui usufono, e manatu foi ua malamalama le taumafai atu o le faamalamalama o le Minisita e a ia le Tulafono, se i tulai mai pea le Afioga i le Palemia.

Susuga Hon TUILA EPA FATIALOFA AU E L U A L U P E S O L I A I N E I O T I A I O N O S A I L E L E M A L I E L E G A O I: Lau Afioga i le Fofoga Fetalai, o lea e le malamalama atili le sui usufono, ia o le tali faaii, pau lava.

FUAIUPU 4: Ua teuteuina le Mataupu 83.

Faamaonia.

FUAIUPU 5: Aiaiga tau soloaiga ma aiaiga faasaoina.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Faavae (Nu 2) 2015.

Faamaonia.

Na faagasolo le Tulafono Tau Faaofi o Teuteuga o le Faavae (Nu.2) 2015 e aunoa ma se Teuteuga.

**TULAFONO TAU FAAOFI O TEUTEUGA O LE TULAFONO O
ELEELE, FUAGAFANUA MA SIOSIOMAGA 2015 – iloiloga auiliili**

FOFOGA FETALAI: E tusa ai ma le Tulafono Tumau 106, e tatau ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono Tau Faaofi.

Tulai mai le Afioga i le Taitaifono o le Komiti o Galuega, Felauaiga ma Siosiomaga.

Tofa TUSA MISI TUPUOLA: Lau Afioga i le Fofoga Fetalai ma le mamalu o le Maota, ou te tulai atu ma le faaaloalo e faatu le lafo, *Ina ia faamaonia nei e leni Fono Aoao le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Teuteuga o le Tulafono o Eleele, Fuagafanua ma le Siosiomaga 2015 e aunoa ma se Teuteuga.*

Faaluaina e se tasi o sui usufono mo Palota Taitoatasi, Afioga Maualaivao Pat Ah Him, sui usufono mo Vaa o Fonoti, sui usufono mo Aiga i le Tai, ma le sui usufono mo Palauli.

Na faamaonia le lafo.

FOFOGA FETALAI: E faasilasila atu ua faamaonia nei e le Fono Aoao le Lipoti a le Komiti o Galuega, Felauaiga ma le Siosiomaga i le Tulafono Tau Faaofi o Teuteuga o Tulafono o Eleele, Fuagafanua ma le Siosiomaga 2015.

O le a faasaga atu loa le Fono Aoao mo le Iloiloga Auiliili o le Tulafono Tau Faaofi o Teuteuga o le Tulafono o Eleele, Fuagafanua ma le Siosiomaga 2015.

E tusa ai ma le Tulafono Tumau e amata le Iloiloga Auiliili o le Tulafono Tau Faaofi i le Fuaiupu 2.

FUAIUPU 2: Ua teuteuina le fuaiupu 4.

Faamaonia.

FUAIUPU 3: Ua teuteuina le fuaiupu 106.

Faamaonia

FUAIUPU 4: Teuteuga faatupulaia.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o Eleele, Fuagafanua ma le Siosiomaga 2015.

Faamaonia.

Na faagasolo le Tulafono Tau Faaofi o Teuteuga o le Tulafono o Eleele, Fuagafanua ma le Siosiomaga 2015 e aunoa ma se Teuteuga.

TULAFONO TAU FAAOFI O TEUTEUGA O LE TULAFONO O LE FAAMAUINA O PULE O FANUA 2015 - iloiloga auiliili

FOFOGA FETALAI: E tusa ai ma le Tulafono Tumau 106, e tatau ona faamaonia muamua e le Fono Aoa le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono.

Tulai mai lau Afioga i le Taitaifono o le Komiti o Galuega, Felauaiga ma le Siosiomaga.

Tofa TUSA MISI TUPUOLA (Taitaifono Komiti o Galuega, Felauaiga ma le Siosiomaga): Lau Afioga i le Fofoga Fetalai ou te tulai atu e faatu le lafo, *Ina ia faamaonia nei e leni Fono Aoa le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Teuteuga o le Tulafono o le Faamauina o Pule o Fanua 2015 faatasi ma Teuteuga.*

Faaluaaina e se tasi o sui usufono mo Palota Taitoatasi, Afioga Maualaivao Pat Ah Him, sui usufono mo le Vaa o Fonoti, sui usufono mo Aiga i le Tai, ma le sui usufono mo Palauli.

Na faamaonia le lafo.

FOFOGA FETALAI: E faasilasila atu ua faamaonia nei e le Fono Aoa le Lipoti a le Komiti o Galuega, Felauaiga ma Sioisomaga i le Tulafono Tau Faaofi o Teuteuga o le Tulafono o le Faamauina o Pule o Fanua 2015.

O le a sagai atu loa le Fono Aoa mo le Iloiloga Auilili o le Tulafono Tau Faaofi o Teuteuga o le Tulafono o le Faamauina o Pule o Fanua 2015.

E tusa ai ma le Tulafono Tumau 102, e amata le Iloiloga Auiliili o le Tulafono Tau Faaofi i le Fuaiupu 2.

FUAIUPU 2: Ua teuteuina le fuaiupu 2.

Faamaonia.

FUAIUPU 3: Ua teuteuina le fuaiupu 5.

Faamaonia.

FUAIUPU 4: Ua teuteuina le fuaiupu 9.

Faamaonia.

FUAIUPU 5: Teuteuga faatupulaia.

FOFOGA FETALAI: O lo o i ai le Teuteuga a le Komiti i le fuaiupu 5 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Tofa TUSA MISI TUPUOLA: Lau Afioga i le Fofoga Fetalai ou te faatu le Teuteuga i le Fuaiupu 5 e faapea:

“TEUTEUGA:

Fuaiupu 5- Teuteuga Faatupulaia

Ina ia soloia le faafuaiupu (2) o le fuaiupu 76 o le Tulafono e Tuuafaatasia ma Teuteu ai Tulafono Eseeese e Faasino i Meatotino 1952 ma suia i le faafuaiupu (2) fou e faapea:

“(2) O se mokesi ua faia i totonu o lea pepa faatumu e i ai le tulaga aloaia e avea ai o se faamalumaluga, ae peitai e le faagaoioia e avea o se faaliliuina atu o le fanua ua mokesiina.”

Ma le faaaloalo.

Faamaonia le Teuteuga.

Faamaonia le Fuaiupu 5 e pei ona Teuteuina.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o le Faamauina o Pule o Fanua 2015.

Faamaonia.

Na faagasolo le Tulafono Tau Faaofi o Teuteuga o le Tulafono o le Faamauina o Pule o Fanua 2015 faatasi ma le Teuteuga.

**TULAFONO TAU FAAOFI O TAGATANUU I LE
TEUFAAFAIGALUEGAINA O TUPE MAI FAFO 2014
– iloiloga auiliili**

FOFOGA FETALAI: E tusa ai ma le Tulafono Tumau 106, e tatau ona faamaonia muamua e le Fono Aoao Faitulafono le Lipoti a le Komiti o le Tulafono Tau Faaofi ona avanoa ai lea o le Iloiloga Auiliili.

Tulai mai le Taitaifono o le Komiti o Mataupu tau Faamasinoga, Leoleo & Falepuipui ma Faamasinoga o Fanua ma Suafa.

Tofa TUISA TASI PATEA: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoao le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Tagatanuu i le Teufaafaigaluegaina o Tupe mai Fafu faatasi ma Teuteuga ma Faasaoga.*

Faaluaaina e le sui usufono mo Palauli, sui usufono mo Gagaiifomauga Nu.2, ma se tasi o sui usufono mo Vaimauga Sisifo, Tofa Lenatai Victor Faafoi Tamapua.

Na faamaonia le lafo.

FOFOGA FETALAI: E faasilasila atu ua faamaonia nei e le Fono Aoao le Lipoti a le Komiti o Mataupu tau Faamasinoga, Leoleo ma Falepuipui ma Faamasinoga o Fanua ma Suafa i le Tulafono Tau Faaofi o Tagatanuu i le Teufaafaigaluegaina o Tupe mai Fafu 2014.

O le a sagai atu le Fono Aoao mo le Iloiloga Auiliili o le Tulafono Tau Faaofi o Tulaga o Tagatanuu i le Teufaafaigaluegaina o Tupe mai Fafu 2014.

E tusa ai ma le Tulafono Tumau 102, e amata le Iloiloga Auiliili o le Tulafono Tau Faaofi i le Fuaiupu 2.

FUAIUPU 2: Faamatalaina o uiga o upu.

Faamaonia.

FUAIUPU 3: Faaaogāina.

Faamaonia.

FUAIUPU 4: Atunuu ua aloaia.

Faamaonia.

FUAIUPU 5: Galuega ua agavaa e teufaafaigaluega ai tupe.

Faamaonia.

FUAIUPU 6: Tagata e agavaa ai mo tupe teufaafaigaluega.

FOFOGA FETALAI: O lo o i ai le Teuteuga a le Komiti i le fuaiupu 6 e pei ona faaalua i le Pepa Faaopoopo o Galuega.

Tulai mai le Taitaifono o le Komiti.

Tofa TUISA TASI PATEA: Lau Afioga i le Fofoga Fetalai ou te faatu le Teuteuga i le fuaiupu 6(3) e faapea:

“TEUTEUGA:

i) Fuaiupu 6(3)

Ina ia aveese le upu “i lalo o” ma suia i le upu “mo” ina ia faitauina ai le (3) e faapea:

(3) Ae vagana ai ua faia se aofaiga ua fuafuaina mo le faafuaiupu (1), o le aofaiga aupito mauualalo ua fuafuaina e faapea:

(a) mo le faafuaiupu (1)(b), e \$4 miliona; ma

(b) mo le faafuaiupu (1)(c), e \$2.5 miliona.”

Tofa Levaopolo Talatonu: Lau Afioga i le Fofoga Fetalai.....

FOFOGA FETALAI: Tulai mai lau Afioga i le sui usufono mamalu.

Tofa LEVAOPOLO TALATONU: E puupuu lava se fesili lau Afioga i le Fofoga Fetalai i le vaega lea, masalo o lea ua manino ia tulaga uma i le agavaa o tagata mai fafo e teufaafaigaluegaina latou tupe. E tusa ma le miliona tala ona maua lea o latou nofomau. Ae pe ua oo se suesuega a lau

Afioga i le Taitaifono ma le Komiti i le tulaga foi lele, aua e i ai isi vaega e omai lava nofomau iinei e fia faaoga Samoa e nofonofono ai ma toe foi. O le tulaga foi lea o le uma o le 5 tausaga toe aveese tupe a o lea ua maua latou nofomau iinei. Pe ua oo ai se suesuega a lau Afioga i lenei tulaga, pe ua i ai ni conditions faapitoa e toe faaleaogaina ai? Ma le faaaloalo.

FOFOGA FETALAI: Malie le Taitaifono, tulai mai le sui usufono mo Faleata Sasae.

Tofa AVEAU TUALA LEPALE NIKO PALAMO: Lau Afioga i le Fofoga Fetalai na ona faapoopo atu i le fesili ona o lea ou te faitau atu i le Lipoti e toatele a ia e foi sa molimau na teena nisi o vaega o le Lipoti. A o lea e foliga mai e le o i ai lava se suiga o le Tulafono e pei ona i ai. A o lau fesili a i le \$4 miliona lea, aua o lea ou te vaai atu foi i le Lipoti o lo o i ai e o lo o manatu i le agavaa o le vaega lea i le faatauina o fanua lea e mafai ona faatau pei o fanua tumaoti. E pei ona silafia o tagata nei o le a omai e tele a latou seleni ma o le a faafaigofie foi ona maua seleni e faatau ai ia fanua o le atunuu pe afai e i luga o le maketi. E pei lava ona silafia o lenei vaitaimi o le matua tele lava fanua lea ua i luga o le maketi. O lou popolega la lau Afioga i le Fofoga Fetalai ona o lea o le a omai tagata nei, atonu o le agaga lava ia o le Tulafono e sao, ina ia taumafai e atia'e le tamaoiga o Samoa. Ae o lou popolega o lea o le a maua ai le avanoa i i e faatau ai fanua nei ma e pei lava ona silafia, a tagai i totonu o le maketi o le tele o fanua lea i luga o le maketi. O lea la o le a omai tagata e lava le seleni ma faatau, ia ona o le puipuiga lava ia o le Tulafono leaga e le mafai o lea o le a sesegi. Ae i ai lou manatu, pe le i ai se tuutuuga i le vaega lea ina ia taofiofia mai ai le faatauina o fanua e tagata nei e omai i lalo o le Tulafono lea?

FOFOGA FETALAI: O lea ua maua atu le fesili a le sui, tulai mai le Taitaifono.

Tofa TUISA TASI PATEA: Faafetai atu, o le fesili muamua a le Afioga i le sui usufono mo Gagaemauga Nu. 2, ia o lenei ua i ai fuafuaga i totonu o le tatou Tulafono ina ia aua nei tulai mai ia tulaga ia pei ona e taua ia i latou e le umi ona i totonu o le tatou system ia latou seleni ona toe mou atu lea i se vaitaimi. O lenei ua i ai ia fuafuaga uma pei ona faataatia i le Tulafono e le Komiti e aia tulaga ia ina ia mafai ona faatino tulaga uma ae lei taliaina ia i latou nei e omai e teufaafagaluega a latou tupe ina ia aua lava ne i tulai mai se faafitauli pei ona taua.

O le fesili a le sui usufono mamalu mo Faleata Sasae, ou te masalo o lo o taua i nisi o vaega o le tatou Tulafono e le i oo atu i ai, e le toe mafai ona faatauina ni fanua e i latou nei o lo o omai. Ou te masalo o lo o aiaia i le tatou Tulafono i nisi o vaega o lo o agai atu i ai.

Tofa Hon Fonotoe Nuafesili Pierre Lauofo (Sui Palemia, Minisita mo Pisinisi, Alamanuia ma Leipa): Lau Afioga i le Fofoga Fetalai.....

FOFOGA FETALAI: Ia le Afioga i le Minisita e ana le Tulafono.

Tofa Hon FONOTOE NUAFESILI PIERRE LAUOFO: E momoli atu le faafetai i le Taitaifono tusa ai ma le tali, o tulaga lava ia pei ona saunoa i ai. Ae manatua foi le faamalamalama o le Tulafono lenei i lona faitauga faalua sa faamatalaga auiliili ai le process lea pe a faatoai mai proposals. Pe a aumai se talosaga mo se atina'e e fia faatu i Samoa, e i ai lava le process e agai i ai le tulaga lenei e auiliili. O le tasi lenei tuutuuga o lenei vaega e tataua ona tino mai le atina'e lea i totonu o le 3 tausaga. Ia ma o le tele la o i si uma i le faagaioiga o atina'e o le a faapena ona tuu i lalo o le Tulafono Faatonutonu i faiga faavae. Ae o le faatauina o fanua lea e sao ia le sui usufono mamalu pei ona saunoa, i le aumaiga o le Tulafono Tau Faaofi lenei sa aofia ai ma le faatauina o fanua. A o lea ou te vaai atu tasi lea Teuteuga a le Komiti lea e faatulai mai lea o le a tatou faagasolo atu i ai, o le soloia po o le faataatiaese o le vaega lenei. O lona uiga o le a manino i ina le tulaga lea.

Tofa LEVAOPOLO TALATONU: Lau Afioga i le Fofoga Fetalai, faafetai i le Afioga i le Sui Palemia mo le faamalamalama. Po o tele atu lau faamatalaga i le tulaga lea o le toe faafoiina o tupe ia. E matauina lava i le tulaga lea e i ai investors e omai e invest i totonu i tupe la ia e teu i inei e faatino ai a latou atina'e e uma lava ona toe lafo uma i fafo. A silasila a outou Afioga e i ai le aso na ou tutu ai i totonu o le Bank o le isi faipisinisi Saina e matua'i tele lava o tupe, ae ou vaai atu i le tupe la e teu e le atoa se \$2,000. E pei o le mea lenei lea ou te fai atu ai pe i ai se tulaga o manatua ai le vaega lea e leaga o lea e pei na ona omai i inei na ona faafaigaluega ma toe lafo i o, ma le faaaloalo.

FOFOGA FETALAI: O lea ua maua le finagalo o le sui usufono, o si o ta uso lava le masalo. E manatu foi tatou te ave le faatuatua o lea ua saunoa le Minisita, e le i ela foi le vaai a le Komiti aemaise le Matagaluega na matua lauiliuina lenei Tulafono. E manatu foi e umi se taimi o tatou faalogologo ma faafofoga i le faitauga faalua o le Tulafono lenei. Ae ona o lea e pei e fou mai i le taimi lenei ae ua maea ona faamalamalama.

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai tusa o le vaega lea e fesili ai le sui usufono o le toe auina atu lea o tupe i fafo. E leai o lo o i ai lava ia aiaiga tumau o le tatou Faletupe Tutotonu, o lo o i ai le Tulafono e monitor ai ma mataitu lelei ia le feoaiga o seleni nei. Manatua foi o lea ua tele foi a tatou Tulafono e mataitu lelei mo mea ia o Tulafono tau money laundering. O lona uiga e i ai ma le tapulaa o tupe e mafai ona ave i fafo. E tataua foi ona talosaga laisene pe a faapea e fia auina i fafo se tupe tele. O lenei e i ai uma vaega faapena ua uma ona faataoto i lalo o le Tulafono a le Faletupe Tutotonu, e pei o le tulaga lea lau Afioga. Ae o le tulaga lea e saunoa i ai po o le refinance o funds ia leai e ese foi le Tulafono e i ai uma vaega na. Ia o le tali atu lea lau Afioga i le Fofoga Fetalai.

Susuga Hon TUILAEPA FATIALOFA AUELUA LUPESOLIAI NEIOTI AIONO SAILELE MALIELEGAOI: O se vaega e fia faamalamalama atili ona o le Tulafono lea faatoa agai i le faitauga lona tolu e lei oo la ina faatino. A faatino o lona uiga o lea i ai auala i i e mataituina ai i latou e omai e teufaafaigaluega i Samoa ini pisinisi ua faamaonia o le a tele ai

ni galuega mo a tatou fanau e maua mai ai. A o le tala la lea na aumai ia Levaopolo i Saina, ia e leai ni tupe o Saina tonu lava na e le aoga i ai le Tulafono lea, aemaise foi o oe lea e te fealuai solo ma au Saina. Ia ‘aua e te toe pipii i Saina na e leai ni a latou tupe e le o tagata na e moomia e le Tulafono lenei.

Faamaonia le Teuteuga.

Faamaonia le Fuaiupu 6 e pei ona Teuteuina.

FUAIUPU 7: Tupe teufaafaigaluega i fanua.

FOFOGA FETALAI: O lo o i ai le Teuteuga a le Komiti i le fuaiupu 7 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono.

Tofa TUISA TASI PATEA: Lau Afioga i le Fofoga Fetalai ou te faatu le Teuteuga i le fuaiupu 7(1),(2) & (3) e faapea:

“TEUTEUGA:

ii) Fuaiupu 7(1):

Ina ia soloia faaupuga “po o so o se fanua ua faatonuina” e pei ona aliae mai i le faafuaiupu 7(1) ina ia faitauina ai le (1) fou e faapea:

“(1) E mafai e se tagata ona teufaafaigaluega ana tupe ona faafaigaluega ana tupe i se galuega ua agavaa e teufaafaigaluega ai tupe, se aofaiga ua fuafuaina i le atiaaina, i totonu o le tolu (3) tausaga talu mai le aso o le talosaga, se lisi o se fanua o le Malo.

iii) Fuaiupu 7(2):

Ina ia aveese faaupuga “po o le faamaonia o so o se fanua ua faatonuina” ina ia faitauina ai le (2) e faapea:

(2) E mafai e le Minisita, i le i ai o le faamaoniga a le Kapeneta, ona faamaonia so o se fanua o le Malo lea e mafai ona tuuina atu ai se lisi e tusa ma le faafuaiupu (1) mo le faamoemoe o lenei fuaiupu.”

iv) Fuaiupu 7(3)

Ina ia aveese faaupuga “po o le faatauina mai o so o se fanua ua faatonuina” ina ia faitauina ai le (3) e faapea:

(3) E mafai e le Komiti ona fuafuaina pe faamatuu atu pe leai foi se lisi o fanua o le Malo i le tagata e teufaafaigaluega ana tupe a o lumanai ai le aso o le talosaga, pe o le a avea ai ma vaega o se galuega ua agavaa e teufaafaigaluega ai tupe i lalo o le faafuaiupu (1).”

Afuaga o le Teuteuga

Na laga lenei mataupu e nisi o molimau, peitai o le fuaiupu 7, na faamoemoe ina ia muamua ona faaaoga i le lisiina atu o fanua o le Malo, ma e ono mafai ona faalautele atu i se taimi o muamua, i fanua umia saoloto, la lea na mafua ai ona faaaoga o “fanua ua faatauina.” O fanua faaleaganuu o lo o faaalua manino le tulaga e le aofia ai i lalo o le fuaiupu 3(b).

Ua finagalo malie le Matagaluega ina ia aveesea faasinomaga uma i “**fanua ua faatonuina**” i totonu o le Tulafono Tau Faaofi.

FOFOGA FETALAI: Tulai mai le sui sufono mamalu mo Faleata Sasae.

Tofa AVEAU TUALA LEPALE NIKO PALAMO: Na ona ou tulai atu e momoli lau faafetai i le Komiti aemaise o le Matagaluega o lo o faia lea fuafuaga agai i le suiga lea o le Tulafono.

Ma le faaloalo lava.

Faamaonia le Fuaiupu 7.

Faamaonia le Fuaiupu 7 e pei ona Teuteuina.

FUAIUPU 8: Talosaga.

Tofa Lealailepule Rimoni Aiafi: Lau Afioga i le Fofoga Fetalai.....

FOFOGA FETALAI: O le a le fuaiupu le sui usufono mo Faleata Sisifo?

Tofa LEALAILEPULE RIMONI AIAFI: O le Fuaiupu 8.

FOFOGA FETALAI: Saunoa mai le sui usufono.

Tofa LEALAILEPULE RIMONI AIAFI: Lau Afioga i le Taitaifono, o le a se silasila a lau Afioga ma le Komiti. O le mea lea e tulitulia pea e finagalo ma manatu, o le tupe lea e aumai. Aua o le mea lea e manaomia e tatou o le

capital. O le tupe fou mai fafo e le o se tupe lea e i totonu o Samoa. A o le tupe lea e aumai mai fafo e faafaigaluega i totonu o Samoa, o le tupe lena o lea e naunau tatou i ai. O le aumaiga la o le tupe ina ia mautu vaega uma, e mautinoa ai o le tupe lea e aumai, e faaaoga tonu i le pisinisi. O lea e aumai loa fixed deposit, pe tuu i se account foi lea. O le mea la lea e atugalua ai lou manatu, po o i ai ni aiaiga e malupuipua ai, ma iloa ai, o le tupe tonu lea o le tupe mai fafo. O le tupe foi lea o le a faaaoga e fai ai le pisinisi iinei. Ne'i te'i ua aumai le tupe lea teu, ae aumai se tupe i totonu o Samoa faaaoga e fai ai pisinisi. Ina ia malupuipua, aua ne i aumai tupe invest ae aumai faaaoga loa e fai ai pisinisi.

FOFOGA FETALAI: Tulai mai lau Afioga i le Taitai o le Itu Agai.

Afioga Hon PALUSALUE FAAPO II: Mo le silafia le taumafai atu o lenei iltu i le Tulafono lenei, o le manatu lualuga o le Itu Agai. O le puipua o pisinisi a le atunuu. E pei o pasi, o taxi, o suisui, pisinisi, mea faapena, ne'i te'i ua faoina e tagata nei mai fafo. A o le fesili la e tauala atu i lau Afioga i le Fofoga Fetalai i le Taitaifono. E mautinoa la e puipua mea ia? O lea ua tatou vaai i le taimi lenei, ua tele ina leai ni faleoloa, ua tele ina tapuni faleoloa o tagata Samoa. O le atugaluga lena, ina ia silasila totoa, ia o mai fai pisinisi e le o faia e tatou. O le tulaga lea lau Afioga.

FOFOGA FETALAI: O lea ua maua le finagalo o lau Afioga. Tulai mai lau Afioga i le Sui Taitai o le Itu Agai.

Afioga Hon AEAU PENIAMINA LEAVASEETA: Lau Afioga i le Fofoga Fetalai, faafetai lava mo le avanoa. I tafatafa o le mataupu lea, faamolemole, o le mea lea e tuliloa atu o le breeding, o le tuuina atu o sitiseni. Sau ma lau investment, maua lau sitiseni. Faamolemole o le faia tonu lava lea, o lea e tuliloa atu. Se i faamalamalama mai, po o le a le ituaiga, aua e mafai ona e sau ma lau miliona ona maua lea o lau sitiseni. E tolu masina ua amata ona leiloa atu le miliona lea, po o i ai se leoleoga, Tulafono ma tafatafa o le Fofoga Fetalai.

FOFOGA FETALAI: Ou te taofi ua maea ona fai le lauiliuina o lenei mataupu i le faitauga faalua. O lea foi ou te matau na saunoa faa-Minisita le Afioga i le Palemia i se tasi o tatou Fonotaga umi lava. E tolu itula o fai le saunoaga e faamalamalama ai le Tulafono lenei. Ona ou manatu lea, ina ne'i te'i ua tatou toe taavili i tua i mea ua uma ona tatou asa mai ai, ona umi lea o le tatou Fonotaga. Ae malilie sui usufono, everything is understandable.

Tofa LEVAOPOLO TALATONU: Lau Afioga i le Fofoga Fetalai, o le mea fou lava lea ou te fesili atu ai. A o le taua ia....

FOFOGA FETALAI: Ia se i aumai lena mea fou.

Tofa LEVAOPOLO TALATONU: O lea ua manino nei o le a avea ma tagatanuu le vaega lea e invest mai le \$4miliona. O lau fesili la e puupuu, e agavaa le vaega lea e loan mai le NPF e faaaoga ai le fix deposit. E tasi lava le loan a tama ia, uma tupe ae le iloa po o fea e agai i ai le atunuu e loan ai.

FOFOGA FETALAI: O na foi e i ai faiga faavae a le NPF ia. Ae o le a lafo atu pea, se i tulai mai le Taitaifono.

Tofa TUISA TASI PATEA: Faafetai. E taua fesili. Ona ne'i te'i ua aumai fesoasoani mai fafo, latou o lo o aumai a latou seleni e teu faafaigaluega i inei. Ae te'i ua tatou tilotilo atu ua toe agai i fafo i isi itu. Ou te talitonu, o totonu o lenei Tulafono, ua faataatitia ai ia fuafuaga uma ia i latou i le Komiti lea e i ai uma tulaga nei. E pei lava foi ona faamalamalama i le taimi na faatalanoaina ai i le second reading, ua uma ona faataatitia uma tulaga nei. A o le fesili fou lea na aumai nei, ou te talitonu ailoga e oo i lea tulaga. Aua o milionea lea e o mai e aumai le \$4miliona mai fafo. Ailoga e toe i ai se isi e toe alu e loan i le NPF? A alu atu foi i le NPF, o lo o faataatitia lava fuafuaga ma faiga faavae a le NPF, e aiaia ai tulaga faapea.

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai, e i ai lava si vaega lea e tasi e tataua ona avatu ai se faamalamalamaga.

FOFOGA FETALAI: Tulai mai lau Afioga.

Tofa Hon FONOTOE NUAFESILI PIERRE LAUOFO: Faafetai i lau Afioga o lea sa e saunoa foi i tulaga o felafolafoaiga i le faitauga faalua. O lea ou te vaai atu i au faamaumauga, e fa lelei aso o felafolafoai le Maota i le Tulafono Tau Faaofi lenei. E pei o le mataupu lenei o lea e taua ai le tapunia o se faleoloa e pei o tua i afioaga po o se nuu foi. O ituaiga pisinisi po o atinae ia, na o lo o manino i lalo o le vae na e pito i tua, le settle o le Tulafono Tau Faaofi lenei. E le o aofia ai faleoloa laiti i nuu i tua. O lona uiga na o atinae tetele. E leai la se mea o le a tapunia ai fua nisi tamai faleoloa i afioaga i tua.

E pei o le tulaga lea lau Afioga, o lea e manino ituaiga pisinisi e agai tonu i ai le invest lenei.

Susuga Hon TUILAEP A FATIALOFA AUELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai, e toe faaopopo atu. E i ai le manatu lea sa aumai, e atugalua i sau se isi, aumai a latou tupe teu, ona o mai lea e faaoga tupe ia e i totonu. Mo sina faataitaiga: A sau se isi mai fafo e aumai sana \$20miliona, ona alu lea deposit i le faletupe ae alu i le NPF aumai ai se \$20miliona ae ua teu lana... E faavalevatea tele lenei mea. Aua o lana tului e ave i ai na o le 3% lana tului la e maua. Na o le \$600,000 lana tupe e maua i lana deposit, ae miliona le tului e totogi i le loan lea o le a fai pe sili atu foi. E leai la se vale faataitai e sau mai fafo ma ana tupe, ona sau lea tuu ae alu e loan mai, e gau ai. Ona o lea e i ai taiala, e le mafai ai ona tupu ni mea faapena. E oo foi la i atinae tetele ia tatou te naunau i ai. Se o ituaiga atinae foi ia e i ai faleia, faleia tetele, tai pei o le Yasaki, faletalimalo tetele. E pei o le mea lenei o lea e agai i ai, e tele galuega a tatou fanau e maua ai. O le faalavelave lea, e i ai le mind set lea o lo o i ai. O lea e agai i faleoloa, e le o mea na o lea e manatunatu i ai. O mea tetele, o kamupani tetele, o lea e manao i ai lo tatou atunuu e tele galuega mo a tatou fanau e maua mai ai.

Lau Afioga i le Fofoga Fetalai, o le agaga lenei o le Tulafono.

Tofa Lealailepule Rimoni Aiafi: Lau Afioga i le Fofoga Fetalai.....

FOFOGA FETALAI: Saunoa mai le sui usufono mo Faleata Sisifo.

Tofa LEALAILEPULE RIMONI AIAFI: Ona o au lea sa fesili i le vaega lea. Manatua foi, o le \$4milionia e le o se tupe tele. Ae fia sau la e aumai se return, e te sau la e deposit lau \$4milionia lea ae faamoemoe i totonu o Samoa. Faataitaiga: E le aumaia se \$6milionia pe fia e fesoasonai i lau investment lea. O le mea la lea ou te popole ai, a e sau ma lau \$4milionia lea, e faaoga uma lava lau \$4milionia lea, invest, aua le faamoemoe mai i le capital, le tupe lea e maua i totonu o Samoa lea e taumafai tatou i ai. O le popolega lena. Aua e omai, o tagata o business mai Germany lea e saunoa e tele tupe. A sau loa faaoga faaalu loa, aua le toe teua....

FOFOGA FETALAI: O lea ua maua le finagalo o le sui usufono.

Faamaonia le Fuaiupu 8.

FUAIUPU 9: Suesuega auiliili.

Faamaonia.

FUAIUPU 10: Faagasologa o talosaga.

FOFOGA FETALAI: O lo o i ai le Teuteuga a le Komiti i le Fuaiupu 10. Tulai mai lau Afioga i le Taitaifono o le Komiti.

Tofa TUISA TASI PATEA: Lau Afioga i le Fofoga Fetalai ou te faatu le Teuteuga i le Fuaiupu 10 (1) e faapea:-

“TEUTEUGA:

v) Fuaiupu 10(1)

Ina ia faaofi faaupuga “po o, se sui o le aiga, i se itu e talafeagai ai” i le tuana'i ai o le upu “tupe” ina ia faitauina ai le Fuaiupu 10(1) e faapea:

“10. Faagasologa o talosaga –(1) E le tatau ona taliaina se talosaga pe afai o le tagata o lo o teufaafaigaluega ana tupe po o, se sui o le aiga, i se itu e talafeagai ai:

(a) sa ia po o ua talitonuina lona tuuina atu o faamatalaga sese po o e taufaasese i totonu o le

talosaga po o faamatalaga e lagolago ai le talosaga; po o”

Afuaga o le Teuteuga

O lenei Teuteuga na laga a o faagasolo le felafolafoaiga i le Faitauga Faalua o le Tulafono Tau Faaofi. O le Teuteuga o le a faamautinoa ai le aofia ai o sui o le aiga.

Faamaonia le Teuteuga.

Faamaonia le Fuaiupu 10 e pei ona Teuteuina.

FUAIUPU 11: Pemitā o le tagata e le nofomau.

Faamaonia.

FUAIUPU 12: Faavaeina.

Faamaonia.

FUAIUPU 13: Galuega tauave.

Faamaonia.

FUAIUPU 14: Fonotaga.

Faamaonia.

FUAIUPU 15: Talosaga tetee.

FOFOGA FETALAI: O lo o i ai Teuteuga a le Komiti o lo o faaalā i le Pepa Faaopopo o Galuega.

Tulai mai le Taitaifono o le Komiti.

Tofa TUISA TASI PATEA: Lau Afioga i le Fofoga Fetalai, ou te faatu le Teuteuga i le Fuaiupu 15 (3) e faapea:-

“TEUTEUGA:

vi) Fuaiupu 15(3):

Ina ia faaofi faaupuga “e tusa ai ma taualumaga ua faatonuina.” i le tuamai ai o le upu “Tetee” ina ia faitauina ai le (3) e faapea:

(3) E mafai e le Komiti o Talosaga Tetee, e tusa ai ma taualumaga ua faatonuina, ona:

- (a) faafogaina ma faia le faaiuga o le talosaga tetee; ma**
- (b) faaleaogaina le talosaga tetee ma faamaonia le faaiuga a le Fono ina ia talia le talosaga; po o**
- (c) e faatagaina le talosaga tetee ma talia le talosaga mo tulaga o tagatanuu.”**

Afuaga o le Teuteuga

O lenei Teuteuga ua faia ina ia faamanino ai e faapea, afai e fuafuaina e se Komiti o Talosaga Tetee ni talosaga tetee, e ao ona faia e tusa ai ma taualumaga ua faatonuina e Tulafono Faatonutonu ua faia i lalo o le Fuaiupu 24 o le Tulafono Tau Faaofi.

Faamaonia le Teuteuga.

Faamaonia le Fuaiupu 15 e pei ona Teuteuina.

FUAIUPU 16: Pemita o le tagata nofomau.

FOFOGA FETALAI: Tulai mai le sui usufono mamalu.

Tofa LEALAILEPULE RIMONI AIAFI: E avatu le faamalo ma le faafetai i lau Afioga i le Taitaifono. E faamalulu atu i se taimi ua fano e tusa ai ma tatou felafolafoaiga. A o le Fuaiupu 16, ou te fia fesili i le mea lea, aua o lea faatoa pasia le Tulafono lea ua maea atu nei. O lea e faapea mai, family. O le tagata o lo o nofomau, e aofia ai ma lona aiga, tamaiti. O lea la ua aumai ai i le faauigaina o le upu tamaitiiti, 18 tausaga i lalo ifo. O le mea lea o lea e fia fesili ai i lau Afioga, pe leai la se feteenaiga ma le Tulafono lea na maea atu nei? Ma le faaaloalo lava.

FOFOGA FETALAI: Tulai mai lau Afioga i le Taitaifono.

Tofa TUISA TASI PATEA: E leai se feteenaiga. O lena e manino le Tulafono ia, o le Tulafono lenei e ese foi le tatou Tulafono lena o le faauigaina o upu, se i vagana ua i ai se feteenaiga. Ona ave lea o le faitalia i le faamasino o lo o faia, e tagai ma tilotilo i ai ma fuafua tataui, i le tulaga e

tatau ona i ai. A o le 18 e pei ona taua, e leai o le itu lava lena, ina ne'i te'i foi ua maumau avanoa e pei ona aumai e le 21 e pei ona taua muamua, ae taua tele. Ona o nai tamaiti o lo o vaetama e fia ave i fafo. E tele foi le latou sao pe a taunuu atu i le la atunuu, e fesoasoani mai i le tatou tamaoiga. E pei o le agaga o lenei Tulafono. Faafetai.

Susuga Hon TUILAEPA FATIALOFA AUELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai, i le faatulagaina o mea faapenei, e mafai ona ou faapea atu, o le faatumutumuga lava o mea uma, o le national interest. E tatau ona fai ma ave i ai le faamuamua i le national interest. Ou te iloa ua malamalama sui usufono.

Faamaonia le Fuaiupu 16.

FUAIUPU 17: Faamatuu atu o tulaga tagatanuu e ala i tupe teufaafaigaluega.

FOFOGA FETALAI: O lo o i ai le Teuteuga a le Komiti o lo o faaalua i le Pepa Faaopoopo o Galuega.
Tulai mai le Taitaifono o le Komiti.

Tofa TUISA TASI PATEA: Lau Afioga i le Fofoga Fetalai ou te faatu le Teuteuga i le Fuaiupu 17(1) e faapea:

“TEUTEUGA:

vii) Fuaiupu 17(1)

Ina ia faaofi faaupuga “e aofia ai se sui o le aiga po o ni sui” i le parakalafa (a) & (c) o le (1) e faapea:

- (a) E aofia ai se sui o le aiga po o ni sui na aumau i Samoa a itiiti mai e 15 aso i le tausaga a o faagasolo le vaitaimi e tolu (3) tausaga o le pemita o le tagata nofomau; ma**
- (c) e aofia ai se sui o le aiga po o ni sui ua tausisia so o se isi lava manaoga ua faatonuina.”**

Tofa AVEAU TUALA LEPALE NIKO PALAMO: Na ona ou faafesili atu lava i le vaega lea. O lea ou te vaai atu o lea e teuteu mai i i. A o le vaega lea 17a, o lea e faapea mai e aumau i Samoa e itiiti mai le sefululima aso, e mafai ai ona agavaa se isi po o nisi o aiga e apply i le nofomau lea. Se i faamalamalama mai lava lau Afioga i le Taitaifono. O le 15 aso lea e sau i i e na o le 15 aso e mafai ona nofo ai le tagata lea i Samoa ona mafai lea ona agavaa i le talosaga lea? Ma le faaloalo lava.

Tofa LEALAILPULE RIMONI AIAFI: Lau Afioga i le Fofoga Fetalai, i le Vaega lava lea faamolemole, o lea mea lea e taoto mai i le Tulafono atoa, o le omai o tagata foi nei e aumai tupe, investors. Afai e maua e... e i ai le investor lea e ma te mafuta ou te iloa e le o misi, ou te talitonu o lea ua uma ona invest iinei i Samoa le \$10miliona, e le faapea e naunau i se saving, a ua maea ona tuu lana tupe lea i totonu. O le uiga o lau tala, a i ai ni tagata faapea e naunau e faafaigaluega ni tupe faapea i Samoa i se amount tele, o le a le mea ua toe tuu ai lea pa puipui? O lea ua 15 aso i le tausaga, tatata, e le toe pologa. A le omai lava o tamaloloa pei o le mea lea sa tupu i le Yazaki....

Susuga Hon TUILAEPFA FATIALOFA AUELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai, afai e sau lava le tagata ia o le Chairman, na te le faatauaina foi le 15 aso, pe na o le 2 foi aso, na te le faatauaina, pe afai lava e sau e Chairman, e le taua le pa puipui, ae taua le mea lea e sau e fai.

Tofa LEALAILPULE RIMONI AIAFI: Lau Afioga, e pei lava o le ala lea. Ua outou faaleaga lena 15 aso, ae i lou talitonuga, tatata le avanoa ia i latou, a uma lava le tausaga e le toe sau, ia... a ua toe faaleaga lava e le 15 aso lena. Faafetai lava.

FOFOGA FETALAI: O lea ua ou maua lou finagalo. E i ai se isi mea faaopoopo lau Afioga i le Taitaifono?

Tofa TUISA TASI PATEA: Masalo o lena ua manino, o le tele foi o le aufaipisinisi i fafo, e seasea ona omai nonofo iinei. Ae ala foi ona ave i ai le 15 aso lea, ina ia taumafai ai e encourage ma fesoasoani mai i le tatou faamoemoe pei ona i ai le fuafuaga pei ona i ai nei le tatou Tulafono.

Susuga Hon TUILAEPFA FATIALOFA AUELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai, se i toe faalautele atu lava le mataupu lea. O tagata ia e omai, e le na o le pau ia o latou pisinisi, tagata ia e naunau i ai le Tulafono. O la e i ai latou pisinisi i Hong Kong, Ausetalia, Sigapoa, Malaysia ma Indonesia. O lona uiga la, a sau iinei, na pau lava le mea e sau ai pe atoa le lua i le tolu aso o faatalanoa ma le Sui Palemia, aua o ia lea e nafa ma mataupu ia suetupe. Pe tasi le aso ua soo atoa tagata e faatalanoa, a o le isi aso ua tietie i le taavale e alu e matamata i tua i nuu mananaia e tai pei o le mata Aleipata faasolo mai i i i itumalo na e sosoo atu ai, e aupito mananaia i tua i Atua. Ona oo loa lea i le isi aso toe tietie i le vaalele toe alu i fafo, ae faatonu la tama ma ana loia ia faatino loa le mea lea ua vaai i ai. Pe na o le tolu lava aso iinei, e pisi e feoai e taamilo i le lalolagi e vaai a latou pisinisi. E i ai le tagata faapena na sau, o au la lena ua sagisagi atu e talau i ai a tatou incentives ae ua ou te'i i lo'u faalogo atu, o, se o lea e sau e tafao. Na sau e tafao, o la e ou te nofo mai Niu Sila, faatau ai lo'u fale tele lava, e faaoga la Niu Sila ou te sau ou holiday ai, e lua la vaiaso ona ou alu loa lea i Niu Sila ou tafao ai, a o au pisinisi uma lava la e i Sigapoa, ma i i Ausetalia ma Saina. Ou fai atu, "Ae a Niu Sila?" "Oooh it's a tiny market, it's a small market. E le taulia ia matou nei e tele le seleni matou te o e invest i atunuu i fafo."

Lau Afioga i le Fofoga Fetalai, o le tulaga lena, ua ova mamao le 15 aso ia, again, national interest.

Tofa Aveau Tuala Lepale Niko Palamo: Lau Afioga i le Fofoga Fetalai...

FOFOGA FETALAI: Tulai mai le sui usufono mo Faleata Sasae.

Tofa AVEAU TUALA LEPALE NIKO PALAMO: E i ai lava le faaupuga foi lele, aua le manao i le i'a a e manumanu i le upega. O le faaupuga lea ua sui ai le Tulafono lea, "sui po o ni sui." O le faaupuga la lena o lea ou te tau atua, e 60 sui o le aiga lea o lea o le a i totonu o le 15 aso o lea o le a talia i lalo o le talosaga a le milionea lea. O lea mea lena o lea e faapea ai lou manatu, pe aisea le mea ua toe sui ai le Tulafono lea i sui po o ni sui i le 15 aso. Aua afai nei e fai i le mea lea e saunoa ai nisi o sui usufono e tatala le avanoa ia aua ne i i ai ni aso, e lafo mai lava i Saina aumai le \$4miliona e nofomau uma lava sui o tagata ia e i o. E pei o le agaga lena.

Susuga Hon TUILAEPA FATIALOFA AUELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai, ua ova i le 30 tausaga o ou galue i le Malo, aofia ai ma le taimi lenei. Sa ou galue i le Economic Developed Countries e faatalanoaina i latou uma nei mai fafo ma tapena fautuaga mo pisinisi i le Malo a Tamasese ma Mataafa. O le taimi lena. O mataupu lava ia sa faatalanoa i le taimi lena ma iloa ai. O tagata nei e omai fafo, aemaise lava le vaega lea matutua, o le tele lava o aiga, aemaise... o le mea lea e maua ai foi tatou, tasi lea atalii, pe toalua. O le mea lena o lea ua agai i ai le lalolagi. I Iapani, o lea ua fesootai mai au e le tatou Amepasa, o le mea lea ua tupu i atunuu nei, aemaise o Saina le isi atunuu, sa taofiofi, e malolosi tele a latou fuafuaga foi nei aiga fuafuaina. O le tele la o isi atunuu developed, atiae o le lalolagi, ua oo i le tulaga foi lea ua matutua tagata a ua tau le lava le autalavou, ona o mea na o aiga fuafuaina, ua malosi tele le mea lea, aemaise lava o le mea lea o le talaiga lea e alu i tina, talaiga lea e alu i tina ia la outou aiatatau, tou te galulue ai pei foi o tamaloloa. O le mea la ua tupu, o lea foi ua tupu i inei, o le uma mai lava o le aoga a lea, ua tau le faatāuaina le mea lea o le fai o tamaiti. Ma o le tele lava la o isi aiga, ua tele lava i le taitoatasi, taitoalua. O Saina, ou te le iloa pe faatoa tatala lata mai nei le toalua, ae o le mea sa i ai, na o le toatasi lava le tamaitiiti e faataga a le ulugalii Saina, e tasi, ona ua televave tele le faatupulaia o tagata, e 1.3pilion. O Initia, e 1.2pilion, e oo atu i le lima tausaga ua oo atu i le 1.8pilion Initia ae 1.7pilion Saina. O le mea la ua tupu i le lalolagi, ua meme'i le toatele o aiga, lea foi la ua lavea ai Samoa, i le manatu lava lea, o outou tina, fai la outou aiatatau aua le faataua lena mea o le fai o tamaiti ae faaoga le tou malosi e lagolago ai i le fulisia o le Malo ma pisinisi. O le tulaga la lena ua i ai. Ua ala ona ou fai atu, a talanoa mai nei le Itu Agai, pe a sau le tagata ma le 60 o lona aiga, o fea e aumai ai na tamaiti? Lau Afioga i le Fofoga Fetalai, se matua outou fefefe vavale tele, o lea e taumafai atu ia omai tagata i i. A aumai se tamaitiiti pe na o se toatasi, a o le sau o le tagata e sau i totonu i i, o le tagata e pule i ana tupe, ona sau loa lea i i hire le loia, "Vaai ifo mea ia ou te manao e fai, o oe o le a faatinoa uma le negotiations, vaai uma ma isi tagata faigaluega ia e galulue faatasi mo le faatuina o le fale i'a lea, ae faatalanoa e outou ma le Sui Palemia ma le

aufaigaluega faapea le aufaigaluega a le Matagaluega o Tupe ma le aufaigaluega a le Tiute ina ia maua uma e tatou aiaiga uma a le Malo e fesoasoani mai ai i le taimi e amata ai le tatou galuega.”

Lau Afioga i le Fofoga Fetalai, soia tou te palaa'ai.

Afioga Hon PALUSALUE FAAPO II: Lau Afioga i le Fofoga Fetalai o se mea e fia faamalamalama, matou te le o palaaai, leaga o mea ia o lo o vaaia i le taimi lenei, e o atu i se faleoloa, o le Saina le tama ma le tina ma tamaiti la e feoi mai, ua amata ona aumai ma o latou aiga, ma lana fanau Saina i le isi fafine. O le mea lena o lea e popole i ai. Ma te le o palaaai.

FOFOGA FETALAI: O lea ua maua lou finagalo.

Susuga Hon TUILAEPFA FATIALOFA AUUEUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai, o le Saina lea o Frankie, e nofo i le teine Samoa, ma ua naturalize o le Samoa. O Westerlund, o le Saina Samoa.

Afioga Hon PALUSALUE FAAPO II: Lau Afioga ou te le o talanoa atu i Saina ia aua o Samoa.

Susuga Hon TUILAEPFA FATIALOFA AUUEUA LUPESOLIAI NEIOTI AIONO SAILELE MALIELEGAOI: Ia o le tulaga lena lau Afioga, e te vaai i ai, e tumutumu i tagata Samoa, o tagata e le maua le tupe maua, auā foi e taugofie oloa ia e maua i totonu o le fale o Frankie, e le gata ina taugofie, ae telē le eseese toe lelei oloa.

Lau Afioga i le Fofoga Fetalai, o le tulaga lena, o lea tatou te talanoa i mea foi nei sa ou fai atu ai analeila, o le kamupani moomia o lea e agai i ai le Tulafono, o fale i'a, o mea o fale e fau ai taavale, fau ai vaalele, fau ai mea o hotels tetele. O le mea lena o lea e agai i ai. E tiga lava ona talanoa atu i nei mea tetele, ae tou talanoa mai lava i faleoloa e faatau ai suka ma aisakulimi. E le o le mea lena o lea e agai i ai le Malo, o mea tetele, e maua ai galuega a fanau, ae le o talanoa atu i ni suka ma ni aisakulimi.

Tofa LEVAOPOLO TALATONU: Lau Afioga i le Fofoga Fetalai o le mea e fia faasao. E pei o le tulaga lea e tau avatu lau Afioga i le Fofoga Fetalai, ua alu tele i tua le Tulafono, ae sa tatau lava ona manino mai le immediate family. O lea e manino mai le faa-Peretania, including any family members. O lona uiga pe aiga lava e sau uma lava i le talosaga lea a le tagata e toatasi. O le atugaluga lena lau Afioga i le Fofoga Fetalai.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, o lea ou te talanoa atu lava i upu o lo o i totonu o le Tulafono. Ou te le o talanoa atu foi i Saina po o... e 800,000 miliona tagata ia e suesue avanoa solo i Europa, o tagata nei, o tagata e lava le seleni. E tau loa i le Tulafono lenei, lona uiga o lea ua i ai le avanoa e omai ai leaga o lea e sau i i, ae sa manaia pe ana faapea, po o ni sui i lalo ifo o le lima po o le tolu. O se vaega foi lea e tau puipui ai...

Susuga Hon TUILAEP A FATIALOFA AUELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai, e le na o tatou e i ai le Tulafono lea, e le na o tatou, o la e fai uma e atunuu, a o lea e i ai lava le tatou faamoemoe, e tilotilo ane tagata i le tatou Tulafono, faapea loa, “oi sole, o lea foi e i ai le Tulafono a Samoa e pei foi o le Tulafono a Ausetalia, o Niu Sila, e pei foi o le Tulafono a isi atunuu. O lea ou te faalogo foi e i ai le Tulafono a Fiti, ae i ai foi la le Tulafono a Samoa.

E pei o le tulaga lena, ne’i te’i ua faapea na o tatou, e leai o mea ia o lea e fai uma e le tele o Malo i le tau sailia o ni galuega mo a latou tama fanau. O le matua toatele o a tatou fanau lea e le i uma mai aoga, ae ou te le iloa pe ou te... a o lo’u ofisa, na o le o atu o atu o matua ua iu mai latou fanau mai fafo ma tikeri, ae au i le fia masina o nofonofo i le fale o tau sue se galuega.

Lau Afioga i le Fofoga Fetalai, o le tulaga lena lea e naunau i ai le Malo, ina ia atinae, o le mea lea e ala ai ona matou o so’o i fafo ina ia faatalanoa ma Niu Sila ma Ausetalia i le tulaga o latou scheme, RSE Scheme a le maua loa le nofomau i i, o loa e tau apu. A o foi la e tau apu, e o atu e atamamai, e le umi lava ae fai mai lea, “oi sole, o le tama lea na sau, o lea o le a faafesootai pe mafai ona nofomau ai i Niu Sila e faigaluega ai i i e lelei tele i le faafoega o galuega.

Lau Afioga i le Fofoga Fetalai, e lautele le mea lea e vaai i ai le Tulafono.

Faamaonia le Teuteuga.

Faamaonia le Fuaiupu 17 e pei ona Teuteuina.

FUAIUPU 18: Tuutuuga o le tulaga tagatanuu i tupe teufaafaigaluega.

FOFOGA FETALAI: O lo o i ai le Teuteuga a le Komiti i le Fuaiupu 18 e pei ona faaalua i le Pepa Faaopoopo o Galuega.

Tulai mai le Taitaifono o le Komiti.

Tofa TUISA TASI PATEA: Lau Afioga i le Fofoga Fetalai ou te faatu le Teuteuga i le Fuaiupu 18(3) e faapea:

“TEUTEUGA:

viii) Fuaiupu 18(3)

Ina ia soloia faaupuga “i lalo o” ina ia faitauina ai le (3) e faapea:

“(3) afai e leai se aofaiga na fuafuaina mo le faafuaiupu (2), o le aofaiga fuafuaina i le tapulaa maualalo mo lena faafuaiupu e \$1miliona.”

Faamaonia le Teuteuga.

Faamaonia le Fuaiupu 18 e pei ona Teuteuina.

FUAIUPU 19: Faalēaogāina o pemitā po o tulaga o tagatanuu.

FOFOGA FETALAI: Tulai mai lau Afioga i le Taitaifono o lo o i ai le teuteuga i le Fuaiupu 19.

Tofa TUISA TASI PATEA: Lau Afioga i le Fofoga Fetalai ou te faatu le Teuteuga i le Fuaiupu 19(1) e faapea:

“TEUTEUGA:

ix) Fuaiupu 19(1)

Ina ia faaofi faaupuga “mo se sui o le aiga” i le parakalafa (c), (d), (e), (f) & (g) ina ia faitauina ai le faafuaiupu (1) e faapea:

- (c) mo se sui o le aiga ua faamaonia moliaga faaletulafono i Samoa po o so o se isi lava atunuu mo se soligatulafono lea e i ai se faasalaga po o le nofosala i le falepuipui a itiiti mai e lima (5) tausaga; po o
- (d) mo se sui o le aiga ua avea o se lamatiaga e ono tulai mai mo le puipuigamalu o Samoa po o so o se isi lava atunuu; po o
- (e) mo se sui o le aiga ua aafia i so o se gaoioiga lea e mafua ai po o e ono mafua ai le tauvalea o Samoa; po o
- (f) mo se sui o le aiga ua tuuina atu faamatalaga sese po o e tau faasese po o faamatalaga ia sa faamatuu atu ai le talosaga; po o
- (g). mo se sui o le aiga ua le mafai ona tausisia so o se isi lava manaoga ua faatonuina.”

Afuaaga o le Teuteuga

E tutusa lava mafuaaga ma meataitasi 3 fuaiupu 10.

Faamaonia le Teuteuga.

Faamaonia le Fuaiupu 19 e pei ona Teuteuina.

FUAIUPU 20: Faalauiloaina ma le maketiina.

Faamaonia.

FUAIUPU 21: Sooupu.

Tofa Aveau Tuala Lepale Niko Palamo: Lau Afioga i le Fofoga Fetalai.....

FOFOGA FETALAI: O le a le fuaiupu Aveau?

Tofa AVEAU TUALA LEPALE NIKO PALAMO: O le Fuaiupu 20 ma le 21 faamolemole. O lau fesili o le fuaiupu lea e 20 lea faapea o le promotion and marketing po o le faalauiloaina o le Tulafono lenei. O lea e faasa ai se tagatanuu ona alu e talatalanoa i sana uo faapea e i ai le matou Tulafono lea, pe mafai ona e sau ae ou agent ia oe. E pei e foliga mai o le a lesitala ni tagata e mafai ona talatalanoa faapea i ni tagata e faatinoina lenei vaega. O lau fesili pe aafia ai la le vaega lea faamolemole lau Afioga i le Taitaifono, pe a faapea ou te alu atu i se fononua ae ma fetauti ma se tagata o lea e fia invest i nei ae ou tago faaali i ai le Tulafono lea ia ona faapea mai lea, ia sau la oe ta te o ta te toalua. E puipuia i lalo o le vaega lea? Pe tatau lava ona ou alu i le Minisita e aumai se tusi faamaonia a le Minisita ma fai la'u application o au lea o le a ou agent po o au lea o le a ou alu e promote le Tulafono lenei. Ae aisea foi le mea o le a fai ai lea vaega o lea na saunoa le Malo o lea e taumafai e talai atu le talalelei i tagata e omai. Ia a o lea foi o le a toe fai ia tuutuuga, atonu e aoga i ni tagata faaletonu.

FOFOGA FETALAI: Malo, ia lea ua maua lou finagalo.

Tofa LEVAOPOLO TALATONU: Lau Afioga i le Fofoga Fetalai, o le fuaiupu 23 faamolemole.

FOFOGA FETALAI: Malie le sui usufono o lea tatou te le i oo i ai se i tatou o'o i ai. E i ai se isi faamalamalama lau Afioga i le Taitaifono? Se i tulai mai le Afioga i le Sui Palemia.

Tofa Hon FONOTOE NUA FESILI PIERRE LAUOFO: Lau Afioga i le Fofoga Fetalai manaia le saunoaga a le sui usufono mamalu lea faatoa maua atu nei le to'oto'o. E leai lava ma se pa puipui i lena vaega a e finagalo a oe e te alu e te talatalanoa i ni au uo po o ni aufaipisinisi ma faaali i ai ma le tatou Tulafono e matua lelei lava. Manatua foi o tatou Tulafono uma nei la ua i luga uma o le website pei ona silafia e mafai foi ona o latou silasila i ai ma faitau i ai. E leai la ma se mea e taofia ai lena vaega, na o le pau le mea lea e aumai i i o le agent lea le tagata foi lea ua tofia faapitoa e galue i le tuufaatasiga uma o mea ia e saunoa ai le Palemia. A omai tagata e mafai ona o engage pe faaoga se consultant po o se Loia po o se Accountant. O tagata la faapena e mafai la ona apply ina ia tofia latou e avea ma agents ae o le tulaga lava ia o le malaga i fafo ma talatalanoa i le aufaipisinisi i fafo, e le

taofia lena vaega o se tulaga lelei. Ia ma e fautuaina ia matua fai lava lena vaega ia matua tele ni tatou faipisinisi e omai ai.

Faamaonia le Fuaiupu 21.

FOFOGA FETALAI: O le tatou taimi o lea ua toe lima (5) minute i le itula e tasi (1), ona o le tatou taimi faatulagaina i le aso, tatou te manava i le itula e tasi tusa ai ma le tatou taimi faatapulaa. Ae peitai ua ou manatu e laititi le vaega lea e totoe o tatou galuega o le aso, e sili ai le tatou papaaveloa i tulaga talafeagai e faigofie ai ona tatou le toe omai ai lea nanei. O le tulaga sa'o lena ina ia faataatia i lagotonu, o lea ou tapa ai lau Afioga i le Palemia mo le lafo.

LAFO MO LE FAAAUAUINA O ITULA FONO

Susuga Hon TUILAEPA FATIALOFA AUELUA LUPESOLIAI NEIOTI AIONO SAILELE MALIELEGAOI: Faafetai i lau Afioga i le Fofoga Fetalai toe itiiti a nai mea ia e totoe, o lea ou tulai atu ai lau Afioga i le Fofoga Fetalai e faatu le lafo, *Ina ia faataatiaese le tatou Tulafono Tumau 31(1) e avanoa ai le faaauau o le Tulafono seia mae'a tatou galuega tau i le Malo i le Pepa o Galuega o lo o taoto i lumamea.*

Faaluaina e le Sui Palemia, Minisita mo Pisinisi, Alamanuia ma Leipa, Minisita mo Tupe Maua ma le Minisita mo Galuega tau Alamanuia ma Atinae a le Malo.

Na faamaonia le lafo.

FOFOGA FETALAI: E faamalulu atu foi ona sa i ai nisi o semina taua a le Matagaluega o Fuainumera Faamauina, o le a faatinoina lava le semina lenei pe a mae'a le tatou Fono ona o tulaga ina ia ogatusa ma le talosaga ua mae'a ona tuuina mai. O mataupu laiti e faatau e le Matagaluega o Fuainumera Faamauina mo le silafia e le paia ma le mamalu o le tatou Maota. O lea e faailoa aloaia atu ai e faataunuina lava le tatou semina lenei pe a uma ma tali ai la outou sua ona malolo ai lea. E talosaga atu i le paia ma le mamalu o le tatou Maota ina ia tatou auai faatasi i le Ofisa o le Fono o lo o i fafo atu e faataunuina ai lenei faamoemoe.

FUAIUPU 23: Aofaiga o tupe fuafuaina ma pepa faatumu faamaonia.

FOFOGA FETALAI: O lo o i ai teuteuga a le Komiti o lo o faaalua i le Pepa Faaopoopo o Galuega.
Tulai mai lau Afioga i le Taitaifono o le Komiti.

Tofa TUISA TASI PATEA: Lau Afioga i le Fofoga Fetalai ou te faatu le Teuteuga i le fuaiupu 23 e faapea:

“TEUTEUGA:

x) Fuaiupu 23:

Ina ia soloia le parakalafa (b) o lo o i ai, ae toe faatulaga le (c) e avea ma (b) fou ina ia faitauina ai e faapea:

“(b) Mo le fuaiupu 18(3), o se aofaiga o tupe e le itiiti ifo i lo le \$1miliona.”

Afuaga o le Teuteuga

E faatulai mai mulimuli ane lenei teuteuga i le teuteuga ua fautuaina i le fuaiupu 7.

E le o toe talafeagai le parakalafa (b) atoa, talu ai, ona e leai se aofaiga o faamaotiina i le fuaiupu 7(1). O le ala lea o le noatia ai lisi i totogi faalisi e fuafuaina e le Komiti Faatino o Eleele, ua aiaia i le Tulafono o Eleele, Fuagafanua ma le Siosiomaga 1989.

Tofa LEVAOPOLO TALATONU: Lau Afioga i le Fofoga o le Fono.....

FOFOGA FETALAI: O le a le fuaiupu?

Tofa LEVAOPOLO TALATONU: O le fuaiupu 23 lau Afioga.

FOFOGA FETALAI: Ia saunoa mai le sui usufono mamalu.

Tofa LEVAOPOLO TALATONU: E puupuu lava le fesili ona o le tulaga i le faalauiloaina o le poloaiga lea i le vaega lea o le Tulafono. O lea e manino mai i lau Afioga i le Taitaifono ma le tou Komiti so outou finagalo ua lava le Savali e faasalalauina ai. Ae pei ona matauina foi e lau Afioga pei e na o tatou lea e aumai Savali ae tele lava foi ina leai. Ae pe a faapefea isi vaega pei o le TV, Observer ma isi Nusipepa ma isi mau mea pe talafeagai i lea vaega pe a?

Tofa TUISA TASI PATEA: Ou te masalo o lo o i ai le Komiti Faafae o lenei foi faamoemoe e mafaia ona sui from time to time fuafuaga aua foi le gasolosolo lelei o lenei Tulafono.

Faamaonia le Teuteuga.

Faamaonia le Fuaiupu 23 e pei ona Teuteuina.

FUAIUPU 24: Tulafono Faatonutonu ma Teuteuga o le Faamatalaga.

FOFOGA FETALAI: O lo o i ai Teuteuga a le Komiti o lo o faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Tofa TUISA TASI PATEA: Lau Afioga i le Fofoga Fetalai ou te faatu le teuteuga i le fuaiupu 24(1)(b) e faapea:

“TEUTEUGA:

xi) Fuaiupu 24

Ina ia aveese le upu “talosaga” i le tuanai ai o le upu “mo” i le faafuiaiupu a24(1)(b) ina ia faitauina ai le (b) e faapea:

(b) faatonu ai pepa aloaia faaopoopo, faamatalaga po o nisi taualumaga e manaomia mo le faamoemoe o lenei Tulafono.”

Afuaga o le Teuteuga

O lenei teuteuga o le a faapea foi ona aofia ai taualumaga mo le Komisi Faamasino.

Faamaonia le Teuteuga.

Faamaonia le Fuaiupu 24 e pei ona Teuteuina.

FUAIUPU 25: Teuteuga faatupulaia.

Faamaonia.

FAAMATALAGA:

FOFOGA FETALAI: O lo o i ai Teuteuga a le Komiti i le Faamatalaga e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Tofa TUISA TASI PATEA: Lau Afioga i le Fofoga Fetalai ou te faatu le Teuteuga i le Faamatalaga (Fuaiupu 5) e faapea:

“TEUTEUGA:

xii) Faamatalaga (Fuaiupu 5)

Ina ia soloia faaupuga “e aofia ai le faatauina mai ma le atiaecina o so o se fanua ua faatonuina” ina ia faitauina ai le Faamatalaga o le Fuaiupu 5 e faapea:

**FAAMATALAGA
(Fuaiupu 5)**

**GALUEGA UA AGAVAA E
TEUFAAFAIGALUEGA AI TUPE**

O vaega o nei tupe teufaafaigaluega ua avea ma galuega ua agavaa e teufaafaigaluega ai tupe mo le faamoemoe o lenei Tulafono:

(a) Lisiina ma le atinaeina o fanua o le Malo;”

Afuaga o le Tulafono

O lenei teuteuga na faatulai mulimuli ane i le teuteuga i le fuaiupu 7 e pei ona fautuaina.

Faamaonia le Teuteuga.

Faamaonia le Faamatalaga e pei ona Teuteuina.

**TULAFONO TAU FAAOFI O FAAMATALAGA MOLIMAU O
FAAMASINOGA 2015 – iloiloga auilili**

FOFOGA FETALAI: E tusa ai ma le Tulafono Tumau 106 e tatau ona faamaonia muamua e le Fono Aoa le Lipoti a le Komiti i le Tulafono Tau Faaofi ona avanoa ai lea o le Iloiloga Auilili o le Tulafono Tau Faaofi.

Tulai mai le Afioga i le Taitaifono o le Komiti o Tupe Maua ma Tupe Totogi.

O i le Sui Taitaifono?

Ia e manatu o le a tatou see atu i le isi Tulafono, se i toe faatulaga mai le Tulafono lenei i se taimi mulimuli ane, se taimi o lenei aso.

Afioga Hon Palusalua Faapo II: Lau Afioga i le Fofoga Fetalai o se mea e fia malamalama ai.

FOFOGA FETALAI: Tulai mai lau Afioga i le Taitai o le Itu Agai.

Afioga Hon PALUSALUA FAAPO II: E pei o lea ua matauina o lea faatoa oo mai le Taitaifono ma le Sui Taitaifono o le la itu a o lea e atoa uma i i lenei itu e fesoasoani atu pe a ua leai ni sui usufono o le la itu.

FOFOGA FETALAI: O lea ua maua atu lou finagalo o lea lava e sagatonu le tatou galuega o lo o faatulaga mai.

Tulai mai lau Afioga i le Taitaifono o le Komiti.

Susuga Hon PAPALIITELE NIKO LEE HANG (Taitaifono Komiti o Tupe Maua ma Tupe Totogi): Lau Afioga i le Fofoga Fetalai ou te faatu le

lafo, Ina ia faamaonia e leni Fono Aoao le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Faamatalaga Molimau o Faamasinoga 2015 e aunoa ma se Teuteuga.

Faaluaina e se tasi o sui usufono mo Faasaleleaga Nu.1, Afioga Hon Gatoloaifaana Amataga Alesana Gidlow.

Na faamaonia le lafo.

FOFOGA FETALAI: E faasilasila atu ua faamaonia nei e le Fono Aoao le Lipoti a le Komiti o Tupe Maua ma Tupe Totogi i le Tulafono Tau Faaofi o Faamatalaga Molimau o Faamasinoga 2015.

O le a sagai atu loa le Fono Aoao i le Iloiloga Auiliili o le Tulafono Tau Faaofi o Faamatalaga Molimau o Faamasinoga 2015.

E tusa ai ma le Tulafono Tumau 102, e amata le Iloiloga Auiliili o le Tulafono Tau Faaofi i le Fuaiupu 2.

FUAIUPU 2: Faamatalaina o uiga o upu.

Faamaonia.

FUAIUPU 3: Faaāogaina ma sootaga ma isi Tulafono.

Faamaonia.

FUAIUPU 4: O faamatalaga molimau talafeagai uma e mafai ona taliaina seia vagana ai ua le faaaogaina e le tulafono po o e le Faamasino.

Faamaonia.

FUAIUPU 5: E ao ona faauigaina i le tulaga lautele Tulafono.

Faamaonia.

FUAIUPU 6: E le aafia ai tulafono faafoe o tagata e afaatasi i taupulepulega faalilolilo, ma isi faapena.

Faamaonia.

FUAIUPU 7: E mafai ona taliaina i faiga faatuutuuga le faamatalaga molimau.

Faamaonia.

FUAIUPU 8: Faamatalaga molimau ua tuuina atu e faavae ai le taliaina.

Faamaonia.

FUAIUPU 9: Faamatalaina o uiga o upu.

Faamaonia.

FUAIUPU 10: Tulafono faafoe lautele e tusa ai o le taliaina o faamatalaga na lipoti atu e isi tagata.

Faamaonia.

FUAIUPU 11: Taliaina o faamatalaga na lipoti atu e isi tagata i totonu o faamaumauga faapisinisi.

Faamaonia.

FUAIUPU 12: E manaomia faamatalaga na lipoti atu i isi tagata i totonu o pepa aloaia mo talosaga po o ni faamatalaga aloaia o se tete e totonu o taualumaga tau le va o tagata.

Faamaonia.

FUAIUPU 13: E le taliaina se faamatalaga na faalogo i ai a se tagata ua molia.

Faamaonia.

FUAIUPU 14: Tulafono faafoe o se fautuaga.

Faamaonia.

FUAIUPU 15: Taliaina o se faamatalaga o fautuaga.

Faamaonia.

FUAIUPU 16: Taliaina o faamatalaga molimau o fautuaga a tagata tomai faapitoa.

Faamaonia.

FUAIUPU 17: Faafoega a tagata tomai faapitoa i totonu o taualumaga tau le va o tagata.

Faamaonia.

FUAIUPU 18: Faamatalaga molimau ua tuuina atu a tagata ua molia e ala i moliaga faaletulafono.

Faamaonia.

FUAIUPU 19: E mafai ona toe faatupu faamatalaga.

Faamaonia.

FUAIUPU 20: Faamatalaga molimau ua maua mai i tulaga e le talafeagai.

Faamaonia.

FUAIUPU 21: Faaleaogaina o faamatalaga na faia e ala i faiga e taotaomia ai.

Faamaonia.

FUAIUPU 22: Tautinoga i le maea ai ona faia o folafolaga, tau faamatau po o isi faiga tau faaosooso.

Faamaonia.

FUAIUPU 23: O le lē gagana ai o le tagata ua molia a o lumanai ai po o i le taimi o le faamasinoga.

Faamaonia.

FUAIUPU 24: Faatagaina i totonu o taualumaga tau le va o tagata.

Faamaonia.

FUAIUPU 25: Faamatalaga na tuuina atu muamua e ogatasi.

Faamaonia.

FUAIUPU 26: Faaaogaina o tulafono faafoe o tulaga faamaoni.

Faamaonia.

FUAIUPU 27: Faamatalaga molimau e tusa ai o le tulaga faamaoni.

Faamaonia.

FUAIUPU 28: Faamatalaga molimau o le tulaga faamaoni o se tagata ua molia.

Faamaonia.

FUAIUPU 29: Faamatalaga molimau o le tulaga faamaoni o se tagata o afaatasi e tetee.

Faamaonia.

FUAIUPU 30: Tulafono faafoe o amioga le manaomia.

Faamaonia.

FUAIUPU 31: Faamatalaga molimau o amioga le manaomia e faatatau i tagata ua molia.

Faamaonia.

FUAIUPU 32: Faamatalaga molimau o amioga le manaomia e faatatau i tagata o afaatasi e tetee.

Faamaonia.

FUAIUPU 33: Tuuina atu o faamatalaga molimau o amioga le manaomia e ala i moliaga faaletulafono.

Faamaonia.

FUAIUPU 34: Faamatalaga molimau o amioga tau faiga aiga a se tagata faasea i totonu o suesuega o mataupu tau faiga aiga.

Faamaonia.

FUAIUPU 35: Taliaina o faamatalaga molimau o meafaitino vaaia e iloagofie ai.

Faamaonia.

FUAIUPU 36: Faaaogaina.

Faamaonia.

FUAIUPU 37: Moliaga ua faamaonia faaletulafono e avea ma faamatalaga molimau i totonu o taualumaga tau le va o tagata.

Faamaonia.

FUAIUPU 38: Moliaga ua faamaonia faaletulafono e avea ma faamatalaga molimau i totonu o taualumaga o tulaga tau faaleaga.

Faamaonia.

FUAIUPU 39: Moliaga ua faamaonia faaletulafono e avea ma faamatalaga molimau i taualumaga tau solitulafono.

Faamaonia.

FUAIUPU 40: Faaiuga o faamasinoga tau le va o tagata e avea ma faamatalaga molimau i taualumaga tau solitulafono po o taualumaga tau le va o tagata.

Faamaonia.

FUAIUPU 41: Faamatalaina o uiga o upu.

Faamaonia.

FUAIUPU 42: Poloaiga mo puipuiga o vaega e i ai tulaga aloaia ma isi faapena.

Faamaonia.

FUAIUPU 43: Aafiaga ma puipuia o tulaga aloaia.

Faamaonia.

FUAIUPU 44: Tulaga aloaia mo fesootaiga ma faufautua faaletulafono.

Faamaonia.

FUAIUPU 45: Tulaga aloaia ma teugatupe tausi a loaia.

Faamaonia.

FUAIUPU 46: Tulaga aloaia mo vaega e saunia mo taualumaga.

Faamaonia.

FUAIUPU 47: Tulaga aloaia mo faatalatalanoaga e foia ai pe teuteu ai se finauga.

Faamaonia.

FUAIUPU 48: Tulaga aloaia mo fesootaiga ma faifeau o nuu.

Faamaonia.

FUAIUPU 49: Tulaga aloaia i totonu o taualumaga tau solitulafono mo faamatalaga ua maua mai fomai po o fomai tau le mafau.

Faamaonia.

FUAIUPU 50: Tulaga aloaia e faasaga i le aafia ai i se tuuaiga.

Faamaonia.

FUAIUPU 51: Pule faitalia e tusa ai o tuuaiga i lalo o le tulafono a atunuu i fafo.

Faamaonia.

FUAIUPU 52: Tapaina o tulaga aloaia e faasaga i se faamatalaga molimau e tuuaia ai lava i totonu o tualumaga a le faamasinoga.

Faamaonia.

FUAIUPU 53: Suiga o tulaga aloaia e tusa ai o manaoga tau le faailoaina atu i totonu o tualumaga tau le va o tagata.

Faamaonia.

FUAIUPU 54: O tagata e logoina atu.

Faamaonia.

FUAIUPU 55: Tuueseina aloaia.

Faamaonia.

FUAIUPU 56: Aia soofaatasi ma aia o le soloai ane i ai i vaega e aloaia.

Faamaonia.

FUAIUPU 57: Puipuiga o faamatalaga e faasino i se mataupu a le Malo.

Faamaonia.

FUAIUPU 58: Malosiaga o le Faamasinoga e le faatagaina ai tulaga aloaia.

Tofa Aveau Tuala Lepale Niko Palamo: Lau Afioga i le Fofoga Fetalai....

FOFOGA FETALAI: O le a le Fuaiupu le sui usufono mamalu?

Tofa AVEAU TUALA LEPALE NIKO PALAMO: O le Fuaiupu 58 lau Afioga i le Fofoga Fetalai.

FOFOGA FETALAI: Tulai mai le sui usufono mo Faleata Sasae.

Tofa AVEAU TUALA LEPALE NIKO PALAMO: Se i ou fesili atu lava i le Vaega lea faamolemole lau Afioga i le Fofoga Fetalai, po o le vaega lea e i ai Faamasinoga foi nei ua i ai faaiuga ae te i ua toe talosagaina se faaiuga o se Faamasinoga lava lea e tasi? Po o i i le vaega lea o lo o i ai puipuiga faamolemole?

FOFOGA FETALAI: Ia, ou te manatu na manino lava le faasilasilaga a le CEO i le mataupu lenei e le i puupuu le taimi na faamalamalamaina ai le Ofisa Sili o Pulega. O le Tulafono Tau Faaofi lenei, na afua mai ona o faafitauli na aliae mai taualumaga o Faamasinoga, lea na mafua ai. O mea uma na tutupu mai i nei taimi e tele sa faia ai le galuega a le Faamasinoga, o i na mafua ai ona tuu mai mataupu taitasi. Ia o le a tali atu pea le Taitaifono, a o lau mau ma lau faalogologo i lea aso, sa manino le faamalamalamaga i le mea tonu foi lea e agai mai ai, e ave le malosiaga i le Faamasino na te tulai ai e faasino ma faatino lana pule agai i le mataupu e tulai mai.

Tulai mai lau Afioga i le Taitaifono.

Susuga Hon PAPALIITELE NIKO LEE HANG: Faafetai atu i lau Afioga i le Fofoga Fetalai mo le avanoa. O lenei ua e tali i le faafesili a le sui usufono mamalu, atonu e leai se isi tali e sili atu i le tali lea ua e tuuina atu. Ae i ai lava lou talitonuga, o le Faamasino e i ai lana aiatatau e fai ai le faaiuga pe afai ua le sao le tulaga o ni molimau, ma e mafai foi ona faaleaogaina e ia le tulaga o mea faapea pe a tulai mai. Ma lou faaaloalo lava.

Faamaonia le Fuaiupu 58.

FUAIUPU 59: Pule faitalia e faaleaogaina ai faamatalaga ua tuuina atu po o ua maua i tulaga agatapuia.

Faamaonia.

FUAIUPU 60: Faamatalaga molimau a itu faamasinoga ma o latou taitoalua ma ava i totonu o taualumaga tau le va o tagata.

Faamaonia.

FUAIUPU 61: Faamatalaga molimau a tagata ua molia i totonu o taualumaga tau solitulafono, ma o latou taitoalua ma ava.

Faamaonia.

FUAIUPU 62: Tulaga agavaa ma faamalosia.

Faamaonia.

FUAIUPU 63: Tulaga agavaa o Faamasino, o faatonu ma faufautua.

Faamaonia.

FUAIUPU 64: Tulaga faamalosia o tagata ua molia ma tagata o aufaatasi e tetee, i totonu o tualumaga tau solitulafono.

Faamaonia.

FUAIUPU 65: Tulaga faamalosia o Le Ao o le Malo, Faamasino, ma isi faapena.

Faamaonia.

FUAIUPU 66: Faamatalaga molimau o felafolafoaiga a faatonu.

Faamaonia.

FUAIUPU 67: Ia tuuina atu e tagata molimau ia faamatalaga molimau i luga o tautoga po o faamaoniga aloaia.

Faamaonia.

FUAIUPU 68: Ia faia e faamatalaupu ia tautoga ma faamaoniga aloaia.

Faamaonia.

FUAIUPU 69: Tulaga agavaa ma faamalosia.

FUAIUPU 70: E le mafai ona noatia le fesiligia o le tuatusi o le tagata molimau.

FUAIUPU 71: Auala masani e tuuina atu ai faamatalaga molimau.

Tofa AVEAU TUALA LEPALE NIKO PALAMO: Faamolemole lau Afioga i le Fofoga Fetalai, o le Fuaiupu 69 faasolo atu ai i lalo. O lau vaai atu i le Tulafono lea, tusa o lea ua faatulafono le vaega lea i le faaiuga foi lea e tatau ona fai e le Faamasino. Tusa ua fai atu le Tulafono, a oo loa i mea ia, le Faamasino, ua tatau ona e mulimuli ai ma fuafua i ai lau faaiuga i le vaega lea. A faapefea la pe a i ai se Faamasino foi lea e le manao e follow i le vaega lea ae pei foi ona silafia vaeatu foi le paia ma le mamalu o alii Faamasino, i tagata foi ua leva ona aoao i mea nei o Faamasinoga. E le faapea e soona Faamasino se tagata vaeatu foi le paia ma le mamalu. A o lea ou te vaai atu i vaega ia, e pei e foliga mai foi lea ua fai atu o le mea lea e tatau ona fai e oe le Faamasino. O lea ou te fia malamalama i le vaega lea, po o le a follow ai lava la Faamasino i le Tulafono lenei? Ma lou faaaloalo lava.

FOFOGA FETALAI: Malo. Tulai mai lau Afioga i le Taitaifono.

Susuga Hon PAPALIITELE NIKO LEE HANG: Faafetai atu i le sui usufono mamalu mo le faafesili. Masalo o le auga o lenei Tulafono o le toe tapenaina o le Tulafono o le 1961. Ma o le faamoemoe foi la lea o le Tulafono na mulimulitaia e alii Faamasino taiala ia ua tuuina atu i i. A o lo o i ai pea le aiatatau a le Faamasino e fai ai lana ia faaiuga moni ma le faamaoni, ae pei o mea ia na o ni taiala e taumafai e faatopetope ma faafaigofie le tapenaina o molimau i Faamasinoga. A o le tulaga lava ia i le Faamasino, i lona ia lava amiotonu ma tulaga faapena, e tatau ia ia ona faia le faaiuga moni ma le talafeagai, not only e vaai le justice, a ia faamaonia foi o lo o faatinoina le tulaga lea.

Ma le faaaloalo lava.

Faamaonia le Fuaiupu 69, 70 ma le 71.

FUAIUPU 72: Suesueina o tagata molimau.

Faamaonia.

FUAIUPU 73: Fesili e le taliaina.

Faamaonia.

FUAIUPU 74: Fesili taiala i totonu o suesuega autu a le vaega na valaauina ma le toe suesueina.

Faamaonia.

FUAIUPU 75: Faaaogaina o pepa aloaia i le fesiligiaina o tagata molimau po o le toe faatupu manatu.

Faamaonia.

FUAIUPU 76: Tiute e tuuina atu ai fesili i totonu o suesuega.

Faamaonia.

FUAIUPU 77: E mafai ona faatapulaa le fesiligiaina.

Faamaonia.

FUAIUPU 78: Fesiligiaina o le tagata e le isi itu faamasinoga e tusa ai o le lelei o lana faamatalaga.

Faamaonia.

FUAIUPU 79: Tagata molimau e i ai uiga tetee.

Faamaonia.

FUAIUPU 80: E le mafai ona fesiligia le tagata molimau e se itu faamasino patino.

Faamaonia.

FUAIUPU 81: Fesiligia i luga o faamatalaga na faia muamua.

Faamaonia.

FUAIUPU 82: Toe suesueina.

Faamaonia.

FUAIUPU 83: Tuuina atu o faamatalaga molimau i le maea ai ona tapunia o le mataupu a se itu faamasinoga.

Faamaonia.

FUAIUPU 84: E mafai e le Faamasino ona toe valaauina se tagata molimau.

Faamaonia.

FUAIUPU 85: Fesiligiaina o tagata molimau e le Faamasino.

Faamaonia.

FUAIUPU 86: Faatonuga mo nisi auala e tuuina atu ai faamatalaga molimau.

Faamaonia.

FUAIUPU 87: Fofogaina i totonu o potu faamasino a o lumanai ai faatonuga mo nisi auala e tuuina atu ai faamatalaga molimau.

Faamaonia.

FUAIUPU 88: O nisi auala e tuuina atu ai faamatalaga molimau.

Faamaonia.

FUAIUPU 89: Faamatalaga molimau ua faamauina i ata vito.

Faamaonia.

FUAIUPU 90: Faatonuga pe a tuuina atu faamatalaga molimau e se tamaitiiti faasea.

Faamaonia.

FUAIUPU 91: Leoleo nana.

Faamaonia.

FUAIUPU 92: Aloaia o le tusi faamaonia a le Komesina.

Faamaonia.

FUAIUPU 93: E mafai ona faia le poloaiga e le faailoaina ai le tagata molimau a o lumanai ai le faamasinoga.

Faamaonia.

FUAIUPU 94: Aloaia o poloaiga ina ia le faailoaina le tulaga e iloagofie ai le tagata molimau a o lumanai ai le suesuega.

Faamaonia.

FUAIUPU 95: Poloaiga ma faatonuga ua talafeagai e puipuia ai tulaga e le faailoaina.

Faamaonia.

FUAIUPU 96: Fetuunaiga po o le faamatuu atu o le poloaiga e le faailoaina ai le tagata molimau.

Faamaonia.

FUAIUPU 97: Soligatulafono o le solia o le poloaiga e le faailoaina ai.

Faamaonia.

FUAIUPU 98: E le manaomia faamatalaga molimau e faamaonia ai i le tulaga lautele.

Faamaonia.

FUAIUPU 99: E ao i faamasino ona faatonuina faatonu o le faamasinoga e tusa ai ma le faatuatuaina o faamatalaga molimau.

Faamaonia.

FUAIUPU 100: Faatonuga e tuuina atu ai faamatalaga molimau i lalo o nisi tuutuuga.

Faamaonia.

FUAIUPU 101: Faatonuga e uiga i ni pepelo ua faia e le ua molia.

Faamaonia.

FUAIUPU 102: Faatonuga e tusa ai o faamatalaga molimau ua tuuina atu e se tamaitiiti ma lapataiga tau faamasinoga e uiga i faamatalaga molimau o tulaga e iloagofie ai.

Faamaonia.

FUAIUPU 103: O le lē mafai po o le faatuai o le faasea i mataupu tau faiga aiga.

Faamaonia.

FUAIUPU 104: E mafai ona taliaina e aunoa ma faamatalaga molimau mea moni ua faaalua manino.

Faamaonia.

FUAIUPU 105: Taliaina o pepa aloaia faatuatuaina ua lomia faasalalau.

Faamaonia.

FUAIUPU 106: Faamaonia o pepa aloaia a le Malo.

Faamaonia.

FUAIUPU 107: O faamatalaga molimau o le faamaonia o moliaga, le tausalaina ma taualumaga faa-faamasinoga.

Faamaonia.

FUAIUPU 108: Faamaoniga o moliaga faaletulafono mai tulaga-lima.

Faamaonia.

FUAIUPU 109: Pepa aloaia faaletulafono a Samoa ma atunuu i fafo.

Faamaonia.

FUAIUPU 110: Faamatalaga molimau o tulafono a atunuu i fafo.

Faamaonia.

FUAIUPU 111: Faasilasilaga i totonu o pepa aloaia faaletulafono i le faia o so o se gaoioiga.

Faamaonia.

FUAIUPU 112: Faamatalaina o uiga o upu.

Faamaonia.

FUAIUPU 113: Suesueina o tagata molimau i se talosaga mai a le faamasinoga i atunuu i fafo.

Faamaonia.

FUAIUPU 114: E mafai ona faatinoina malosiaga e le Resitara.

Faamaonia.

FUAIUPU 115: Faamatalaga molimau e lagolago ai le talosaga.

Faamaonia.

FUAIUPU 116: Puipuiga o tagata molimau.

Tofa Aveau Tuala Lepale Niko Palamo: Lau Afioga i le Fofoga Fetalai.....

FOFOGA FETALAI: O le a le Fuaiupu le sui usufono mamalu?

Tofa AVEAU TUALA LEPALE NIKO PALAMO: O le Fuaiupu lea e 116.

FOFOGA FETALAI: Tulai mai le sui usufono mamalu.

Tofa AVEAU TUALA LEPALE NIKO PALAMO: Ou te fia fesili atu lava e fia malamalama i le vaega lea, aua pei o lea e foliga o lo o faapea mai le vaega lea o le Tulafono e ese mai le Vaega 113 o le Tulafono, e le mafai ona faamalasia se tagata foi lea e sau e molimau pe a le manao le tagata lea e sau e molimau i lalo i i. E pei lava ona silafia, o lo o i ai lava isi vaega e faapea o i ai tulaga faapea e tatau lava ona e sau e te molimau. E tatau ona silafia e le mamalu o le atunuu, o le vaega lea o le Tulafono ua le mafai ai, e i ai lava le aiatata a le tagata ia pe fia molimau pe le molimau, e tusa lava po o ia lea na molimau tutu lava i se soligatulafono na faatino. E fia malamalama i le vaega lea po o le puipuiga lea o le tagata molimau lea i lalo o le Fuaiupu 116 faamolemole. Faafetai lava.

FOFOGA FETALAI: Malo. Tulai mai lau Afioga i le Taitaifono.

Susuga Hon PAPALIITELE NIKO LEE HANG: Lau Afioga o lena e manino lelei lava le tulaga i le tagata lea, a silasila le sui usufono mamalu i le faa-Peretania, “that person is not a compatible witness in a common proceedings in Samoa.” O lena e manino lava. A le malamalama la i le faa-Samoa, o lea e i ai le faapapalagi.

Faamaonia le Fuaiupu 116.

FUAIUPU 117: E mafai ona talosagaina pulega o talosaga e totogi tupe faaalu.

Faamaonia.

FUAIUPU 118: Faamatalaga molimau ma talosaga e ala i fesootaiga i ata vito ma fonotaga i luga o telefoni mai se isi atunuu.

Faamaonia.

FUAIUPU 119: Malosiaga o faamasinoga.

Faamaonia.

FUAIUPU 120: Tuuina atu o faamatalaga molimau ma talosaga tusitusia e ala i fesootaiga i ata vito.

Faamaonia.

FUAIUPU 121: Faamatalaga molimau ma talosaga tusitusia e tuuina atu i telefoni.

Faamaonia.

FUAIUPU 122: Faasilasilaga faa-faamasinoga o tulafono ma faaiuga a le faamasinoga.

Faamaonia.

FUAIUPU 123: Tusi faamaonia mo mataupu faava o malo.

Faamaonia.

FUAIUPU 124: Faamatalaga molimau ua maua mai i faagasologa, masini ma isi masini e faatino ai galuega.

Faamaonia.

FUAIUPU 125: O pepa aloaia ua maua mai i faagasologa, masini ma isi masini e faatino ai galuega a o faagasolo le vaitaimi faapisinisi.

Faamaonia.

FUAIUPU 126: Faamatalaga molimau o nisi gaoioiga a loia ma tagata ua faatagaina e tausia pepa aloaia faaletulafono.

Faamaonia.

FUAIUPU 127: Molimauina o pepa aloaia.

Faamaonia.

FUAIUPU 128: Faamaufaaailoga ma saini.

Faamaonia.

FUAIUPU 129: O pepa aloaia ua 20 tausaga na tuuina mai se puipuigamalu.

Faamaonia.

FUAIUPU 130: Faamatalaga molimau o faamaumauga aloaia.

Faamaonia.

FUAIUPU 131: Faamatalaga o nisi pepa aloaia a le Malo.

Faamaonia.

FUAIUPU 132: Fuainumera faamauina aloaia.

Faamaonia.

FUAIUPU 133: E mafai ona malupuipua pepa aloaia.

Faamaonia.

FUAIUPU 134: Tulafono faafoe.

Faamaonia.

FUAIUPU 135: Tulafono Faatonutonu.

Faamaonia.

FUAIUPU 136: Soloia, aiaiga tau soloaiga ma aiaiga faasaoina.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Tulafono o Faamatalaga Molimau o Faamasinoga 2015.

Faamaonia.

Na faagasolo le Tulafono Tau Faaofi o Faamatalaga Molimau o Faamasinoga 2015 e aunoa ma se Teuteuga.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Tulafono o Tulaga o Tagatanuu i le Teufaafaigaluegaina o Tupe mai Fafu 2014.

FOFOGA FETALAI: O lo o i ai Faasaoga a le Komiti i le Fuaiupu 1 ma le Igoa e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti.

Tofa TUISA TASI PATEA: Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:

“FAASAOGA:

Fuaiupu 1 ma le Igoa

Ina ia aveese le fuainumera “2014” ma suia i le fuainumera “2015” ina ia faitauina ai le Igoa e faapea:

Tulafono o Tulaga o Tagatanuu i le Teufaafaigaluegaina o Tupe mai Fafu 2015.”

Faamaonia le Faasaoga.

Faamaonia le Fuaiupu 1 ma le Igoa e pei ona Faasaoina.

Na faagasolo le Tulafono Tau Faaofi o Tulaga o Tagatanuu i le Teufaafaigaluegaina o Tupe mai Fafu 2015 faatasi ma Teuteuga ma le Faasaoga.

**TULAFONO TAU FAAOFI O LE FAAUIGAINA O TULAFONO 2015
– faitauga faatolu**

Susuga Hon TUILAIPA FATIALOFA AUELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faauigaina o Tulafono 2015 i lona faitauga faatolu.*

Faaluaina e le Sui Palemia, Minisita mo Pisinisi, Alamanuia ma Leipa, ma le Minisita mo Tina ma Tamaitai, Atinae o Nuu, Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

**TULAFONO TAU FAAOFI O LAFOGA O OLOA MA GALUEGA
FAATINO I LUGA O AOFAIGA O TAU 2015 – faitauga faatolu**

Tofa Hon TUILOMA LAMEKO (Minisita mo Tupe Mau): Lau Afioga i le Fofoga Fetalai ma le mamalu o le Maota, ou te tulai atu e faatu le lafo, *Ina ia faitauina nei le Tulafono Tau Faaofi o Lafoga o Oloa ma Galuega Faatino i Luga o Aofaiga o Tau 2015 i lona faitauga faatolu.*

Faaluaina e le Sui Palemia, Minisita mo Galuega tau Alamanuia ma Atinae a le Malo ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofa Faatulafono.

**TULAFONO TAU FAAOFI O TEUTEUGA O LE FAAVAE (NU.2)
2015 – faitauga faatolu**

Susuga Hon TUILAEPA FATIALOFA AUELUA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia teuteuina nei le Tulafono Tau Faaofi o Teuteuga o le Faavae (Nu.2) 2015 i lona faitauga faatolu.*

Faaluaina e le Sui Palemia, Minisita mo Pisinisi, Alamanuia ma Leipa, Minisita mo Galuega tau Alamanuia ma Atinae a le Malo, Minisita mo Tina & Tamaitai, Atinae o Nuu, Afioga ma Agafesootai ma le Minisita mo Faatoaga, Faleoloa o Faatoaga ma Faigafaiva.

FOFOGA FETALAI: Ou te manatu ua maea ona faamalieina aiaiga o le Faavae e tusa ai ma le vaitaimi i le va o le faitauga faalua ma le faitauga faatolu o le Tulafono Tau Faaofi o Teuteuga o le Faavae (Nu.2) 2015. O le aiaiga mulimuli e tataua ona faamalieina, o le lagolagoina lea o le faitauga faatolu i ni palota e le itiiti ifo i le 2/3 o sui usufono o le Palemene. O lea o le a faatino ai le Fesili i le faitauga faatolu i se Palota Tau Valaau. Ia valaau uma atu sui usufono o lo o i fafo e afio mai i totonu mo le tatou faiga palota.

Na ta le logo.

FESILI: Pe o le a faitauina nei le Tulafono Tau Faaofi o Teuteuga o le Faavae (Nu.2) 2015 i lona faitauga faatolu, o e finagalo i ai, tutulai mai.

PALOTA TAUVALAAU T.T.93(1)

1. Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi
2. Tofa Hon Fonotoe Nuafesili Pierre Lauofo
3. Tofa Hon Tuiloma Lameko.
4. Afioga Hon Lautafi Fio Selafi Purcell

5. Afioga Hon Tuisugaletaua Sofara Aveau
7. Tofa Hon Tolofuaivalelei Falemoe Leiataua
8. Afioga Hon Le Mamea Lemalu Su'a Leatuavao Tuiletufuga Ropati Mualia
9. Afioga Hon Tuitama Talalelei Tuitama
10. Tofa Hon Faamoetaulua Lealaiauloto Ulaitino Faale Tumaalii
11. Afioga Hon Magele Mauiliu
12. Afioga Hon Manualesagalala Mati Tuigamala Enokati Posala
13. Afioga Hon Sala Fata Lisati Pinati
14. Afioga Hon Leaupepe Toleafoa Apulu Faafisi
15. Tofa Hon Tuuu Anasii Leota
16. Tofa Toeolesulusulu Cedric Pose Salesa Schuster
17. Tofa Tapuai Toese Ah Sam
18. Tofa Aveau Tuala Lepale Niko Palamo
19. Tofa Tuileutu Alavaa Voi
20. Susuga Papalii Lio Faavaivaioanu Taeu Masipau
21. Afioga Afualo Wood Uti Salele
22. Tofa Levaopolo Talatonu
23. Afioga Hon Aeau Peniamina Leavaiseeta
24. Afioga Hon Palusalua Faapo II
25. Afioga Hon Faumuina Tiatia Faaolatane Liuga
26. Tofa Fagaaivalu Kenrick Samu
27. Afioga Tufuga Gafualeata Faitua
28. Tofa Alo Fulifuli Taveuveu
29. Afioga Lafaitale Patrick Leiataualesa
30. Tofa Faimalotoa Kika Iemaima Stowers
31. Tofa Tuisa Tasi Patea
32. Tofa Lenatai Victor Faafoi Tamapua
33. Tofa Sooalo Mene
34. Afioga Taefu Lemi
35. Afioga Afoafouvale John Moors
36. Susuga Ifopo Matia Filisi
37. Afioga Tialavea Fea Tionisio Seigafolava
38. Tofa Tusa Misi Tupuola
39. Afioga Maualaivao Pat Ah Him
40. Afioga Hon Gatoloaifaana Amataga Alesana Gidlow
41. Susuga Hon Papaliitele Niko Lee Hang
42. Tofa Agafili Patisela Eteuati Tolovaa

IOE - 42

FOFOGA FETALAI: O e faatuiese, tutulai mai.

LEAI – 0

FOFOGA FETALAI: O le iuga leni o le tatou Palota Tauvalaau aua le pasia o le Faavae. O e na ioeina le Teuteuga ma le pasia o le Tulafono e 42. O e na tetee, e leai. O lea, ua faamaonia ai nei le pasia aloaia o le Tulafono. Ou te faasilasila aloaia atu ai ua faamaonia le Fesili, ua logoina le

faitauga faatolu o le Tulafono Tau Faaofi o le Teuteuga o le Faavae, e ala i le Palota ua silia i le 2/3 o sui usufono o le Palemene.

Faamaonia le Teuteuga.

**TULAFONO TAU FAAOFI O TEUTEUGA O LE TULAFONO O
ELEELE, FUAGAFANUA MA SIOSIOMAGA 2015
- faitauga faatolu**

Tofa Hon FAAMOETAULOA LEALAI AULOTO ULAITINO FAALE TUMAALII: (Minisita mo Punaoa Faanatura ma le Siosiomaga): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Teuteuga o le Tulafono o Eleele, Fuagafanua ma Siosiomaga 2015 i lona faitauga faatolu.*

Faaluaina e le Minisita mo le Soifua Maloloina, Minisita mo Aoga, Taaloga ma Aganuu ma le Minisita mo Galuega, Felauaiga ma Atinae Eseese.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.

**TULAFONO TAU FAAOFI O TEUTEUGA O LE TULAFONO O LE
FAAMAUINA O PULE O FANUA 2015 - faitauga faatolu**

Tofa Hon FAAMOETAULOA LEALAI AULOTO ULAITINO FAALE TUMAALII: Lau Afioga i le Fofoga Fetalai ou te tulai atu ma le ava tele e faatu le lafo, *Ina ia faitauina nei le Tulafono Tau Faaofi o Teuteuga o le Tulafono Faamauina o Pule o Fanua 2015 i lona faitauga faatolu.*

Faaluaina e le Minisita mo le Soifua Maloloina, Minisita mo Aoga, Taaloga ma Aganuu ma le Minisita mo Fesootaiga ma Faamatalaga Tekonolosi.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.

**TULAFONO TAU FAAOFI O FAAMATALAGA MOLIMAU O
FAAMASINO 2015 – faitauga faatolu**

Susuga Hon TUILA EPA FATIALOFA AU LUEA LUPESOLIAI NEIOTI AIONO SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Faamatalaga Molimau o Faamasinoga 2015 i lona faitauga faatolu.*

Faaluaina e le Sui Palemia, Minisita mo Pisinisi, Alamanuia ma Leipa, Minisita mo Galuega tau Alamanuia ma Atinae a le Malo, Minisita mo Fesootaiga ma Faamatalaga Tekonolosi ma le Minisita mo Tina ma Tamaitai, Atinae o Nuu, Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

**TULAFONO TAU FAAOFI O TULAGA O TAGATANUU I LE
TEUFAAFAIGALUEGAINA O TUPE MAI FAFO 2014
- faitauga faatolu**

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Tulaga o Tagatanuu i le Teufaafaigaluegaina o Tupe mai Fafu 2014 i lona faitauga faatolu.*

Faaluaina e le Minisita mo Galuega tau Alamanuia ma Atinae a le Malo, Minisita mo Tina ma Tamaitai, Atinae o Nuu, Afioga ma Agafesootai ma le Minisita mo Fesootaiga ma Faamatalga Tekonolosi.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

FOFOGA FETALAI: Ona fai ai lea o le upu lea e fai soo e Lavea Levi i aso ia pe a maea le 2AP, ona iu ai lea o le tatou po. E momoli atu le faafetai tele i le paia ma le mamalu o le tatou Maota i lenei aso. O lea ua tatou taunuu i le siui o le tatou galuega sa tatou feagai ai mai le taeao analeila. E le faaititia le agaga o le faafetai atu i le paia ma le mamalu o sui usufono mamalu uma o le tatou Maota, ona o lo outou logosaia o le talosaga na tuuina atu. O tatou lava e televave ai a tatou galuega o tatou foi e faaumiumi ai ma tosotoso tualumaga o le tatou Fonotaga. A o lea e matau, sa i ai le faamoemoe tatou te toe Fono nanei i le po, ma tatou alu lava lea seia maea le tatou galuega. Ae peitai, o lea ua uma a tatou Tulafono tetele e iva (9), a o lea faatoa 45 minute talu le tatou taimi faaopoopo mai le tatou taimi masani.

E momoli atu ai le agaga faafetai tele i le paia ma le mamalu o le tatou Maota, lau Afioga i le Palemia aemaise le paia i le Kapeneta, lau Afioga i le Taitai o le Itu Agai ma le Sui Taitai ma sui usufono mamalu uma o le tatou Maota. E talitonu o lea ua ae ma le manuia faiva o lenei aso. Ma e talitonu foi e le ni upu e avane ai, o lea ua uma ai foi le tatou galuega sa faatulagaina. O le galuega sili lenei ona urgent. Sa naunau i ai le Ofisa o le Fono e fia faamotu atu, ma faatulaga ai Tulafono ua leva ona faatalitali mai Matagaluega a le Malo aua le pasiaina atu e le tatou Maota nei.

E momoli atu le faafetai mo le faaauauina o le tatou Fonotaga i lenei aso. Malo le tofa, malo le fetalai ma le saunoa malo le malele. O lea ua tatou taunuu i le faaiuga o le tatou galuega, ma o le faaiuga foi lena mo le tatou Fonotaga mo lenei masina. O lo o faaauauina pea Fonotaga a tatou Komiti e pei ona i ai le faatulagana mai le tatou Maota fono fou lenei. Ia onosai mai pea a outou Afioga i Taitaifono ma Sui Taitaifono aemaise o sui usufono uma o Komiti taitasi. O le tatou Fonotaga o lumanai nei ia Novema, e i ai le talitonuga e uma ai le tatou back log o lo o i ai nei. E le o toe i ai ni mea tetele o totoe, toe lava o lipoti a Komiti ma mea e tataua ona faamaeaina ma tuu mai i luma o le Laulau a Fono, ina ia aua nei faaleaogaina lo outou tautiga e ala i

taimi ma aso sa faatulaga ai a tatou galuega, e pei ona talosaga atu ai le Fofoga Fetalai, aemaise o le lafo sa faatu e le tatou Malo.

E i ai le talitonuga o le a tatou faia se malologa, ae faafetai atu foi i le tapuaiga a le tatou atunuu o Samoa. E i ai le talitonuga e leai lava se faiva e asa ma se maumau. O le a foi sa outou faafofoga i lenei aso, i tuleiga ma saunoaga ua tiutalaloa i lau faafofoga ia asuasua atu vai malu i puega. O le naunau foi o le tatou Maota, e le toe naunau ta, a o le agaga ina ia faaalua finagalo ma faamoemoega ina ia faia mea uma e tusa o lo matou valaauina. Faafetai tatalo Samoa, faafetai tapuai mai. O manu na o le tatou folauga, tatou aga atu i le faaiuga o lenei tausaga. Ia maua lo outou soifua manuia, mai lava i ona ao seia oo i ona iu. Lana Afioga Mamalu, O Le Ao o le Malo ma le Masiofo, Sui o le Fono a Sui Tofia ma le Masiofo, aemaise o le Faamasino Sili ma le Ofisa o Faamasinoga, ia o Pulega e faatauaina e le tatou Malo, Ofisa Sili o Pulega o Matagaluega a le Malo ma Faalapotopotoga Tumaoti, faamalo atu le galulue faafetai foi faatasi mai i lenei aso. O la outou galuega lena o le taotaotua aua vae ma lima o le tatou Malo.

E le mafai foi ona faaititia ai le momoli atu o le faafetai tele i le aufaitatalo o le tatou atunuu. Malo le onosai, malo le tauatai. Ua manuia faiva o Samoa ona o le tatou faatuatua i le Alii o lo o faavae i ai lo tatou Malo. Ona i ai lea o le manatu o le a tatou alo i tulaga masani, alo foi le Malo ia i ona faiva ma tiute. Alo foi le Palemene ia i ona faiva ma tiute faapena foi tagata taitoatasi i ana tiute ma galuega. O le tatalo ia alofagia e le Atua lo outou soifua manuia. Ia mamao ni lagilagia, mamao ni faafitauli, mamao ni mala ae taitaiina pea lo outou soifua manuia ina ia tatou toe potopoto i le aso o le a atofaina e toe faatasi ai lo tatou Maota nei.

Ae le i taumavae, ou te valaau atu i se tasi o sui usufono mo Faasaleleaga Nu.3 e tulai mai e fai se tatou tatalo ona tatou malolo ai lea.

Na tolopo Taulumaga a le Fono Aoa o le itula e 1:52 i le aoauli seia aulia le Aso Lua, 17 Novema 2015.